

ಚುಟ್ಟಿಕೋರ ಪೆಟ್ಟಿ

ಅಷ್ಟಂಢೇರಂಡ ಹಢಿತ ಹೆಮ್ಮಯ್ಯ



ಕರ್ನಾಟಕ ಕೂಡವ ನಾಹಿತ್ಯ ಅಕಾಡೆಮಿ, ಮಡಿಕೆಲಿ

“ಸುವರ್ಣ ಕರ್ನಾಟಕ ನಮ್ಮ” ವಿಶೇಷ ಯೋಜನೆ ಪೋಲೆ - 2006

ಚುಪ್ಪಿಕೋರ್ ಪೆಪ್ಪಿ

(ಚೆರಿ ಚೆರಿಯ ಕಫೆರ ಗೂಡ್)

ವಿಳೆದ್ನವು :

ಅಪ್ಪಂಡೇರಂಡ ಪವಿತಾ ಪೆಮ್ಮಯ್ಯ

ಬೊಳಿ ಪಡ್ತನವು :



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

"CHUPPIKOR PEPPI" -

A collection of short stories by

Appanderanda Pavitha Pemmaiah, Choorikad, Kutta.

Published by the Karnataka Kodava Sahithya Academy,
Madikeri, during December 2006.

First Edition : 2006

ಆದ್ಯ ಮುದ್ರಣ : 2006

© All Rights Reserved

© ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್.

Price : Rs. 20-00

ಶ್ರಯ : ಉ. 20-00

ಪ್ರಕಟಣೆ ಸಮಿತಿ :

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ, ಅಧ್ಯಕ್ಷಿಣಿ

ಶ್ರೀ ಮುದ್ದಿಯಡ ಕುಶ ಪೊನ್ನಪ್ಪ, ಸದಸ್ಯ

ಶ್ರೀಮತಿ ತೀತಿರ ರೇಖಾ ವಸಂತ್, ಸದಸ್ಯೆ

ಶ್ರೀಮತಿ ಪಾಲೆರ ರಾಣಿ ಅಪ್ಪಣ್ಣ, ಸದಸ್ಯೆ

ಬೊಳಿ ಪಡ್‌ತ್‌ನವು :

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸೌಟ್ ಭವನ, ಮ್ಯಾನ್ಸ್ ಕಾಂಪೌಂಡ್, ಮಡಿಕೇರಿ - 571 201

ಅಚ್ಚುಕಾರ :

ರಾಜೇಶ್ ಪವರ್ ಪ್ರೆಸ್

ದರ್ಬೆ, ಪುತ್ತೂರ್, ದ. ಕ.

ಫೋನ್ : (08251) 231696, 231697

ಎಳ್ಳಾಕರ್ತೀರ ತಕ್ಕ

ಕೊಡವ ತಕ್ಕಲ್ ಚೆರಿಯ ಕಥೆ ದುಂಬಾ ಕಮ್ಮಿ. ಇನ್ನನಾಯಿತ್ ನಾನ್ ಎಲ್ಲೆಲ್ಲಿಯೋ, ಬೋರೆ ಭಾಷೆಲ್ ಓದ್‌ನಾನ, ಕೇಟರಿಂಜಾನ ಇಲ್ಲಿ ಕೊಡವ ತಕ್ಕಲ್ ಎಳ್ಳಾದಿಯೆ. ಇದತ್ ಸುಮಾರೆಲ್ಲ ಓದುಗ ಮಾಜನ ಅಲ್ಲಿ, ಇಲ್ಲಿ, ಎಕ್ಕೇಂಗಿ, ವಿದೇಂಗಿ ಭಾಷೆಲ್ ಓದ್‌ನದೇ, ಅಲ್ಲೇಂಗಿ ಅರಿಂಜದೇ ಆಯಿತಿಕ್ಕು. ಅಂದಕಲೂ, ಕೊಡವ ತಕ್ಕಲ್ ಇನ್ನತ ಚೆರಿಯ ಕಥೆ ಇರಡ್ ಎಣ್ಣುವ ಆಸೆಲ್ ಇದ್‌ನ ಎಳ್ಳಾದಿಯೆ. ಇದ್‌ಲ್ ಬಲ್ಯ ಸಾಹಿತ್ಯ ಮೌಲ್ಯ ಆಡ್, ಎಣ್ಣುವನ್ನತ ಬಲ್ಯ ಸಂದೇಶ ಆಡ್ ಇಲ್ಲೆ ಎಣ್ಣುವದ್ ನಾಕ್ ಚಾಯಿತೆ ಗೊತ್ತುಂಡ್. ಅಂದಕಲೂ, ಕೊಡವ ಕಥಾ ಪ್ರಪಂಚತ್ ಈ ಮಾದರಿರ ಎಳ್ಳಾಕೂ ಅವಕಾಶ ಇರಡ್, ದಾಖಲೆ ಆಕಡ್ ಎಣ್ಣುವ ಉದ್ದೇಶತ್ ಇದ್‌ನ ಪುಸ್ತಕ ರೂಪತ್ ಕೂಟಿಯೆ.

ನಾನ್ ಎಳ್ಳಾದ್‌ನ ಈ ಸಾಮಾನ್ಯ ಕಥೆನ ಪ್ರಕಟಣೆಕ್ ಆಯ್ಕೆ ಮಾಡಿತ್, ಬಯ್ಯಂಜಿ ತಿದ್ದಿ ನೀಕಿತ್, ಚಾಯಿ ಕೂಟಿತ್ ಬೊಳಿ ಪಡ್‌ತನ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಕ್ ನಾಡ ಕೃತಜ್ಞತೆ. ನಾಡ ಎಳ್ಳಾಕ್ ಬಟ್ಟೆ ಬೊಳಿ ರೂಪತ್ ಸಹಾಯ ಮಾಡ್‌ನ ಅಕಾಡೆಮಿ ಅಧ್ಯಕ್ಷಿಣಿ ಉಳ್ಳಿಯಡ ಡಾಟಿ ಪೂವಯ್ಯ ಅಯಿಂಗಕೂ, ಎಲ್ಲಾ ಸದಸ್ಯಂಗಕೂ ನಾಡ ವಂದನೆ. ಇದೇ ಮಾದರಿರ ಒತ್ತಾಸೆ ಎಂದೂ ಇರಡ್. ಕೊಡವ ಸಾಹಿತ್ಯ ಎಲಂಗಿ ಬಾವಡ್.

ಚೂರಿಕಾಡ್ - ಕುಟ್ಟ

7-12-06

- ಅಪ್ಪಂಡೇರಂಡ ಪವಿತಾ ಪೆಮ್ಮಯ್ಯ

ಅಧ್ಯಕ್ಷಿಣಿರ ತಕ್ಕ

“ಚುಪ್ಪಿಕೋರ್ ಪೆಪ್ಪಿ” ಎಣ್ಣುವದ್ ಏರ ಸರಳತೆರ, ಚೆರಿಯ ಕಥೆರ, ಒರ್ ಚೆರಿಯ ಗೂಡ್. ಇದತ್ ಒಟ್ಟು 25 ಕಥೆ ಉಂಡ್. ಈ ಕಥೆ ಎಲ್ಲಾ ಸುಮಾರ್ಕ್ ಬೋರೆ ಭಾಷೆಲ್ ಬಂದದೇ, ಅಲ್ಲೇಂಗಿ ಪೆರಿಯವು ಅರಿಂಜದೇ ಆಯಿತುಂಡ್. ಅಂದಕಲೂ, ಕೊಡವ ತಕ್ಕರ ಮಟ್ಟಿಗೆ ಇದ್ ಆದ್ಯ ಪ್ರಯೋಗ. ಕೊಡವತಕ್ಕಲ್ ಚೆರಿಯಕಥೆ ಏರ ಕಮ್ಮಿ ಉಂಡ್. ಇನ್ನನಾಯಿತ್, ಈ ಚೆರಿಯ ಕಥೆನ ಇಲ್ಲಿ ಪ್ರಕಟಣೆಕ್ ಆಯ್ಕೆ ಮಾಡಿತ್.

ಏರ ಚುಪ್ಪಿಮಕ್ಕಕ್ ಬಲ್ಯ ಕಥೆ, ಕಾದಂಬರಿ, ಕವನತಾರನ್ನತ ಎಳ್ತಾ ಸುಲಭತ್ ಕಾಯಿಸ ಆಪಕಿಲ್ಲೆ. ಆಚೇಂಗಿ, ಚೆರಿ ಚೆರಿಯ ನೀತಿಕಥೆ, ತಮಾಸಿಕಥೆ, ಅಪ್ಪಯ್ಯ ಕಥೆ... ಇನ್ನತದ್ ಚೋದಾಕತಿರ. ಓದುವ ಕಯ್ಯತ ಚುಪ್ಪಿಯಕ್ ಪೆರಿಯವು ಓದಿತೂ, ಅಲ್ಲೇಂಗಿ ಎಣ್ಣೆತೂ ಕೊಡ್ಕಲು. ಈ ತರತ್, ಚುಪ್ಪಿಯ ಒಮ್ಮೆ ಇನ್ನತಾಂಡ ವಿಷಯತ್ ಒಗ್ಗಿ ಪೋಯಿತ್, ಮುತುವರ್ಜಿ ಕಾಟ್ಚೇಂದಾನಕ, ಅಲ್ಲಿಂಜಿ ಕ್ರಮೇಣ ಅವು ಕೊಡವ ತಕ್ಕಲ್ ಬೋರೆ ತರಾವರಿ ಎಳ್ತಾನೋ ಓದುವನೆಕೆ ಮಾಡಲು.

ಈ ತರತರ ಹಿನ್ನೆಲೆಲ್, ಇದ್ ಏರ ಸರಳಕಥೆ ಆನಕಲೂ, ಇದ್ನ ಪ್ರಕಟಣೆಕ್ ಆಯ್ಕೆ ಮಾಡಿತ್. ಅಲ್ಲತೆ, ಚೆರಿ ಚೆರಿಯ ಪುದಿಯ ಎಳ್ತಾಕಾರಕೂ ಆಪಚ್ಚಕ್ ಒತ್ತಾಸೆ ಕೊಡ್ಕಂಡು ಎಣ್ಣುವ ಅಭಿಪ್ರಾಯವೂ ಇದತ್ ಕೂಡಿತ್ತುಂಡ್. ಇದ್ನೇಲ್ಲ ನೋಟಿತ್, ಬೋರೆ ಎಳ್ತಾಕಾರಳೂ ಮಿಂಞಾಕ್ ಬರಂಡು. ಆಪಚ್ಚಕ್ ದುಂಬ ಎಳ್ತಂದಂಡು. ಬೋರೆ ಬೋರೆ ಸಾಹಿತ್ಯ ಪುಸ್ತಕತ್ನ ದುಂಬ ಓದಂಡು.

ಇನ್ನೆಲ್ಲಾ ಮಾಡಿಯಂಡ್ ಪೋನಕೇ ಕ್ರಮೇಣ ನಲ್ಲ ನಲ್ಲ ಸಾಹಿತ್ಯ ಸೃಷ್ಟಿ ಆಪಕ್ ಸಾಧ್ಯ ಉಳ್ಳೊ. ಆನಗುಂಡ್, ಅಭಿಮಾನಿಯ ಕೊಡವ ಸಾಹಿತ್ಯತ್ನ ಬಲಪಡ್ತುವಕ್ ಕೈತೆಕ್ಕಿ ಮಿಂಞಾಕ್ ಬರಂಡು. ಕೊಡವ ತಕ್ಕ ಬೊಳೆಯಡ್, ಕೊಡವ ಸಾಹಿತ್ಯ ಬಲ ಕೂಡಡ್.

ಮಡಿಕೇರಿ

9-12-06

- ಉಳ್ಳಿಯಡ್ ಡಾಟ್ ಪೂವಯ್ಯ

ಅಧ್ಯಕ್ಷಿಣಿ, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಒಳ್ಳೆ ಪಾಠೆಲ್...

(1)	ನರಿ ಪಿಂಞ ಕುರ್ಕ	-	1
(2)	ಮೂಂದ್ ತಂಗೆಯ	-	3
(3)	ಚೀಂಚಟ್ಟಿರ ಮೋಂವೊ	-	5
(4)	ತಿರ್ನ ಬಾಣ	-	6
(5)	ನೆಯ್ಯಿ - ಪಾಯಿಸ	-	8
(6)	ಗಂಡ ಭೇರುಂಡ	-	10
(7)	ಮಂದಪ್ಪಂಡ ಮಂಗಲ	-	11
(8)	ಪೆದ್ದಂಡ ಪಯ್ಯು	-	14
(9)	ಪಚ್ಚೆ ಕುರ್ಕ	-	15
(10)	ನಲ್ಲೂರ್ ನಲ್ಲಪ್ಪ	-	17
(11)	ನಾನಾ - ನೀನಾ	-	19
(12)	ಮೂಂದಾಳೊಕ್ ಮೂಂದಾಳೊ	-	21
(13)	ಪಾರಿವಾಳ ಪಿಂಞ ಮರಿಯ	-	23
(14)	ನೈಚ ದುಡ್ಡ್	-	25
(15)	ಚಂದ್ರಂಡೊಳೊಲ್ ಮೊನ!	-	26
(16)	ಪೊನ್ರ ನವಿಲ್	-	28
(17)	ಕಾಚಿ - ಪೀಚಿ!	-	30
(18)	ಕಾಕೆ ಪಿಂಞ ಗಪ್ಪು	-	32
(19)	ಜೀನೆ ಜೋಯಪ್ಪ	-	34
(20)	ಪೊನ್ನಿರ ಅದ್ಯಪ್ಪ	-	36
(21)	ಪಾಳಾಸೆ	-	38
(22)	ಚೋಮುಣಿ - ಪೆಮ್ಮುಣಿ	-	39
(23)	ಮೂಂದ್ ವ್ಯಾಪಾರಿಯ	-	42
(24)	ಬುದ್ದಿರ ಪರೀಕ್ಷೆ	-	44
(25)	ಪೂಂಞ್ ಪಿಂಞ ನೀಲಕ್ಕಿ	-	46



ಚುಷ್ಟಿಕೋಲರ್ ಪಷ್ಟಿ

ನರಿ ಪಿಂಞ ಕುರ್ಕ

ಮರೆನಾಡ್‌ರ ಕಾಡ್‌ಲ್ ಒರ್ ನರಿ ಪಿಂಞ ಕುರ್ಕ ದಂಡೂ ಒಕ್ಕಚೇ ವಾಸ ಮಾಡಿಯಂಡ್ ಇಂಜತ್. ಬೋಟಿಯಾಡ್‌ವಕ ಕ್ಷೋಟಾನಾನ ಸಮಪಾಲ್ ಮಾಡಿಯಂಡ್ ತಿಂಬನ್ನೆಕೆ ಒಪ್ಪಂದ ಮಾಡಿಯಂಡಿಂಜತ್. ಸುಮಾರ್ ದಿನ ಕಯಿಂಜದು, ನರಿಕ್ ಸಮಪಾಲ್ ತಿಂಬದ್ ಎನ್ನಂಗೋ ಸರಿಬಂದ್‌ಲೆ.

ಒರ್ ದಿನ ಅದ್ ಕುರ್ಕಂಗ್ಲೆಚಿ -

“ಅಲ್ಲಾ... ನಂಗ ದಂಡಾಳೂ ಅಣ್ಣ-ತಮ್ಮಣಂಗಡನ್ನನೆ ಬದ್‌ಕಿಯಂಡುಂಡ್. ಆನಗುಂಡ್, ಈ ಪಾಲೆಲ್ಲಾ ಎನ್ನಂಗ್... ದಂಡಾಳೂ ಕೂಡಿಯಂಡ್ ಒರೇ ಗುಡ್ಡೆ ಮಾಡಿಯಂಡ್ ತಿಂಗನಾ!” ನರಿರ ಈ ತಕ್ಕಕ್ ಕುರ್ಕ ಒತ್ತಂಡತ್.

ಪಿತ್ಯಾಂದ್ ದಂಡಾಳೂ ಬೋಟಿಯಾಡ್‌ನಾನ ಒರ್ ಗುಡ್ಡೆ ಇಡುವೊ..., ದಂಡಾಳೂ ಜೊತೆಲೇ ತಿಂಬೊ...; ಇನ್ನನೆ ಮಾಡಿಯಂಡಿಂಜತ್. ದಂಡಾಳೂ ಜೊತೆಲ್ ತಿಂಬಕ ಹೊಟ್ಟೆಬಾಕ ನರಿ ಗಬಗಬಾಂದ್ ಮುಗ್ಗಿರುವಯಿಂಜತ್. ಚೆರಿಯ ಬಾಯಿರ ಕುರ್ಕ ನಾಲ್ ಬಾಯಿ ತಿಂಬ ನೇರಕ್ ನರಿ ಬಾಕಿ ಎಲ್ಲಾ ಬಾಟಿತಾಪಯಿಂಜತ್. ಇದ್‌ನ ನೋಟಿ ನೋಟಿ ಕುರ್ಕಂಗ್ ಚೆಡಿ, ಮೊರೆ ಎಲ್ಲಾ ಬಂದಂಡಿಂಜತ್. ಇರಡ್... ಇದ್‌ಂಗ್ ಬುದ್ಧಿ ಪಡ್‌ಪಿಚಿಡತ ಪೋಚೇಂಗಿ ನಾನ್ ಕುರ್ಕನಾಯಿತ್ ಪುಟ್ಟಿತೆನ್ನ ಪ್ರಯೋಜನಾಂದ್ ಕುರ್ಕ ಒರ್ ಉಪಾಯ ಮಾಡ್‌ಚಿ.

ಚೆನ್ನ ದಿವಸ ಕಯಿಂಜದೂ ಕುರ್ಕ ನರಿಕ್ ಎಣ್ಣೆಚಿ - “ಅಲ್ಲಾ... ನಂಗ ಅಲ್ಲಿ ಇಲ್ಲಿ ಕಷ್ಟಪಟ್ಟಿತ್ ಬೋಟಿಯಾಡುವಾಂಗಿಂಜ, ಕಾಡ್‌ರ ಆಕರಲ್ ಒರ್ ರೈತಂಡ ಮನೆರ ಪಕ್ಕ ಒರ್ ಗೂಡ್ ಉಂಡ್. ಅಲ್ಲಿ ಆಡ್, ಕೊರಿ, ಕೋಳಿ ಎಲ್ಲಾ ಉಂಡ್. ಇಂದ್ ಬೈಟ್ ಪೋಚೇಂಗಿ ಬೋಂಡಿಯಾನ ತಿಂದಂಡ್ ಬರಲು. ಕೊಟ್ಟರ ಗೋಡೆನ ತೂತ್ ಮಾಡ್‌ಚೇಂಗಿ ಸುಲಭತ್ ನುಗ್ಗಲು ಪಿಂಞ ಕೆಲದುಂಬಿತ್ ಮರಿಯಣೆ ತಿಂಗಲು”.

ಕುರ್ಕಂಡ ತಕ್ಕ ಕೇಟಿತ್ ನರಿಕ್ ಪೆರ್ತ್ ಕುಸಿಯಾಯಿರ್ತ್. “ನಲ್ಲ ಉಪಾಯಾ”ಂದ್ ನರಿ ಕ್ಡಾನೀರ್ನ ಎರ್ಕಿಯಂಡತ್!

ಅಂದೇ ಬೈಟ್ ದಂಡಾಳೂ ರೈತಂಡ ಕೊಟ್ಪಕ್ ತೂತ ಮಾಡಿತ್ ಒಳ್ಳಕ್ ನುಗ್ಗಚಿ. ನರಿ ನುಗ್ಗನನ್ನೆಕೆ ಕ್ಡಾನಾಬಟ್ಟೆ ಕೊರಿ, ಆಡ್, ಕೋಳಿಯಳ ಕೊಂದಿತ್‌ಟ್ಟಿತ್ ತಿಂಬ ಕೂಡ್‌ಚಿ. ಕುರ್ಕ ಮಾತ್ರ ಚೆನ್ನ ಚೆನ್ನಂಗೇ ತಿಂಬಂಜಿ ಅಕ್ಕಕ್ಕ ಅವು ಮಾಡ್‌ನ ತೂತ್‌ಕಾಲೇ ಪೊರ್‌ಮೆ ಪೋಯಿತ್ ಬಂದಂಡಿಂಜತ್.

ಇದ್‌ನ ನೋಟಿತ್ ನರಿ ಕೇಟಿತ್ - “ಎನ್ನೊಂಗ್ ಕುರ್ಕಣ್ಣಾ... ತಿಂಬದ್ ಬುಟ್ಟಿತ್ ಪೊರ್‌ಮೆ ಪೋಯಂಡುಳ್ಳಿಯಾ?”

ಕುರ್ಕ ಎಣ್ಣೆ ಚಿ - “ಒಂದೂ ಇಲ್ಲೆ ನರಿಯಣ್ಣಾ... ದಾರಾಚೇಂಗಿ ಬಾತಾಂದ್ ನೋಟಿಯಂಡುಳ್ಳೊ... ನೀಕ್ ಒರೂ ಬೇಜಾರ ಬೋಂಡ... ಚಾಯಿಲ್ ಕೆಲದುಂಬಾ ತಿನ್ನ”.

ಆಚೇಂಗಿ, ಕುರ್ಕ ತೂತ್‌ರೊಳ್‌ಲ ನುಗ್ಗಿತ್ ನೋಟಿಯಂಡಿಂಜಿಯೆ, ತೂತ್‌ರೊಳಿಯ ತಾಂಡ ತಡಿ ಪುಡಿಚೆಂಡುಂಡಾ.... ಇಲ್ಲಿಯಾಂದ್! ಚೆನ್ನ ನೇರ ಕಯಿಂಜದು ಕುರ್ಕ ಪೊರ್‌ಮೆ ಪೋಚಿ. ಒಳ್ಳಲ್ ನರಿ ಕೆಲ ದುಂಬಿತುಂಡೇಂಗಿಯೂ ಇಂಞೂ ಮುಕ್ಕಿಯಂಡಿಂಜತ್. ಅಕ್ಕಣೆ ಪೊರ್‌ಮೆ ಕುರ್ಕ “ಉಕ್ಕೆ ಹೂವೊ”ಂದ್ ಕೂತ್‌ಟ್ಟಿತ್.

ಈ ಸದ್ದ್ ಕೇಟಿ ರೈತಂಡ ನಾಯಿಯ ಕೊರ್‌ತಂಡ್ ಓಡಿ ಬಾತ್. ಕುರ್ಕ ತಪ್ಪಾಚಿಟ್ಟುಂಡ್ ಓಡ್‌ಚಿ. ನಾಯಿಯಡ ಸದ್ದ್ ಕೇಟಿತ್ ನರಿಯೂ ತೂತ್‌ಕಾಲೇ ನುಗ್ಗಿತ್ ಓಡ್‌ವಕ್ ಪೇಚಾಡ್‌ಚಿ. ಆಚೇಂಗಿ, ಕ್ಡಾನಾಬಟ್ಟೆ ತಿಂದಿತಿಂಜಾನ ಗುಂಡ್, ಕೆಲ ಪೆರ್ತ್ ಬಣ್ಣ ಬೆಚ್ಚಿ ಪೋಯಿತಿಂಜತ್! ಪೊರ್‌ಮೆ ದಾಟುವ ಕಯ್ಯಲೆ..., ಒಳ್ಳಕೂ ಪೋಪ ಕಯ್ಯಲೆ...!

ನರಿ ಚಿಕ್ಕಿಯಂಡ್ ಒದ್ದಾಡಿಯಂಡ್ ಇಪ್ಪಕ, ರೈತ ಸದ್ದ್ ಕೇಟಿತ್ ದೊಣ್ಣೆ - ಬಡಿಯ ಎಡ್‌ತಂಡ್ ಬಾತ್. ತೂತ್‌ಲ್ ಚಿಕ್ಕಿತಿಂಜ ನರಿಕ್ ಕಯ್ಯುವಚ್ಚಕ್ ಪೊಜ್ಜಿತ್ ಕೊಂದತ್.

ಒಬ್ಬಂಗ್ ಮೋಸ ಮಾಡಿತ್ ಬದ್‌ಕುವಕ್ ನೋಟ್‌ಚೇಂಗಿ, ಅವನೂ ಒರ್ ದಿನ ಮೋಸ ಪೋಪಾತ್ ಸಂಶಯ ಇಲ್ಲೆ.

*

*

*

ಮೂಂದ್ ತಂಗೆಯ

ಅಲಿಯತ್‌ನಾಡ್‌ಲ್ ಒರ್ ಮುದ್ದಾಕ ಇಂಜತ್. ಅವಂಗ್ ಒರ್‌ಕ್‌ಣ್ಣ, ಮೂಂದ್ ಮೂಡಿ ಮಕ್ಕ. ಮೂಡಿಮಕ್ಕ ಪೆರ್ತ್ ಚಾಯಿಕಾರ್ತಿಯ. ಕಲಯತ್‌ಪುರ ಎಣ್ಣುವ ಊರಾರ ಬಲ್ಯ ಪಣಕಾರ ಮೂಂದ್ ಕ್‌ಣ್ಣ ಮಕ್ಕ ಈ ಮೂಂದ್ ಮೂಡಿಯಳ ಮಂಗಲ ಕಯಿಚಂಡತ್. ಚೆನ್ನ ಕಾಲ ಕಯಿಂಜದು, ಮುದ್ದಾಕ ಚೆತ್ತ್ ಪೋಚಿ. ಅಣ್ಣ ತಂಗೆಯಳ ನೋಟಿಯಂಡ್ ಬಂದಂಡ್ ಇಂಜತ್. ತಂಗೆಯ ಮಂಗಲ ಕಯಿಚಿ ಕೊಡ್‌ತಲ್ಲಿ ಸುಖತ್‌ಲ್ ಬದ್‌ಕಿಯಂಡಿಂಜತ್.

ಒರ್ ದಿನ ಈ ಮೂಂದ್ ತಂಗೆಯಳೂ ಅಯಿಂಡಯಿಂಡ ವಡಿಯಂಡ ಮೀದ ಚೆಡಿಂಜಂಡ್, ತಾಮನೆಕ್ ಪೊರ್‌ಟತ್! ಬಟ್ಟೆಲ್ ಮೂಂದಾಳೂ ನೀಡ ವಡಿಯಂಡ ಮೀದ ನೀಕೆನ್ನಾಂಗ್ ಚೆಡಿಂ ದ್ ಕೇಟತ್. ಎಲ್ಲಾಂಡ ಒರೇ ಕಾರಣ - ನಾಡ ವಡಿಯಂಗ್ ನಾಡ ಮೀದ ಉದಾಸೀನ, ನನ್ನ ಚಾಯಿಲ್ ನೋಟಿಯವು ಲೇಂದ್! ಮೂಂದಾಳೂ ತಾಮನೆಕ್ ಪೊರ್‌ಟತ್.

ಬಟ್ಟೆಲ್ ಪೋಯಂಡಿಂಜಲ್ಲಿ, ಅಣ್ಣ ಬೇಲ್‌ಲ್ ಪಣಿ ಕೆಜ್ಜಂಡಿಂಜತ್. ಅವಂಗ್ ತಂಗೆಯಳ ಕಾಂಬಂಜಿ ಆಶ್ಚರ್ಯ! ಎನ್ನಾಂಗ್ ಬಂದಿರಾ... ಎಂತ ಸಂಗತೀಂದ್ ಅಣ್ಣ ಕೇಟತ್. "ನಂಗ ನಂಗಡ ವಡಿಯಂಡ ಮೀದ ಚೆಡಿಂಜಂಡ್ ಬಂದಿತ್" ಮೂಂದಾಳೂ ಎಣ್ಣ್ ಚಿ.

ಅಲ್ಲಾ... ದೇವಡನ್ನತ ಬಾವಂಗ, ಇಯಂಗ ಎನ್ನಾಂಗ್ ಅಯಿಂಡ ಮೀದ ಚೆಡಿ ಮಾಡಂಡಿಯೇಂದ್ ಅಣ್ಣಂಗ್ ಸಂಶಯ ಬಂದಿತ್, ಬುಡ್‌ತಿತ್ ಕೇಟತ್.

ವೆರಿಯವ ಎಣ್ಣ್ ಚಿ - ಅಣ್ಣಾ..., ನಂಗ ವಡಿಯನೂ, ಪೊಣ್ಣೂ ಎಕ್ಕಾಲೂ ಉಂಡಿತಾನ ಪಿಂಞ ಬುದ್ಧವಕ ಪಾಲ್ ಕುಡ್‌ಚಿತ್ ಬಾಳೆ ಪಣ್ಣ್ ತಿಂಬ. ಒರ್ ದಿನಾಚೀಂಗಿಯೂ ನಾಡ ವಡಿಯ 'ಬಾಳೆಪಣ್ಣ್ ತಿಂದ ಪಿಂಞ ಪಣ್ಣ್ ತಿಂದಿತ್ ಬಾಯಿನೊಂಬಲ ಆಚಾಂದ್ ಕೇಪದೇ ಇಲ್ಲೆ. ಅಚ್ಚಕ್ ಉದಾಸೀನ ನಾಡ ಮೀದ... ಆಂಗ್ ಚೆಡಿಂಜಂಡ್ ಬಂದ್‌ಟ".

ದಂಡನೇರವ ಎಣ್ಣ್ ಚಿ "ಅಣ್ಣಾ, ನಾನೂ, ನಾಡ ವಡಿಯನೂ ಎಕ್ಕಾಲೂ ಬೈಟಾಪಕ ಪೊರ್‌ಮೆ ತಿರ್‌ಗಾಡ್‌ವಕ್ ಪೋಪ..; ನಂಗ ನೇರಪಣ್ಣ್ ಮರತ್‌ರಡಿಲ್ ಅಳ್‌ತಿತಿಪ್ಪ..., ಅಕ್ಕ ಓರಮ್ಮ ನೇರಪಣ್ಣ್ ನಾಡ ಮಡ್‌ಕ್ ಬೂವ..., ಒರ್ ದಿನಾಚೀಂಗಿಯೂ ನಾಡ ವಡಿಯ ನನ್ನ ತೊಡೆ ನೊಂಬಲ ಆಚಾಂದ್ ಕೇಪದೇ ಇಲ್ಲೆ..., ಅದ್‌ಂಗ್ ಚೆಡಿಂಜಂಡ್ ಬಂದ!"

ಎಳಿಯವ ಎಣ್ಣೆಚಿ - "ನಾಡ ವಡಿಯ ಎಕ್ಕಾಲೂ ಮಲ್ಲಿಗೆ ಪೂವ್ ಎಡ್ತ ಬಂದಿತ್ ತಪ್ಪ...; ನಾನ್ ಪೂವ್‌ನ ಎಕ್ಕಾಲೂ ಚೂಡಿಯೋವಿ...; ಆಚೇಂಗಿ, ಒರ್ ದಿನಾಚೇಂಗಿಯೂ ನನ್ನ "ರಾಣೀ... ನೀಕ್ ಮಲ್ಲಿಗೆ ಪೂವ್‌ರ ಗಮನಕ್ ಮಂಡೆನೊಂಬಲ ಆಯಂಡುಂಡಾಂದ್ ಕೇಟಿತೇ ಇಲ್ಲೆ.. ನಾಡ ವಡಿಯಂಗ್ ಅಚ್ಚಕೋರ್ ಉದಾಸೀನ. ಅದ್‌ಂಗೇ ನಾನ್ ಚೆಡಿಂಜಂಡ್ ಬಂದಿಯೆ!"

ತಂಗೆಯಡ ತಕ್ಕ್ ಕೇಟಿತ್ ಅಣ್ಣ ಮಂಡೆ ತಿರಿತ್ ಅಡಿಕ್ ಬೂವದೊಂದೇ ಬಾಕಿ...! ಮೇಲೆಲ್ಲಾ ಬೆವರ್‌ಚಿ. ಹೇಂ... ವಡಿಯಂಗಡ ಪ್ರೀತಿನ ಅರಿಯತ ಹಲ್‌ಕಿಯಳೇ... ನಿಂಗಕ್ ನಾನ್ ಪಾಠ ಪಡಿಪ್‌ಚಿಡ್‌ವೀಂದ್ ಮನಸ್ಸೆಲೇ ಗೇನ ಮಾಡಿಯಂಡತ್.

ಅಂವೊ ತಂಗೆಯಕ್ ಎಣ್ಣೆಚಿ - "ಅಕ್ಕುವಾ..., ಇಲ್ಲಿ ನೋಟೀ... ನಾನ್ ಒಬ್ಬನೇ ಈ ಬೇಲೆಲ್ ಪಣಿ ಕೆಜ್ಜಂಡುಳ್ಳೊ, ಎನ್ನಾಚೇಂಗಿಯೂ ನಿಂಗಕೂ ಪಣಿ ಇಲ್ಲೆ...; ನಿಂಗಲೂ ಚೆನ್ನ ಚೆನ್ನ ಕೆಜ್ಜತೇಂಗಿ ನಾಕ್ ಸುಲಭ ಆಪಾ"ಂದ್ ಅಣ್ಣ ಅಯಿಂಗಳ ಬೇಲೆಪಣಿಕ್ ಕೂಟಿಯಂಡತ್. ವಿಧಿ ಇಲ್ಲತೆ ಅವು ಮೂಂದಾಳೂ ಪಣಿಕ್‌ಳಿಂಜತ್. ಒರ್ ಗಳಿಗೇಲ್ ಅಯಿಂಡ ಕೈ ಚೋಂದಿತೇ ಆಚಿ. ಬೆವರ್ ಬಾತ್, ಗುಳ್ಳೆ ಬಾತ್, ಚೋರೆ ಬಾತ್. ಕಯ್ಯತಾಚಿ...! ಅಂದಕಲೂ, ಸದ್ವ್ ಮಾಡತೆ ಪಣಿ ಕೆಜ್ಜತ್! ಬೈಟಾಪಕ ಎಲ್ಲಾ ಮನೆಕ್ ಪೋಚಿ.

ಅಣ್ಣ ಎಣ್ಣೆಚಿ - "ಎಚ್ಚಕೋ ಸಮಯತಿಂಜ ನಾನೊಬ್ಬನೇ ಪಣಿ ಕೆಜ್ಜಂಡೂ, ತಿಂದಂಡೂ ಮದಿಯಾಯಿತ್. ಇಂದ್ ನಿಂಗ ಮಾಡೀಂದ್ ಓರೊಬ್ಬಕ್ ಓರೊಂದ್ ಪಣಿ ಎಣ್ಣೆಚಿ. ಸೆರಿ ಮೂಂದಾಳೂ ಅಡಿಗೇ ಪಣಿನೋ ಕೆಜ್ಜತ್. ಪಟ್ಟಿ, ಮನೆನೋ ಒಡ್‌ಕ್‌ಚಿ. ನೀರ್ ಕೊಂಡ ಬಾತ್, ಪಾತ್ರ ಕತ್ತಾಚಿ, ಕೊಟ್ಪಲಿಂಜ ಚಾಣ ಬಲಿಚತ್, ಬಟ್ಟೆ ಒಲಿಚತ್! ಮೂಂದಾಳೂ ವಡಿಯಂಡ ಮನೆಲ್ ಈ ಪಣಿ ಒನ್ನಾಂದೂ ಮಾಡ್‌ತಿಂಜಿಲೆ. ಅಡಿಗೇ ಮಾಡಿತ್ ಕೈಬಾಯಿ ಚುಟ್ಟಂಡತ್. ಒಲೆ ಉರ್‌ಪ್‌ಚಿ, ಕಣ್ಣಲ್ ನೀರ್ ಬಾತ್, ಮೂಕ್‌ಲ್ ಚಾರ್ ಬಾತ್... ಕೆಮ್ಮ ಬಾತ್, ಮೊರೆಯೂ ಬಾತ್!

ಅಂದಕಲೂ ಸದ್ದಿಲ್ಲತೆ, ಅಡಿಗೇ ಮಾಡಿತ್ ಉಂಡಿತ್ ಬುದ್ದಂಡತ್. ಅಣ್ಣಂಡ ಮನೆಲ್ ಬುದ್ದವಕ್ ಮೆತ್ತೆ ಇಲ್ಲೆ! ಮೂಂದಾಳೂ ಬೊರೀ ನೆಲತೇ ಉರ್‌ಂಡ್‌ಚಿ. ಪಣಿ ಕೆಜ್ಜದಲ್ಲಾ... ಬುದ್ದಂಡನ್ನೆಕೆ ವರ್‌ಕ್ ಬಾತ್! ಇಪ್ಪರ ಅಣ್ಣಂಗ್ ವರ್‌ಕೇ ಇಲ್ಲೆ. ನಾಡ ತಂಗೆಯ ದೇವಡನ್ನತ ವಡಿಯಂಗಳ ಬುಟ್ಟಿತ್ ಬಂತಲ್ಲಾ... ಇಯಂಗೆಲ್ಲಾ ಭೂಮಿಕ್ ಭಾರ. ಎನ್ನಾಚೇಂಗಿ ಮಾಡಿತ್ ಚೆನ್ನ ದಿನ ತಡ್‌ತಂಡ್

ಉರ್‌ಟಿ, ಪಣೆ ಕೆಯ್ಚಿಡೆಂಡು...; ಅಲ್ಲಿಂಜ ತಾನೇ ತಾನಾಯಿತ್ ಬುದ್ಧಿ ಬಪ್ಪಾಂದ್ ಅಣ್ಣ ಗೇನ ಮಾಡ್‌ಚಿ! ಗೇನ ಮಾಡಿ ಮಾಡಿ ಪೊಲ್‌ಂದತ್. ಅಕ್ಕ ಅವಂಗ್ ವರ್‌ಕ್ ಬಾತ್. ಅಪ್ಪರ ತಂಗೆಯ ಮೂಂದಾಳೂ ಪೊಲಾಕ ಏವಂಜ ಆಯಿಂಡಯಿಂಡ ವಡಿಯನ ಗೇನ ಮಾಡ್‌ಚಿ. ಆಪಾಟಿ ಸುಖಿತ್‌ರ ಬದ್‌ಕ್‌ನ ಬುಟ್ಟಿತ್ ಇಲ್ಲಿಕ್ ಬಾತಲ್ಪಾಂದ್ ಬೇರ್‌ಚಿಟ್ಟತ್. ದೇವಡನ್ನತ ವಡಿಯನ ನಂಗ ಅರ್ಥ್ ಮಾಡಿಯಂಡ್ ತಿಲ್ಲೆಲ್ಲಾ... ಇಂಇಂ ಮಿಂಇಂ ಅರಿಂಜಂಡ್ ಬದ್‌ಕನಾಂದ್ ಅಣ್ಣಂಗೂ ಎಣ್ಣೆ ತೆ, ಎಲ್ಲಾರೂ ಅಲ್ಲಿಂಜ ಜಾಗ ಬುಟ್ಟಿತ್!

*

*

*

ಚೀಂಚಟ್ಟಿರ ಮೋಂವೊ

ಹರಿಹರ ನಾಡ್‌ಲ್ ಚಿನ್ನೊಂದ್ ಒಬ್ಬೊ ಇಂಜತ್, ಮಾತ್‌ಮಲ್ಲ, ಚುರ್‌ಕ್ ಬುದ್ಧಿರಂವೊ. ಅವಂಡ ಮನೆರ ಪಕ್ಕ ಒರ್ ಪಣಕಾರ ಇಂಜತ್. ಪೆರ್ತ್ ಜೀನೆ. ಅವಂಗ್ ತಾಂಡ ಪಕ್ಕ ಉಳ್ಳ ಎಂತೇಂಗಿ ಒರ್ ಸಾಮಾನ್‌ನ ಇಂಇಂಚೊಬ್ಬಂಗ್ ಕೊಡ್‌ಪೊ ಎಣ್ಣೆ ಚೀಂಚಿ ಭಯಂಕರ ಸಂಗಟ! ಒರ್ ಸಮಯ ಕೊಡ್‌ತಕಲೂ, ಅದ್‌ಂಗ್ ಬದ್‌ಲಾಯಿತ್ ಬೋರೆ ಎಂತಾಚೀಂಚಿಯೂ ವಸೂಲ್ ಮಾಡಿಯಂ ಡಿಂಜತ್. ಇವಂಗೋರ್ ದಿನ ಬುದ್ಧಿ ಪಡ್‌ಪಾಚಿಡ್‌ವೀಂದ್ ಮಾತ್‌ಮಲ್ಲ ಚಿನ್ನು ಗೇನ ಮಾಡ್‌ಚಿ. ಅನ್ನತೋರ್ ದಿನ ಬಾತ್.

ಒರ್ ದಿನ ಚಿನ್ನು ಪಣಕಾರಂಡಲ್ಲಿಕ್ ಪೋಚಿ. ಚಿನ್ನುಕ್ ಅವಂಡ ಮನೆಲ್ ಬೆಂದ್‌ಕ ಬಂದಿತಿಂಜಾನಗುಂಡ್, ಅವಂಗ್ ಒರ್ ಚೀಂಚಟ್ಟಿ ಬೋಂಡಿಂಜತ್. ಪಣಕಾರ ಚಿನ್ನುಕ್ ಮನಸ್ಸಿಲ್ಲತ ಮನಸ್ಸಲ್ ಒರ್ ಬಲ್ಯ ಚೀಂಚಟ್ಟಿ ಕೊಡ್‌ತತ್.

ಬೆಂದ್‌ಕೆಲ್ಲಾ ಪೋನ ಪಿಂಇ ಚಿನ್ನು, ಪಣಕಾರಂಡ ಮನೆಕ್ ಪೋಚಿ. ನೀಕ್ “ಅಭಿನಂದನೆ”ಂದ್ ಪಣಕಾರಂಗ್ ಎಣ್ಣೆ ಚಿ. “ಎನ್ನೆಂಗಾಯಿತ್”ಂದ್ ಚಿನ್ನುನ ಕೇಟತ್. ಚಿನ್ನು ಎಣ್ಣೆ ಚಿ - “ನಿಂಗಡ ಚೀಂಚಟ್ಟಿಕ್ ಒರ್ ಕಣ್ಣು ಕುಂಇಂ ಪುಟ್ಟಿತ್”.

“ಕಣ್ಣು ಕುಂಇಂ... ಚೀಂಚಟ್ಟಿಕ್... ಅದೆನ್ನೆನೆ?!” ಪಣಕಾರ ಆಶ್ಚರ್ಯತ್ ಕೇಟತ್.

“ನಿಂಗಳೇ ಕಣ್ಣಾರೆ ನೋಟೀ”ಂದ್ ಚಿನ್ನು ಬ್ಯಾಗ್‌ಲಿಂಜ ಚೆರಿಯೋರ್ ಚೀಂಚಟ್ಟಿನ ಎಡ್‌ತ್ ಕೊಡ್‌ತತ್! ಪಣಕಾರ ಗೇನ ಮಾಡ್‌ಚಿ “ಇಂವೊ ಒರ್

ಅಡ್ಡೀಮುಟ್ಟಾಳ... ಚೀಂಚಟ್ಟಿ ಪೆತ್ತಿತ್ತೇಂದ್ ಎಣ್ಣುವಲ್ಲಾ..., ಇರಡ್... ಒರ್ ಚೀಂಚಟ್ಟಿ ಪುಕ್ಕಟ್ಟೆ ಕ್ಕಟ್ಟ್ವನಕಾಚೇಂದ್" ಕುಸಿಪಟ್ಟಿತ್ ಮುಂಡತಾಚಿ. ಚಿನ್ನು ಚೀಂಚಟ್ಟಿನ ಕೊಡ್ತಿತ್ "ನಿಂಗಡ ಈ ಚಟ್ಟಿರ ಮೋಂವೊನ ಚಾಯಿಲ್ ನೋಟಯೋಳಿ"ಂದ್ ಪೋಚಿ. ಪಣಕಾರ ಚಟ್ಟಿನ ಎಡ್ತ್ ಬೆಚ್ಚಂಡತ್.

ಇದ್ ಕಯಿಂಜಿತ್ ಚೆನ್ನದಿನ ಆನದು, ಚಿನ್ನು ಪಣಕಾರಂಡಲ್ಲಿಕ್ ಬಾತ್. ಅಂವೊ ಪೆರ್ತ್ ಬೇಚಾರತ್ ಇಂಜತ್! ಕಣ್ಣ್ಲೋ ನೀರ್ ದುಂಬಿತಿಂಜತ್. ಪಣಕಾರಂಡ ಪಕ್ಕ ಅಳಾತಂಡ್ ಜೋರ್ಲಾ ಮೊರ್ಡಾವ ಕೂಡ್ಚಿ. ಪಣಕಾರ ಆಶ್ಚರ್ಯತ್ ಎಂತಾಚೇಂದ್ ಕೇಟಿತ್ ಸಮಾಧಾನ ಮಾಡ್ಚಿ. "ಒರ್ ಕೆಟ್ಟಿ ಸುದ್ದಿ... ಎನ್ನನೆ ನಿಂಗಕ್ ಎಣ್ಣಡ್"ಂದ್ ಚಿನ್ನು ದುಃಖ್ಚಿಟ್ಟಿತ್! ಪಣಕಾರ ಎಂತ ಅದೇಂದ್ ಆತುರತ್ ಕೇಟಿತ್.

"ಎಂತ ಎಣ್ಣಡ್..., ನಿನ್ನಾಂದ್ ಬೈಟ್ ಆ ಬಲ್ಯ ಚೀಂಚಟ್ಟಿ ಇಂಜತಲ್ಲಾ..., ಆದ್ ಚತ್ಪೋಚಿ"ಂದ್ ಎಣ್ಣೆಯಂಡ್ ಚಿನ್ನು ಜೋರ್ಲಾ ಮೊರ್ಟತ್. ಕೂಡೆನ್ನೆ ಪಣಕಾರ "ನೀನೆಂತ ಎಣ್ಣೆಯಂಡುಳ್ಳಿಯಾ? ಜೀಂವ ಇಲ್ಲತ ಚೀಂಚಟ್ಟಿ ಎಲ್ಲೆಂಗಿ ಚಾವಾ?! ಅರ್ಥ ಇಲ್ಲತ ತಕ್ಕ ಪರಂದಂಡುಳ್ಳಿಯಲ್ಲಾ...?!"

"ಇಲ್ಲೆ ಪಿಂಞ... ಜೀಂವ ಇಲ್ಲತ ಚೀಂಚಟ್ಟಿ ಒರ್ ಕ್ಕಣ್ಣಕುಂಞಿನ ಪೆರುವಲೋ...; ಅನ್ನನಿಂಜ ಪಿಂಞ ಅದೆನ್ನಾಂಗ್ ಚಾವುಲೆ?!" ಚಿನ್ನು ತರ್ಕ ಮಾಡ್ಚಿ! ಪಣಕಾರಂಡ ಸದ್ ಅಡ್ಂಗ್ಚಿ. ಒಂದೂ ಎಣ್ಣತೆ ಅಂವೊ ಒಳ್ಕೆದ್ ಪೋಚಿ. ಇಪ್ಪರ ಚಿನ್ನು ಒರ್ ಬಲ್ಯ ಚೀಂಚಟ್ಟಿನ ತಾಂಡದಾಕಿಯಂಡ ಕುಸೀಲ್ ಮನೆಕ್ ಪೋಚಿ!

*

*

*

ತಿರಾನ ಬಾಣ

ವಜ್ರಪುರ ಎಣ್ಣುವ ರಾಜ್ಯತಾರ ರಾಜ ವಜ್ರಾನಂದ. ಈ ಆಸಾಮಿಕ್ ಚೆನ್ನಂಗ್ ವಿಚಿತ್ರಕಳಿ ಇಂಜತ್! ಎಂತೇಂಗೆಲ್ಲಾ ಎಣ್ಣೆತ್ ಜನಳ ಬೊತ್ಚಿಡ್ವೊ... ಜನಳ ಕೀಟಲೆ ಮಾಡ್ವೋ... ಇನ್ನೆಲ್ಲಾ.

ಒಮ್ಮೆ ಇನ್ನನೆ ರಾಜ ಸಭೆಲ್ ಇಪ್ಪಕ "ನಾಡ ವಜ್ರತಾರ ಮೊಯಿರ ಕಾಂಗತಾಯಿತ್. ಅದೇ ನಾಡ ಜೀಂವ...! ಅದಾನ ತೇಡಿತ್ ಎಡ್ತ ಬಂದಿತ್ ತಂದಯಿಂಗಕ್ ನಾಡ ಮೋವಳ ಮಂಗಲ ಕಯಿಚಿ ತಪ್ಪಿ"ಂದೆಣ್ಣ್ಚಿ.

ರಾಜಂಡ ಆಜ್ಞೆ ಕೇಟಿತ್ ಮಂತ್ರಿಯ ಬೇಜಾರ್‌ಪಟ್ಟತ್. ರಾಜ ಆ ವಜ್ರತ್‌ರ ಮೊಯಿರತ್‌ನ ಪ್ರಾಣತ್‌ರನ್ನನೆ ಕಾಪಾಡಿಯಂಡಿಂಜತ್. ಈ ವಿಷಯ ಗೊತ್ತಾನ ವಜ್ರಪುರತ್‌ರ ಜನ ತೀರಾ ವಜ್ರಾನಂದಂಡ ವಜ್ರತ್‌ರ ಮೊಯಿರತ್‌ನ ತೇಡುವ ಕೂಡ್‌ಚಿ. ಆಚೇಂಗಿ, ನೇರಾಯಿತೂ ರಾಜಂಡ ಮೊಯಿರ ಕಾಂಗತಾಯಿತಿಂಜಿಲೆ. ಜನಳ ಕೀಟಲೆ ಮಾಡುವಕ್ ರಾಜ ಮುಂಡಮುಂಡತೆ ಆಜ್ಞೆ ಪೊರಡ್‌ಚಿಟ್ಪ್‌ತಿಂಜತ್! ಪ್ರಜೆಯಳ, ಮಂತ್ರಿಯಳೆಲ್ಲಾ ಮುಟ್ಟಾಳನಾಯಿತ್ ಮಾಡಂಡೂಂದ್ ರಾಜಂಡ ಉದ್ದೇಶ!

ಇನ್ನನೆ ಇಪ್ಪಕ, ಒರ್ ದಿನ ರಾಜನೂ, ರಾಣಿಯೂ ಪೂತೋಟತ್ ಆರಾಮ್‌ಲ್ ಇಂಜತ್. ರಾಣಿ ರಾಜನ ಕೇಟಿತ್ - "ಅಲ್ಲಾ... ಇನ್ನಾಚೇಂಗಿಯೂ, ಮಂತ್ರಿಯಕ್, ಜನಕ್ ನೇರಾನ ವಿಷಯ ಎಣ್ಣೆರಿ. ನಿಂಗಡ ತಲೆಮೆತ್ತೆರ ಅಡಿಲುಳ್ಳ ಆ ಮೊಯಿರಕಾಯಿತ್ ಮುಂಡತೆ ಎನ್ನಾಂಗ್ ಅಯಿಂಗಳೆಲ್ಲಾ ತೇಡ್‌ಚಿಡ್‌ವೊ!" ರಾಣಿರ ತಕ್ಕಕ್ ರಾಜ ಜವಾಬ್ ಕೊಡ್‌ಕತೆ ಮುಂಡತಾಚಿ! ಆಚೇಂಗಿ, ಈ ತಕ್ಕನೆಲ್ಲಾ ಪೂಪಾತಿರ ಪಕ್ಕಲ್ ಕಳೆ ಬಲಿಚಂಡಿಂಜ ಸಖಿ ಒಬ್ಬ ಕೇಟಂಡತ್. ಇದೇ ನಲ್ಲ ಸಂದರ್ಭ... ಎನ್ನನಾಚೇಂಗಿಯೂ ಮಾಡಿತ್ ತಲೆಮೆತ್ತೆ ರಡಿಂಜ ಆ ಮೊಯಿರತ್‌ನ ಪಾರಿಚಿಡಂಡು. ಅದ್‌ನ ನಾಡ ಸೋಮಾರಿ ಮೋಂವಂಡ ಕೈಲ್ ರಾಜಂಗ್ ಕೊಡ್‌ತಕ ಸುಲಭತ್ ರಾಜಕುಮಾರಿನ ಮಂಗಲ ಕಯಿಚಿಲೂಂದ್ ಆ ಸಖಿ ಗೇನ ಮಾಡ್‌ಚಿ!

ಪಿತ್ಯಾಂದ್ ರಾಜಂಡ ಕೋಂಬರೆನ ಒಡ್‌ಕ್‌ವಕ, ಸಖಿ ಆ ಮೊಯಿರತ್‌ನ ಎಡ್‌ತಂಡ್, ಮೋಂವಂಗ್ ಕೊಡ್‌ತತ್. ವಜ್ರಾನಂದ ಬೈಟ್ ಬುದ್ಧವಕ ತಲೆಮೆತ್ತಿನ ನೇತಿತ್ ನೋಟ್‌ಚಿ. ಮೊಯಿರ ಇಲ್ಲೆ! ಅವಂಡ ಎದೆ ಧಸಕ್ಕೇಂದ್ ಎಣ್ಣೆಚಿ! ಮೊಯಿರ ಕಾಂಗತಾನಾಂಗ್ ಪೋಡಿಯಾಯಿಲೆ...; ದಾರೇಂಗಿ ಕಳ್ಳ, ಬೊಳ್ಳನೋ ಎಡ್‌ತ ಬಂದಿತ್ ತಂದ್‌ಟಕ, ನಾಡ ಮೋವಳ ಅವಂಗ್ ಮಂಗಲ ಕಯಿಚಿ ಕೊಡ್‌ಕಂಡಿಯಾಕುವಲ್ಲಾಂದ್ ರಾಜಂಗ್ ದಿಗಿಲ್ ಪುಟ್ಪ್‌ಚಿ.

ಪಿತ್ಯಾಂದ್ ಅಂವೊ ಗೇನ ಮಾಡ್‌ನನ್ನನೆ ಆಚಿ. ಸಖಿರ ಸೋಮಾರಿ ಕಳ್ಳ ಮೋಂವೊ ಸಭಕ್ ಮೊಯಿರ ಪುಡಿಚಂಡ್ ಬಾತ್. ರಾಜ ಒಂದೂ ಮಾಡುವ ಕಯ್ಯತೆ ಮೊಯಿರ ಕೇಟಂಡ್ ಮೋವಳ ಮಂಗಲ ಕಯಿಚಿ ಕೊಡ್‌ತತ್. ಅಂದೇಕ್ ಅವಂಡ ವಿಚಿತ್ರ ಬುದ್ಧಿ, ಕೀಟಲೆ ಮಾಡುವೊದ್ ಎಲ್ಲಾ ಆಡಂಗ್‌ಚಿ.



ನೆಯ್ಯಿ - ಪಾಯಿಸ

ಪೆಂಡ್ ಪತ್ತ್‌ಗಟ್ಟ್ ನಾಡ್‌ಲ್ ಒರ್ ವಡಿಯನೂ - ಪೊಣ್ಣೂ ಇಂಜತ್. ವಡಿಯಂಡ ಪೆದ ಗೊಡ್ಡಂದ್, ಪೊಣ್ಣಾರ ಪೆದ ಮುಡ್ಡಿಲೆಂದ್! ಅಯಿಂಗ ದಂಡಾಳ್‌ಕೂ ಅಯಿಂಗಡ ಪೆದತ್‌ರ ಮೀದ ಒರಿಚ್ಚಿಕ್ಕೂ ಕುಸಿ ಇಂಜಲ್. ಅದ್‌ಂಗ್ ಅಯಿಂಗ ದಂಡಾಳ್‌ಕೂ ತಂಗಡ ಪೆದತ್‌ನ ಮಾತಿಯಂಡತ್. ವಡಿಯ ಪೊಣ್ಣಾಕ್ 'ಪಾಯಿಸ'ಂದ್ ಪೆದ ಬೆಚ್ಚತ್! ಪೊಣ್ಣಾ ವಡಿಯನ 'ನೆಯ್ಯಿ'ಂದ್ ಕಾಕ್‌ಚಿ! ಇದ್‌ನುಂಡ್ ಅಯಿಂಗಕ್ ಕುಸಿ ಆಚಿ.

ವಡಿಯ ಎಕ್ಕಲೂ ಪೊರಮೆ ಪೋಪಕ "ಪಾಯಿಸಾ... ನಾ ಪೋಯಿತ್ ಬಪ್ಪಿಲೆಂದೂ; ಪಾಯಿಸ ಕೊಡೆ ಎಡ್‌ತ ಬಾಂದೂ; ಪಾಯಿಸ ಕೂಳ್‌ಡ್‌ಲೆಂದೂ" ಎಣ್ಣು ಪಯಿಂಜತ್! ಪೊಣ್ಣಾ ಅಚ್ಚಿಕೇ... "ನೆಯ್ಯಿ... ಉಂಬಕ್ ಬಾಂದೂ, ನೆಯ್ಯಿ ಕರಿಕ್ ತರಕಾರಿ ಎಡ್‌ತ ಬಾ"ಂದೆಲ್ಲ ಎಣ್ಣು ವಯಿಂಜತ್!

ಅಯಿಂಗಕ್ ದಂಡ್ ಎತ್ತ್ ಇಂಜತ್. ಒರ್ ಎತ್ತ್ ಚಾಕಾಳಿಯಾಯಿತ್ ಕೋಲ್‌ಕಡ್ಡಿ ರನೆಕೆ ಇಂಜಾಂಗ್ ಅದ್‌ನ ಅಯಿಂಗ "ಕೋಲ್"ಂದ್ ಕಾಕಿಯಂಡ್ ಇಂಜತ್. ಇಂಇಕೋರ್ ಎತ್ತ್ ಚೆನ್ನ ಕಳ್ಳ. ಉಪ್ಪಕ್ ಪೊರಟಕ ಬಯ್ಯಕ್ ನಿಪ್ಪಯಿಂಜತ್. ಬೈಟಾಪಕ ಎಕ್ಕಲೂ ಪಕ್ಕತ್ ಮನೆಕಾರಡ ಕೊಟ್ಟಕ್ ಪೋಯಿತ್ ಕೂಡಿಯಂಡ್ ಇಪ್ಪಯಿಂಜತ್. ಅದ್‌ಂಗ್ "ನೆಯ್ಯಿ" ಬಾರಿ ಬೆಂದ್‌ಕಳೆಂದ್ ತಮಾಸಿ ಮಾಡಿಯಂಡ್ ಆಟಿಯಂಡ್ ಬಪ್ಪಯಿಂಜತ್. ಅನ್ನನಾಯಿತ್ ಆ ಎತ್ತ್‌ಕ್ "ಬೆಂದ್‌ಕ"ಂದೇ ಪೆದ ಕಡ್‌ಚಿತಿಂಜತ್! ಇನ್ನನೆ ಆ ಮನೆಲಿಂಜ ನಾಲಾಳ್‌ಕೂ ಪೆದ ಬದ್‌ಲ್ ಮಾಡಿಯಂಡ್‌ತಿಂಜತ್.

ಇನ್ನನೆ ಇಪ್ಪಕ, ಒರ್ ದಿನ ಇಯಂಡ ಮನೆಕ್ ಒರ್ ದೂರತ ಬೆಂದ್‌ಕ ಬಾತ್. ಬೆಂದ್‌ಕ ಬೇಲ್ ಬಟ್ಟೆಕಾಲೆ ಬಂದಂಡಿಪ್ಪಕ 'ನೆಯ್ಯಿ' ಬೇಲ್‌ಲ್ ಉತ್ತಂಡಿಂಜತ್. ಬೆಂದ್‌ಕ ನೆಯ್ಯಿರ ಕೂಡೆ ತಕ್ಕ ಪರ್‌ಂದಂಡ್ ಅಳ್‌ತತ್. ಅನ್ನನೇ ಮಜ್ಜಣಾಚಿ. ನೆಯ್ಯಿ ಬೆಂದ್‌ಕಕ್ ಎಣ್ಣಾಚಿ - "ಬೆಂದ್‌ಕಳೇ, ನಿಂಗ ಮನೆಕ್ ಪೋಯಿ... ಉಂಬ ನೇರಾಚಲ್ಲಾ..., ಮನೆಲ್ 'ಪಾಯಿಸ' ಉಂಡ್; ನಿಂಗಲ ಉಂಬ್‌ಚಿಡ್‌ವ... ನಾನ್ ಒರ್ ಗಳಿಗೆ ಕಯಿಂಜದು ಬಪ್ಪಿ."

"ಸೆರೀ"ಂದ್, ಬೆಂದ್‌ಕ ಪಾಯಿಸ ತಿಂಬ ಗೇನತೇ ಮನೆಕ್ ಬಾತ್. ಮನೆಲ್ ಪಾಯಿಸ (ಪೊಣ್ಣಾ) ಬೆಂದ್‌ಕಳ ಉಂಬಕ್ ಅಳ್‌ಪ್‌ಚಿಟ್ಟಿತ್... ಕೇಟತ್ - "ಇಕ್ಕಲೇ ಉಂಬಿರಾ..., ಅಲ್ಲಾ ನೆಯ್ಯಿ ಬಂದಿತಾಡಾ?" ಈ ಪುದಿಯ ಪೆದತ್‌ರ ಅರಿವು

ಇಲ್ಲತ ಬೆಂದ್‌ಕ ಗೇನ ಮಾಡ್‌ಚಿ "ಆಹಾ... ಪಾಯಿಸ್‌ತರ ಕೂಡ ನೆಯ್ಯಿ ಉಂಡೇಂಗಿ ಇಂಞೂ ರಸಾ"ಂದ್ ನೆಯ್ಯಿ ಬಂದ ಪಿಂಞ ಉಂಬೀಂದೆಣ್ಣೆಚಿ! "ಸೆರೀ"ಂದ್ ಪಾಯಿಸ ಮುಂಡತಾಚಿ.

ಸುಮಾರ್ ನೇರ ಕಯಿಂಜ ಪಿಂಞ ಬೇಲ್‌ಲಿಂಜ ನೆಯ್ಯಿ ಎತ್ತ್ ಕಯಿಪಂಜಿ ಮನೆಕ್ ಆಟಿಯಂಡ್ ಬಾತ್. ಅಕ್ಕಣೆ 'ಕೋಲ್'ಂದೆಣ್ಣುವ ಎತ್ತ್ ತಪ್ಪಚಿಟ್ಟಿಂಡ್ ತೋಟಕ್ ಓಡಿರ್‌ತ್. ಇಂಞೋರ್ ಎತ್ತ್ ಬೆಂದ್‌ಕನ ಪುಡಿಚಂಡ್ ಅಂವೊ ಪೊಣ್ಣೆನ ಕಾಕ್... "ಬೆಂದ್‌ಕ ಇಲ್ಲಿ ಉಂಡ್... ಅದ್‌ನ ಕೆಟ್ಟಿತ್‌ಡ್... ನಾ ಪೋಯಿತ್ 'ಕೋಲ್'ನ ತೇಡಿಯಂಡ್ ಬಪ್ಪಿ... ತೋಟತ್‌ಲ್ ಉಂಡ್ ಕಾಂಬಾ"ಂದ್ ನೆಯ್ಯಿ ಪಟ್ಟಿಂಜ ಕೂತ್ ಇಟ್ಟಿತ್ ಪೋಚಿ.

ಒಳ್‌ಲ್ ಮನೆಕ್ ಬಂದಿತಿಂಜ ಬೆಂದ್‌ಕಕ್ ಪೋಡಿ ಪುಟ್ಚಿ! ಚೆನ್ನಂಗ್ ಸಂಶಯವೂ ಬಾತ್! "ಬೆಂದ್‌ಕಳ ಕೆಟ್ಟಿತಿಡ್... ಕೋಲ್ ತೇಡಿಯಂಡ್ ಬಪ್ಪಿಂವ್ ಎಣ್ಣೆಚಿಲ್ಲಾ..., ಇಕ್ಕ ಮನೆಕ್ ಬಂದ ಬೆಂದ್‌ಕ ನಾನೇ..., ಆಯ್ಯೋಯ್ಯೋ... ಇವ ಇಕ್ಕ ನನ್ನ ಕೆಟ್ಟಿತಿಡುವ. ಅಂವೊ ಕೋಲ್ ತೇಡಿಯಂಡ್ ಬಪ್ಪ. ದಂಡಾಳೂ ಕೂಡಿಯಂಡ್ ನಾಡ ಬೆನ್ನ ಪೊಳಿಪ" ಇನ್ನೆಲ್ಲಾ ಈ ಬೆಂದ್‌ಕ ಮನಸ್ಸೆಲೇ ಲೆಕ್ಕ ಇಟ್ಟಿತ್!

ಅಕ್ಕಣೆ ಮನೆರೊಳ್‌ಂಜ ಪಾಯಿಸ ಬೆಂದ್‌ಕ ಎತ್ತ್‌ನ ಕೆಟ್ಟಿತಿಡುವಕ್ ಕೇರ್ ತೇಡಿಯಂಡ್ ಇಂಜತ್. "ಈ ಕೇರ್ ಎಲ್ಲಿಯಾ ಬೆಂದ್‌ಕನ ಕೆಟ್ಟಿತ್‌ಡ್, ಕೋಲ್ ತೇಡಿಯಂಡ್ ಬಪ್ಪಿಂವ್ ಪೋನವು ಎಚ್ಚ ನೇರಪ್ಪಾ..., ಈ ಕೇರ್ ಕಟ್ಟಿತ ಪೋಚೇಂಗಿ ಬೆಂದ್‌ಕ ಓಡಿರ್‌ವ..., ಓ ಕಟ್ಪಚಿ... ಎಚ್ಚಕ್ ತೇಡನಪ್ಪಾ"ಂದ್ ಪರ್ದಾದ್‌ಚಿ!

ಇದ್‌ನ ಕೇಟಿತ್ ಮನೆಕ್ ಬಂದ ಬೆಂದ್‌ಕಕ್ ಗಾಬರಿ ಆಚಿ. "ಇವ ಇಕ್ಕ ನನ್ನ ಕೆಟ್ಟಿತಿಡುವದೇ ಸರಿ. ಬೆರಿಯ ಇಲ್ಲಿಂಜ ಜಾಗ ಖಾಲಿ ಮಾಡುವದೇ ನಲ್ಲದ್... ಅಲ್ಲಾ ನಾನೆಂತ ಮಾಡ್‌ನಪ್ಪಾ ಇಯಂಗಳೇ"ಂದ್ ಅಂವೊ ಕಯ್ಯಾಲೆ ಇಳಿಂಜಿತ್ ಪಟ್ಟಿಕಾಲೇ ಒರೇ ಓಟ್ ಓಡ್‌ಚಿ. ಅಕ್ಕಣೆಕ್ ಒಳ್‌ಲಿಂಜ ಪಾಯಿಸ ಕೇರ್ ಎಡ್‌ತಂಡ್ ಪೊರ್‌ಮೆ ಬಾತ್. ಬೆಂದ್‌ಕ ಓಡ್‌ವದ್ ಕಂಡಿತ್, ಅವ "ಇಂವೊ ಎನ್ನೆಂಗ್ ಓಡಿಯಂಡ್ ಉಳ್ಳೋ"ಂದ್ ಅವಂಡ ಬಯ್ಯೇ ಓಡ್‌ಚಿ. ಓ ಉಂಬಕ್ ನೇರಾನಂಗ್ ಕಾಂಬಾ"ಂದ್ ಪಾಯಿಸ 'ನಿಲ್ಲಿ ನಿಲ್ಲಿ'ಂದ್ ಕೂತ್‌ಟ್ಟಿಂಡ್ ಅವಂಡ ಬಯ್ಯೇ ಓಡ್‌ಚಿ. ಬೆಂದ್‌ಕ ತಿರಿತೊಮ್ಮ ನೋಟ್‌ಚಿ. ಬಯ್ಯಲ್ ಅವ ಕೇರೆಡ್‌ತಂಡ್ ಓಡಿಬಂದಂಜುಳ್ಳಾನ ಕಂಡಿತ್ ಅಂವೊ ಇಂಞೂ ಜೋರ್‌ಲ್

ಓಡ್‌ಚಿ! ಅಕ್ಕಣೆ ಎತ್ತ ತೇಡಿಯಂಡ್ ತೋಟಕ್ ಪೋನ ನೆಯ್ಕಿ ಕೈಯಿಲ್ ಒರ್ ದೊಣ್ಣೆ ಪುಡಿಚಂಡ್ ಬಂದಂಡಿಂಜತ್. ಬೆಂದ್‌ಕಳೂ, ಪೊಣ್ಣೂ ಓಡುವದ್ ಕಂಡಿತ್ ತಾನೂ ಅಯಿಂಡ ಬಯ್ಯ ಓಡುವಕ್ ಸುರು ಮಾಡ್‌ಚಿ. ಅಕ್ಕಣೆ ನೆರೆಕರೆಲಿಂಜ ಜನ, ವಡಿಯನೂ - ಪೊಣ್ಣೂ, ಕೇರ್ ದೊಣ್ಣೆ ಎಡ್‌ತಂಡ್ ಓಡಿಯಂಡಿಂಜಾನ ಕಂಡಿತ್ ಅಯಿಂಗಳೂ “ಓ.... ಕಳ್ಳ ಕಾಂಬಾಂದ್” ಬಯ್ಯ ಓಡುವಕ್ ಸುರು ಮಾಡ್‌ಚಿ! ಮಿಂಞಲ್ ಓಡಿಯಂಡಿಂಜ ಬೆಂದ್‌ಕ ತಿರಿತ್ ನೋಟುವಕ ಜನ ದೊಣ್ಣೆ-ಬಡಿಯ ನೇತಿಯಂಡ್ ಬಪ್ಪಾನ ಕಂಡಿತ್, ಕುಂಡ್ - ಮೊಟ್ಟೆ ನೋಟತೆ ಪಾರಿತ್ ಓಡುವಕ, ಅವಂಡ ಪಂಚೆ ಉತ್ತಿಪೋಚಿ! ಅದ್‌ನೊಂದೂ ಕೂಟಾಕತೆ ಬೆಂದ್‌ಕ ಓಡಿಪೋಯಿತ್ ಕಾಡ್‌ಲ್ ಮರೆಯಾಚಿ! ಓಡಿ - ಓಡಿ ಸುಸ್ತಾನ ಜನ ಎಲ್ಲಾ ಮನೆಕ್ ವಾಪಾಸಾಚಿ! ನೆಯ್ಕಿ ಕೂ - ಪಾಯಿಸಕೂ ಕಡೇಕೂ ಬೆಂದ್‌ಕ ಎನ್ನೊಂಗ್ ಓಡ್‌ನಂದ್ ಗೊತ್ತಾನದೇ ಇಲ್ಲೆ.

*

*

*

ಗಂಡ ಭೇರುಂಡ

ಗಂಡ ಭೇರುಂಡ ಪಕ್ಷಿಕ್ ದಂಡ್ ಮಂಡೆ ಇಪ್ಪಲೊ! ಈ ದಂಡ್ ಮಂಡೆಯಕ್ ಅಕ್ಕಕ್ಕ ಜಗಳ ಆಯಂಡಿಂಜತ್. ನಾನ್ ಮೇಲ್ - ತಾನ್ ಮೇಲ್‌ಂದ್ ಮಂಡೆಯ ದಿನಾ ಪಿರಿಪಿರಿಂದೆಣ್ಣಿಯಂಡಿಂಜತ್.

ಇನ್ನನೆ ಇಪ್ಪಕ, ಒರ್ ದಿನ ಈ ಪಕ್ಷಿ ಒರ್ ಮಾಂಗೆ ಮರತ್‌ಲ್ ಅಳತಿ ತಿಂಜತ್. ಬಲ್‌ತ ಬರಿರ ಮಂಡೆ ಪಕ್ಕತ್‌ಲೇ ಇಂಜ ಒರ್ ಪಣ್ಣ್ ಮಾಂಗಿನ ತಿಂದತ್. ಎಡ್‌ತ ಬರಿ ಇಂಜ ಮಂಡೆಕ್ ಭಯಂಕರ ಚೆಡಿ ಬಾತ್.

“ಹೇಂ... ಆಂಡ ಚೊಕ್ಕೇ... ನಾಡ ಮೀದ ಏಕ್‌ದೂರ್ ಮಾಡಿಯಂಡ್, ನಾಕ್ ಚೆನ್ನಂಗೂ ತರತೆ, ತಾನೇ ಪಣ್ಣ್ ತೇರಾ ತಿಂದಂಡ್ ಉಂಡ್... ಎಕ್ಕಾಲೂ ಇವಂಗ್ ನನ್ನ ಕಂಡಕ ಆಪುಲೆ... ಇದ್‌ಂಗ್ ಎನ್ನಾಚೇಂಗೊಂದ್ ಮಾಡಂಡೂಂದ್ ತೀರ್ಮಾನ ಮಾಡ್‌ಚಿ.

ಉಪಾಯತ್ ನಂಗಡ ತಡಿನೇ ಕೊಂದತೇಂಗಿ ಇದೂ ಚಾವಾ..., ನಾಡ ಹಲವೂ ಗೆಲ್ಲುವಾಂದ್ ಗೇನ ಮಾಡ್‌ಚಿ.

ಇಂಞೋರ್ ದಿನ ಗಂಡಭೇರುಂಡ ಪಕ್ಷಿ ಒರ್ ವಿಷಗಿಡತ್‌ರ ಕೊಡಿಲ್ ಅಳಾತಿತಿಂಜತ್. ಎಡ್‌ತಬರಿರ ಮಂಡೆ ಮರತ್‌ಲಿಂಜ ವಿಷಗಿಡತ್‌ನ ಕಾಯಿನ ತಿಂದತ್! ಒರ್ ಗಳಿಗೆ ಆನದು ವಿಷಕಾಯಿರ ಪ್ರಭಾವತ್ ಪಕ್ಷಿ ಒದ್ದಾಡಿತ್ ಅಲ್ಲಿಯೇ ಚತ್ ಪೋಚಿ.

ತಾಂಡ ಕೆಣೆನಗುಂಡ್ ಎಡ್‌ತ ಬರಿರ ಮಂಡೆಯೂ ಪ್ರಾಣ ಬುಟ್ಟತ್. ಮಕ್ಕಳೇ ಒರೇ ಜಾಗತ್ ಇಪ್ಪ ಜನ ಒತ್ತೋರ್ಮೆ ಇಲ್ಲತೆ ಜಗಲಾಡಿಯಂಡ್, ದ್ವೇಷತ್ ಒಬ್ಬಂಗೊಬ್ಬೊ ಕೇಡ್ ಮಾಡಿತ್ ಚದಿಕಂಡೂಂದ್ ಪ್ರಯತ್ನಪಟ್ಟಕ ಎಲ್ಲಾರೂ ಕೆಡುವ.

*

*

*

ಮಂದಪ್ಪಂಡ ಮಂಗಲ

ಮಂದೂರ್ ಎಣ್ಣುವಲ್ಲಿ ಮಂದಪ್ಪ ಎಣ್ಣುವ ಮುದ್ದುಕಿ ಮಂದಪ್ಪ ಎಣ್ಣುವ ಮೊಂವೊ ಇಂಜತ್. ಆಸಾಮಿ ಪೆರ್ತ್ ಸೋಮಾರಿ. ಆಚೇಂಗಿ, ಬುದ್ದಿವಂತ. ದಿನಾ ತಿಂಬೋ, ವರ್‌ವೊ ಮಾತ್ರ ಅವಂಡ ಕೆಲಸ. ಮಂದಪ್ಪಂಗ್ ನೋಟಿ ನೋಟಿ ಮದಿಯಾಚಿ.

“ಅಲ್ಲಾ ಮಂದೂ, ನೀನ್ ಇನ್ನನೆ ಸೋಮಾರಿಯಾಯಿತ್ ದಿನ ದೂಡ್‌ಚೇಂಗಿ ಆಪಾ? ನೀನ್ ಮಂಗಲಾನ ಪಿಂಞ ಪೊಣ್ಣಾನ ಚಾಕುವದಾಚೇಂಗಿಯೂ ಎನ್ನನೆ? ಮಂಗಲಾಪದಾಚೇಂಗಿಯೂ ಪಣ ಬೋಂಡು”.

“ನೋಟಿಯಂಡಿರಮ್ಮಾ... ಬೋರೀ ಅಂಜಿ ಉರ್‌ಪಿಯತ್ ಒರ್ ಮೂಡಿನ ಮಂಗಲಾಯಂಡ್ ಬಪ್ಪಿ” ಮಂದಪ್ಪ ಅವ್ವಂಗ್ ಸವಾಲ್ ಇಟ್ಟತ್.

ಅವ್ವಂಡ ಕೈಯಿಂಜ ಅಂಜಿ ಉರ್‌ಪಿಯ ಕೇಟಂಡ್ ಊರ್ ಬುಟ್ಟತ್. ಮಂದಪ್ಪಂಗ್ ಮೊಂವೊ ತಮಾಸಿ ಮಾಡಿಯಂಡುಂಡೋಂದ್ ತೋಂದ್‌ಚಿ. ಊರ್ ಬುಟ್ಟ್ ಪೋನ ಮಂದು, ಪೇಟೆ ಎತ್ತುವಕ್ ಮಜ್ಜಣಾಪಕ ಕೆಲ ಪಯಿಪಕ್ ಸುರುವಾಚಿ. ಪೇಟೆಲ್ ಒರ್ ಹೋಟೇಲ್‌ರ ಮಿಂಞ ನಿಂದತ್. ಕೈಲುಳ್ಳದ್ ಬೋರೀ ಅಂಜಿ ಉರ್‌ಪಿಯ... ಮಾತ್ರ. ಪೋಯಿತ್ ಒಳ್‌ಲ್ ಅಳ್‌ತಂಡ್ ಕ್‌ಟ್ತ್ ಕ್‌ಟ್ತ್‌ನಾನೆಲ್ಲಾ ತಿಂದ್ ಕೂಟ್‌ಚಿ! ಆಸಾಮಿ ಇನ್ನನೆ ತಿಂಬದ್ ಕಾಂಬಂಜಿ ಹೋಟೇಲ್ ಯಜಮಾನ ನೀಡ ಪೆದ ಎಂತ, ಏದ್ ಊರ್‌ಂದೆಲ್ಲಾ ಕೇಟತ್.

ಮಂದಪ್ಪ ನಾಡ ಪೆದ “ಮುಂಡಮುಂಡತೆ” ಪಿಂಞ ನಾಡದ್ “ಕಾಂಗತೂರ್”ಂ ದೆಣ್ಣ್ ಚಿ! ಹೋಟೇಲ್ ಯಜಮಾನ ಬೋರೆ ಜಾಗತ್ ಗಡಿಬಿಡಿಲಿಪ್ಪಕ ಮಂದು ಜಾಗ ಖಾಲಿ ಮಾಡ್ ಚಿ. ಬಯ್ಯಂಜ ಹೋಟೇಲ್ ಕಾರ ನೋಟುವಾ... ಆಸಾಮಿ ನಾಪತ್ತೆ! ಹೋಟೇಲ್ ಕಾರ ಜೋರ್ಲ್ ಬಾಯಿ ಬಡಿಚಿತಾಪಕ, ಜನ ರಾಜಂಗ್ ದೂರ್ ಕೊಡ್‌ಂದ್ ಎಣ್ಣ್ ಚಿ. ಅಂವೊ ಅನ್ನನೇ ಮಾಡ್ ಚಿ.

ಇಪ್ಪರ ಮಂದಪ್ಪಂಗ್ ಕೆಲ ದುಂಬ್ ಚಿ. ಅಂಜಿ ಉರ್‌ಪಿಯ ಅನ್ನನೇ ಉಂಡ್. ಅನ್ನನೆ ಮಿಂಞಾತ್‌ರ ಊರ್‌ಕ್ ಪೋಚಿ. ಅಲ್ಲಿಯೋರ್ ಕೆರೆರ ಪಕ್ಕ ಒಬ್ಬೊ ಬಟ್ಟೆ ಒಲಿಚಂಡೂ, ಒಣ್ಣ್‌ಟ್ಟಂಡೂ ಇಂಜತ್. ಮಂದಪ್ಪ ತಾಂಡ ಮೇಲ್ ನೋಟ್ ಚಿ. ಪಳೆಯ ಬಟ್ಟೆ! ಉಪಾಯ ಗೇನ ಮಾಡಿಯಂಡೇ ಅವಂಡ ಪಕ್ಕ ಪೋಚಿ.

“ಅಣ್ಣಾ... ಪೇಟೆಲ್ ಈ ಊರ್‌ರ ಮಡಿವಾಳಂಗಕ್ ರಾಜ ಕತ್ತೆಯಳ ಕೊಡ್‌ತಂಡ್ ಉಂಡ್. ನೀಕ್ ಕ್‌ಟ್ಟಿತಿಲ್ಲಿಯಾ? ಬೋಂಡೇಂಗಿ ಬೆರಿಯ ಪೋ...”ಂದೆಣ್ಣ್ ಚಂವೊ. ಬಟ್ಟೆ ಒಲಿಚಂಡಿಂಜ ಮಡಿವಾಳ ಇವಂಡ ತಕ್ಕನ ನಂಬ್ ಚಿ. ಅಂವೊ ಮಂದಪ್ಪಂಗಣ್ಣ್ ಚಿ. - “ಒರ್ ಗಳಿಗೆ ಈ ಬಟ್ಟೆನೆಲ್ಲಾ ನೋಟಿಯಪ್ಪಾ..., ನಾನ್ ಪೇಟೆಕ್ ಪೋಯಿತ್ ಚೆನ್ನಂಗ್ ಕತ್ತೆಯಳ ಆಟಿಯಂಡ್ ಬಪ್ಪಿ.

ಅದ್ ಸೆರಿ “ನೀಡ ಪೆದ ಎಂತ?”

“ನಾಡ ಪೆದ ಬೀರಂಗಾತ್”.

ಮಡಿವಾಳ ಅಪ್ಪರ ಪೋನದೇ ಇಪ್ಪರ ಮಂದಪ್ಪ ನಲ್ಲ ನಲ್ಲ ಬಟ್ಟೆನೆಲ್ಲಾ ಎಡ್‌ತಂಡ್ ಜಾಗ ಖಾಲಿ ಮಾಡ್ ಚಿ. ಅಪ್ಪರ ಮಡಿವಾಳ ಯಪ್ಪೆ ಆಪಂಜ, ಬೋರೀ ಕೈಲ್ ಬಾತೇಂಗಿ, ಇಲ್ಲಿ ಬಟ್ಟೆಯೂ ಇಲ್ಲೆ, ಬಟ್ಟೆಪಾರಕಾರನೂ ಇಲ್ಲೆ! ಅವಂಡ ಕೂಟ್‌ಕ್ ಸುತ್ತಮುತ್ತ ಇಂಜ ಜನ ಕೂಡ್ ಚಿ. ಅವು ರಾಜಂಗ್ ಪುಕಾರ್ ಕೊಡ್‌ಪಕೆಣ್ಣ್ ಚಿ.

ಇಪ್ಪರ ಮಂದಪ್ಪ ಆ ಊರ್ ಬುಟ್ಟಿತ್ ಇಂಞೋರ್ ಊರ್‌ಕ್ ಪೋಚಿ. ಅಲ್ಲಿ ಒರ್ ಪೊಳೆರ ಪಕ್ಕ ಒರ್ ವಯಸ್ಸಾನವಳೂ, ಒರ್ ಮಂಗಲಕರ್ತಿರನ್ನನೆ ಪೊರ್‌ಟಿ ಮೂಡಿಯೂ ಅಳ್‌ತಿತಿಂಜತ್. ಮಂದಪ್ಪನ ಕಂಡದು ಮುದ್ದೆಕಿ ಓಡಿಯಂಡ್ ಬಾತ್.

“ಅಯ್ಯೋ... ಕುಂಞೋ... ನಂಗ ಈ ಪೊಳೆ ದಾಟಿತ್ ಅಪ್ಪರ ಪೋಂಡು. ದೋಣಿಕಾರ ಬಂತಲೆ...; ಅದ್ ನಾಡ ಕ್‌ರ್‌ಮೋವ...; ಅವಕ್ ಇಂದ್ ಅಪ್ಪರತ

ಊರ್ಲ್ ಮಂಗಲ. ಅವಳ ಕೂಟಿಯ ಪೋಂಡು. ನಂಗಳ ಪೋಳೆರ ಬರಿಕ್ ಬುಟ್ಟ್ತಪ್ಪ ಕಯ್ಯುವಾ"ಂದ್ ಕೇಟತ್. ಮಂದಪ್ಪ ಮೂಡಿನ ನೋಟ್ ಚಿ. ನಲ್ಲ ಚಾಯಿಕಾರತಿ! ಅಂವೊ ಆದ್ಯ ಮೂಡಿನ ಬುಡ್ವಕೊಂದ್ ತೀರ್ಮಾನ ಮಾಡ್ ಚಿ. ಅಕ್ಕಣೆ ಮುದ್ದಾಕಿ, ಆದ್ಯ ನನ್ನ ಕೂಟಿಯ ಪೋಂದೆಣ್ಣ್ ಚಿ. ಮಂದಪ್ಪ ಮುದ್ದಾಕಿನ ಪೋಳೆ ದಾಟಿಚಿಟ್ಟಿತ್ ವಾಪಾಸ್ ಬಾತ್. ಅಕ್ಕಣೆ ಮಂಗಲಕರ್ತಿ ಮೂಡಿ ಮೊರ್ಟಂಡ್ ಇಂಜದ್ ಕಂಡತ್. ಎಂತ ಸಂಗತೀಂದ್ ಮಂದಪ್ಪ ಕೇಟತ್.

"ನನ್ನ ಇಂದ್ ಪಕ್ಕತ ಊರ್ ರ ಒರ್ ಮುದಿಯಂಡ ಕೂಡೆ ಮಂಗಲ ಕಯಿಪ್" ಮೂಡಿ ಎಣ್ಣ್ ಚಿ. ಮಂದಪ್ಪಂಗ್ ಕುಸಿಯಾಚಿ. "ಅಂದಕ ಬಾ... ನಾಡ ಕೂಡೇ"ಂದ್ ಮಂದಪ್ಪ ವಾಪಾಸ್ ತಿರ್ಚಿ! ಅಕ್ಕಣೆಕ್ ಪೋಳೆರಾಕರೆಲಿಂಜ ಮುದ್ದಾಕಿ ಕೂತ್ ಡ್ವಕೊ ಸುರು ಮಾಡ್ ಚಿ. "ಅಯ್ಯೋ... ನೀನ್ ದಾರ್... ಅವಳೆಲ್ಲಿಕ್ ಕೂಟಿಯ ಪೋಪಿಯಾ?" ಮಂದಪ್ಪ ಎಣ್ಣ್ ಚಿ - "ನಾಡ ಪೆದ ಮಂಗಲಕಾರ! ಮಂದಪ್ಪ ಮೂಡಿರ ಕೂಡ ಜಾಗ ಖಾಲಿ ಮಾಡ್ ಚಿ! ಮಂದೂರ್ಕ್ ಮೂಡಿನ ಕೂಟಿಯಂಡ್ ಮಂದಪ್ಪ ಬಾತ್. ಮಂದವ್ವಂಗ್ ಮೂಡಿನ ಕಾಟತ್, ಕೂಡೆ ಅಂಜಿ ಉರ್ಪಿಯತ್ ನೋ ಕೊಡ್ತತ್. ಅವ್ವಂಗ್ ಪೆರ್ತ್ ಕುಸಿ ಆಯಿರ್ತ್. ಚೆನ್ನದಿನ ಕಯಿಂಜದು ಮಂದಪ್ಪಂಡ ಮನೆರ ಮಿಂಗಳ್ ರಾಜಭಟಿಂಗ ಬಾತ್. ಅಂತೂ ಮಂದುನ ರಾಜಂಡ ಆಸ್ಥಾನಕ್ ಕೂಟಿಯಂಡ್ ಪೋಚಿ.

ಅರಮನೆಲ್ ರಾಜ ವಿಚಾರಣೆ ಮಾಡ್ ಚಿ. ಮಂದಪ್ಪಂಡ ಮೀದ ಒಮ್ಮ ಕೇ ಮೂಂದ್ ದೂರ್ ಇಂಜತ್. ಮೂಂದಾಳೊನೋ ರಾಜ ಪ್ರಶ್ನೆ ಕೇಟತ್.

(1) ಶೆಟ್ಟಿ... ನೀಡ ಹೋಟೇಲಿಂಜ ತಿಂದಿತ್ ಪೋನವಂಡ ಪೆದ ಎಂತ?

ಶೆಟ್ಟಿ ಎಣ್ಣ್ ಚಿ - "ಮುಂಡ ಮುಂಡತೇ"ಂದ್ ಮಾಸ್ವಾಮಿ!

ದಂಡನೆಯವನ ಕೇಟತ್ -

(2) ಮಡಿವಾಳ ಮಾಚು, ನೀಡ ಬಟ್ಟೆನೆಲ್ಲಾ ಎಡ್ತ್ ಪೋನಂವೊ ದಾರ್?

ಮಡಿವಾಳ ಎಣ್ಣ್ ಚಿ - "ಬೀರಂಗಾತ್" ಮಾರಾಜ!

ಮೂಂದನೇ ಮುದ್ದಾಕಿನ ಕೇಟತ್ -

(3) ನೀಡ ಕ್ಕೊವಳ ಕೂಟಿಯ ಪೋನಂವೊ ದಾರ್ ಮುದ್ದಾಕವ್ವಾ?

"ಮಂಗಲಕಾರ" ಸ್ವಾಮೀಂದ್ ಮುದ್ದಾಕಿ ಎಣ್ಣ್ ಚಿ! ಎಲ್ಲಾಡೋ ವಿಚಾರಣೆ ತೋಂದತ್.

ಕಡೇಕ್ ರಾಜ ಎಣ್ಣೆಚಿ - "ಶೆಟ್ಟಿರ ಹೋಟೇಲಿಂಜ ತಿಂದಿಯೆ ಮುಂಡ ಮುಂಡತೆ!" ಮಡಿವಾಳಂಡ ಬಟ್ಟೆ ಎಡ್ತ ಪೋಯೆ "ಬೀರಂಗಾತ್" ಪಿಂಞ ಮುದ್ದಾಕಿರ ಕಾರ್‌ಮೋವಳ ಕೂಟಿಯ ಪೋಯೆ ಮಂಗಲಕಾರ! ಆನಗುಂಡ್, ಈ ಮೂಂದ್ ದೂರ್‌ನ ನಾನ್ ವಜಾ ಮಾಡಿಯೆ. ಮಂದಪ್ಪ ತಪ್ಪಿತಸ್ಥ ಅಲ್ಲ."

ರಾಜಂಡ ತಕ್ಕ ಕೇಟಿತ್ ಮಂದಪ್ಪಂಗ್ ಪೆರ್ತ್ ಕುಸಿಯಾಯಿರ್‌ತ್! ಮುದ್ದಾಕಿನ ಕೂಟಿಯುಂಡ್ ಮಂದು ವಾಪಾಸ್ ಮನೆಕ್ ಬಾತ್. ಅವ್ವನೋ, ಮಾಯಿನೋ, ಪೊಣ್ಣಾನೋ ಚಾಕಿಯುಂಡ್ ಸುಖಿತ್‌ಲ್ ಬದ್‌ಕೊಚಿ.

*

*

*

ಪೆದ್ದಂಡ ಪಯ್ಯು

ಪಂಡ್ ನೆಲಜಿನಾಡ್‌ಲ್ ಗೊಡ್ಡುಂದ್ ಒರ್ ಮನ್‌ಷ್ಯ, ಅಡ್ಡೀ ಪೆದ್ದ. ಅವಂಡಲ್ಲಿ ಒರ್ ಪಯ್ಯು ಇಂಜತ್. ಚಾಕಾಳಿ ಪಯ್ಯು ಅದ್. ಅರೆ ಲೀಟರ್ ಪಾಲೂ ಕೊಟ್ಟಿಯುಂಡ್ ಇಂಜಿಲೆ. ಈ ಪಯ್ಯುನ ಚಾಕಿಯುಂಡ್ ಉಂಡೇಂಗಿ ನಾಕ್ ದುಂಬ ನಷ್ಟುಂದ್ ಗೊಡ್ಡು ಪಯ್ಯುನ ಮಾರಿರ್‌ವೀಂದ್ ತೀರ್ಮಾನ ಮಾಡ್‌ಚಿ.

ಅನ್ನನೆ ಒರ್ ದಿನ ಗೊಡ್ಡು ಪಯ್ಯುನಾಟಿಯುಂಡ್ ಪೇಟೆಕ್ ಪೋಚಿ. ನೆಲ್ಲೋರ್ ಜಾಗ ನೋಟಿತ್ ಪಯ್ಯುನ ಕೆಟ್ಟೊಚಿ.

ಅಂತು ಗೊಡ್ಡು ಜೋರ್‌ಲ್ ಇನ್ನನೆ ಕೂತ್‌ಟ್ಟಿತ್ - "ಓ... ನಾಡ ಪ್ರೀತಿರ ಜನಳೇ, ಇಲ್ಲಿ ನೋಟಿ, ಇಲ್ಲಿ ಕೆಟ್ಟೊನದ್ ನಾಡ ಸ್ವಂತ ಪಯ್ಯು. ಇದ್‌ನ ನಾನ್ ಮಾರಿಯುಂಡುಳ್ಳೊ. ಇದೋರ್ ಚಾಕಾಳಿ ಪಯ್ಯು! ಅರೆಲೀಟರ್ ಪಾಲೂ ಕೊಟ್ಟುಲೆ! ಈ ಚಾಕಾಳಿ ಪಯ್ಯುನ ಎಡ್‌ಪವು ದಾರೇಂಗಿ ಉಳ್ಳಿರಾ...?" ಗೊಡ್ಡುರ ತಕ್ಕ ಕೇಟಿತ್ ಜನ ಎಲ್ಲಾ ತೆಳಿಚಂಡ್ ಜಾಗ ಖಾಲಿ ಮಾಡ್‌ಚಿ. ದಾರೂ ಪಯ್ಯುನ ಎಡ್‌ಪಕ್ ಬಂದ್‌ಲೆ. ಗೊಡ್ಡು ಅಕ್ಕಕ್ಕ ಅನ್ನನೇ ಕೂತ್‌ಟ್ಟುಂಡ್ ಎಣ್ಣೆ ಚಿ. ನೇರ ಮಜ್ಜಣಾಚೇಂಗಿಯೂ ಗೊಡ್ಡು ಪಯ್ಯುನ ಎಡ್‌ಪ ಜನಳೇ ಇಲ್ಲ ತಾಯೋಚಿ.

ಗೊಡ್ಡು ನಿಂದಿತಿಂಜ ಜಾಗತ್‌ರ ಪಕ್ಕತೇ ಒರ್ ಅಂಗಡಿ ಇಂಜತ್. ಆ ಅಂಗಡಿಕಾರ ಗೊಡ್ಡುರ ಪೆದ್ದೊಕಳಿನ ಪೊಲಾಕಂಚೇ ನೋಟಿಯುಂಡಿಂಜತ್. ಅವಂಗ್ ಗೊಡ್ಡುನ ಕಾಂಬಂಜ ಪಾಪಂದಾಚಿ. ಅಂಗಡಿಕಾರ ಅವಂಡ ಪಕ್ಕ ಬಾತ್.

ಅಂತೂ ಕೇಟತ್ - "ಅಣ್ಣಾ... ನೀನ್ ಒತ್ತತೇಂಗಿ ಈ ಪಯ್ಯುನ ನಾನ್ ಮಾರಾಟ ಮಾಡಿತಪ್ಪಿ..., ಆಕುವಾ?" ಗೊಡ್ಡುಕ್ ಅಂಗಡಿಕಾರಂಡ ತಕ್ಯ ಕೇಟತ್ ಕುಸಿಯಾಚಿ.

"ಓ... ಆಡ್... ಆಡ್... ಮಾರಾಟ ಮಾಡಿ ತಾತೇಂಗಿ ನಿಂಗಕ್ ಪುಣ್ಯ ಬಕ್ಕೂಂದ್" ಗೊಡ್ಡು ದಂಡೂ ಕೈ ತೊತ್ತಂಡ್ ಎಣ್ಣ್ ಚಿ. ಅಂಗಡಿಕಾರ ಪಯ್ಯುನ ಉತ್ತಿಯಂಡ್, ಗೊಡ್ಡುನ ಕೂಟಿಯಂಡ್ ಬೋರೆ ಜಾಗಕ್ ಪೋಚಿ.

ಅಲ್ಲಿ ಅಂವೊ ಜೋರಲ್ - "ಅಣ್ಣ ತಮ್ಮಣಿಗಳೇ..., ಬಾರಿ ನೋಟಿ ಇಲ್ಲಿ, ಈ ಪಯ್ಯುನ ಮಾರಿಯಂಡುಂಡ್; ಇದ್ ಪೆರ್ತ್ ನಲ್ಲ ಪಯ್ಯು..., ಭಾರೀ ಸಾಧು...; ಒರ್ ದಿನಕ್ ಅಂಜಿ ಲೀಟರ್ ಪಾಲ್ ತಪ್ಪ...! ದಾರೇಂಗಿ ಎಡ್ತವಿರಾ?" ಅಂಗಡಿಕಾರ ಕೂತ್‌ಚ್ಚಿತಾಪಕ, ದಂಡ್ ಮೂಂದ್ ಜನ ಕ್ರಯ ಕೇಟಂಡ್ ಪಕ್ಕ ಬಾತ್.

ಅಕ್ಕಣೆಕ್ ಈ ಪೆದ್, ಬೆರಿಯ ಅಂಗಡಿಕಾರಂಡ ಕೈಲಿಂಜ ಕೇರ್ ಬಲಿಚಂಡ್, "ಉಯಿರಾಮಾ... ಈ ಪಯ್ಯು ನೇರಾಯಿತೂ ಅಚ್ಚ ನಲ್ಲದಾಯಿತ್ ದಿನಕ್ ಅಂಜಿ ಲೀಟರ್ ಪಾಲ್ ತಪ್ಪದಾಚೇಂಗಿ, ನಾನೆನ್ನಂಗ್ ಇದ್‌ನ ಮಾರಡ್..., ನಾನೇ ಚಾಕಿಯೋವಿ" ಪೆದ್ ಪಯ್ಯುನಾಟಿಯಂಡ್ ವಾಪಾಸ್ ಪೋಯಿರ್‌ತ್. ಅಂಗಡಿಕಾರ ಅವಂಡ ಪೆದ್‌ಕಳಿನ ನೋಟಿತ್ ತೆಳಿಕಂಡುವಾ, ಮೊರಡಂಡುವಾಂದ್ ಗೊತ್ತಾಕತೆ, ಪೆದ್ ಪೋನ ದಿಕ್ಕನೇ ನೋಟಿಯಂಡ್ ಬಾಯಿ ಬುಟ್ಟಂಡ್ ನಿಂದತ್!

*

*

*

ಪಚ್ಚೆ ಕುರ್ಕ

ಕಾಡಲ್ "ಸಿಂಗೂಟಿ" ಎಣ್ಣುವೋರ್ ಕುರ್ಕ ಇಂಜತ್. ಒರ್ ದಿನ ಈ ಕುರ್ಕಂಗ್ ತಿಂಬಕ್ ಒಂದೂ ಇಲ್ಲತೆ, ಎಂತೇಂಗಿ ಕ್‌ಟ್ವಾಂದ್ ಪಕ್ಕತ್‌ರ ಊರ್‌ಕ್ ಪೋಚಿ. ಇನ್ನನೆ ಊರ್‌ರ ಮಧ್ಯ ಪೋಯಂಡಿಪ್ಪಕ ಬೀದಿನಾಯಿಯ ಈ ಸಿಂಗೂಟಿನ ದವುತಿಯಂಡ್ ಪೋಚಿ. ಕುರ್ಕ ಓಡಿ ಓಡಿ, ಪಕ್ಕತ್‌ಲೇ ಇಂಜ ಒರ್ ಮನೆರ ಕೋಳಿಗೂಡ್‌ಕ್ ನುಗ್ಚಿ.

ನಾಯಿಯ ಅಲ್ಲಿಂಜ ಪೋನ ಪಿಂಞ ಕೋಳಿಗೂಡ್‌ಂಜ ಒರ್ ಕೋಳಿನ ಎಡ್‌ತಂಡ್ ಗೂಡ್ ದಾಟಂಡೂಂದೆಣ್ಣುವಕ, ಮನೆರ ನಾಯಿಯ ಸಿಂಗೂಟಿನ ದವುತಿಯಂಡ್ ಬಾತ್. ಕುರ್ಕ ಬೊತ್ತಿತ್ ಕೋಳಿನ ಬುಟ್ಟಿತ್ ಪಾಂಜತ್.

ಗಡಿಬಿಡಿಲ್ ಕುರ್ಕ ಓಡಿಯಂಡಿಪ್ಪಕ, ಕಳ್ತರಲ್ಲಿ ಇಂಜ ಬಲ್ಯೋರ್ ಗಂಜಿರೊಳ್‌ಕ್ 'ಡಬ್ಬ'ಂದ್ ಬುದ್ಧಾರ್‌ತ್. ಆ ಗಂಜಿರೊಳ್‌ಲ್ ಗೋಡೆಕ್ ಬೂಕ್‌ವ ಪಚ್ಚೆರಂಗ್ ಇಂಜತ್. ಕುರ್ಕ ಕಷ್ಟಪಟ್ಟಿತ್ ಗಂಜಿರೊಳ್‌ಂಜಿ ಎದ್ದತ್. ಏವಕ ಸಿಂಗೂಟಿ ಕುರ್ಕ ಪಚ್ಚೆರಂಗ್‌ಲ್ ಎಲಂಗುವಯಿಂಜತ್.

ಪಚ್ಚೆಕುರ್ಕನ ಕಂಡಿತ್ ನಾಯಿಯ ತೇರ ಬೊತ್ತಿಯಂಡ್ ಓಡಿರ್‌ತ್! ಕುರ್ಕ ಬಾಲ್ ಆಟಿಯಂಡ್ ಕಾಡ್ ಕೂಡ್‌ಚಿ. ಕಾಡ್‌ಲ್ ಈ ಪಚ್ಚೆರಂಗ್‌ರ ಕುರ್ಕನ ಕಾಂಬಂಜ ಬಾಕಿ ಜಾತಿಯಕೆಲ್ಲ ಭೀತಿ ಅಳ್‌ಚಿ. ಎಲ್ಲಾ ದಿಕ್ಕಾಪಾಲ್ ಓಡ್‌ಚಿ. "ಇದ್ ಎನ್ನತೋರ್ ಪ್ರಾಣಿ ಆಯಿತಿಕ್ಕು...; ದೇವಲೋಕತಿಂಜ ಬಂದದ್ ಕಾಂಬಾಂದ್" ಜಾತಿಯ ತೇರ ಸಂಶಯತ್, ಬೊತ್ತಿಯಂಡ್ ಗೂಡ್‌ರೊಳ್‌ಲೇ ಕೂಡಿಯಂಡತ್!

ಇದ್‌ನೆಲ್ಲಾ ಕಾಂಬಂಜ ಸಿಂಗೂಟಿ ಕುರ್ಕಂಗ್ ಬಡಾಯಿ ಅಳೀರ್‌ತ್! ಕೂಡೇ ಒರ್ ಉಪಾಯವೂ ಗೇನ ಬಾತ್. ಅದ್ ಪ್ರಾಣಿಯಳೆಲ್ಲಾ ಪಕ್ಕ ಕಾಕ್‌ಚಿ.

"ಓ... ನಾಡ ಪ್ರೀತಿರ ಕಾಡ್‌ಜಾತಿಯಳೇ... ಬಾರೀ... ಪಕ್ಕ ಬಾರಿ... ನಿಂಗೆನ್ನೊಂಗ್ ಬೊತ್ತಿಯಂಡ್ ಉಳ್ಳಿರಾ..., ನಾನ್ ಪುದಿಯದಾಯಿತ್ ದೇವಲೋಕ ತ್‌ಂಜಿ ಬಂದ ಕಾಡ್‌ರಾಜ, ನಿಂಗೆಲ್ಲಾರ್‌ಡ ಮಾರಾಜ! ನನ್ನ ಇಲ್ಲಿಕ್ ಆ ಪರಶಿವಂಡ ರಾಣಿ ಪಾರ್ವತಿದೇವಿ ಆಯೆಚಿಯೆ. ಪಚ್ಚೆಕುರ್ಕ ತನ್ನೇ ತಾನ್ ಪರಿಚಯ ಮಾಡಿ ಯಂಡತ್. ಎನ್ನೆಂಗಾಡ್, ನಂಗಕೋರ್ ಪುದಿಯ ರಾಜ ಬಾತ್‌ಂದ್ ಬಾಕಿ ಪ್ರಾಣಿಯಕ್ ಸಂತೋಷ ಆಯಿರ್‌ತ್. ನಂಗಳೆಲ್ಲಾ ನೀನೇ ಕಾಪಾಡ್‌ಂದ್ ಪ್ರಾಣಿಯ ತೇರಾ ಪಚ್ಚೆಕುರ್ಕಂಡ ಕಾಲ್‌ಕ್ ಬುದ್ದತ್!

ಕುರ್ಕ ಎಲ್ಲಾ ಪ್ರಾಣಿಯಕೂ ಓರೋರ ಮಂತ್ರಿ ಪದವಿ ಕೊಡ್‌ತತ್. ಇನ್ನನೆ ಗತ್ತಲ್ ದಿನ ಕಯಿಂಜಂಡಿಂಜತ್. ದರ್ಬಾರ್ ನಡ್‌ಂದಂಡಿಂಜತ್.

ಒರ್ ದಿನ ಕಾಡ್‌ಲ್ ಬಲ್ಯನಮ್ಮೆ. ನವಿಲ್ ಡ್ಯಾನ್ಸ್ ಮಾಡಿಯಂಡಿಂಜತ್. ಕುರ್ಕಂಗ ಪಾಟ್ ಪಾಡಿಯಂಡ್ ಇಂಜತ್. ಪಾಡಿ ಪಾಡಿ ಆಪಕ ಕುರ್ಕಂಗೆಲ್ಲಾ "ಉಕ್ಕೇ ಹೂವೊ"ಂದ್ ಕೂತ್‌ಡ್‌ಪಕ್ ಸುರು ಮಾಡ್‌ಚಿ. ಕೂತ್‌ಟ್ಟಂಡ್ ಅವು ತಾರಾಮಾರ ತುಳ್ಳುವ ಕೂಡ್‌ಚಿ. ಮಾರಾಜಂಡ ಜಾಗತ್ ಅಳ್‌ತಂಡ್ ಆಟ್-ಪಾಟ್‌ನೆಲ್ಲಾ ನೋಟಿಯಂಡಿಂಜ ಪಚ್ಚೆಕುರ್ಕಂಗ್ ಕುಸಿಯಾಯಿರ್‌ತ್. ಅದ್‌ಂಗೂ ಆಡಂಡು, ಪಾಡಂಡೂಂದ್ ಆಸೆ ಆಚಿ! ತಾನೂ ಉಕ್ಕೆ ಹೂವೋ... ತಕ್ಕ ತಕ ಧೈ ಧೈಂದ್ ಕುರ್ಕ ತುಳ್ಳುವಕಿಳಿಂಜತ್. ಪುಟ್ಟ್ಯಗುಣ ಚುಟ್ಟ್ಯಕೋ ಪೋಗ. ಎಲ್ಲಾ ಪ್ರಾಣಿಯಳೂ ಆಡಿಯಂಡ್ - ಪಾಡಿಯಂಡ್ ಇಂಜತ್. ಆ ತಾಳಕ್ ಈ ಮೇಳ

ಆಹಾ...! ಪಚ್ಚೆಕುರ್ಕ ತಾಂಡ ಪುಟ್ಟ್‌ಗುಣತ್‌ರ ಅಭ್ಯಾಸತ್‌ರನೆಕೆ "ಉಕ್ಕೆ ಹೂವೋ"ಂದ್ ಪಾಡಿಯಂಡೇ ಇಂಜತ್.

ಅಕ್ಕಣೆಕ್ ಪಕ್ಕತ್‌ಲೇ ಆಡಿಯಂಡಿಂಜ ಬಲ್ಯ ನರಿಕ್ ಸಂಶಯ ಬಂದಿತ್ ಸಂಗತಿ ಗೊತ್ತಾಯಿರ್‌ತ್. ಇದ್ ಸಿಂಗೂಟಿ ಕುರ್ಕಂದ್! ಅದ್ ತಾಂಡ ಕೂಟ್‌ಕಾರಕ್ ಸೂಚನೆ ಕೊಡ್‌ತತ್. ಕೂಡೆನ್ನೆ ಅವು ಎಲ್ಲಾ ಕೂಡಿಯಂಡ್ ಪಚ್ಚೆಕುರ್ಕನ ಕಡಿಪಂಜಿ ಚೂರ್‌ಚೂರ್ ಮಾಡ್‌ಚಿ! ಎಲ್ಲಾರ್‌ನೋ ವೋಸ ಮಾಡಿತ್ ಬದ್‌ಕಿಯಂಡಿಂಜ ಸಿಂಗೂಟಿ, ಆಲಿಯಾಸ್ ಪಚ್ಚೆಕುರ್ಕಂಡ ಕಥೆ ಅಲ್ಲಿಕ್ ತೇಂದತ್!



ನಲ್ಲೂರ್ ನಲ್ಲಪ್ಪ

ಇಡೀ ನಲ್ಲೂರ್‌ಲೇ ಪೆದಪೋನ ವ್ಯಕ್ತಿ ನಲ್ಲಪ್ಪ ಅವಂಗಿಂಜ ಒರೇ ಒರ್ ಆಸ್ತಿ ಎಣ್ಣಕ ಒರ್ ಕರ್ತ ಕುದಾರೆ! ಒನ್ನಾಂದ್ ನಲ್ಲಪ್ಪ ತಾಂಡ ಅದ್ಯಪ್ಪ ಪರೀಕ್ಷೆ ಮಾಡುವಕ್‌ಲೆಂದ್ ಕುದಾರೆ ಪತ್ತಿತ್, ಊರ್ ಸುತ್ತುವಕ್ ಪೊರ್‌ಟತ್. ಇನ್ನನೆ ಪೋಯಿ ಪೋಯಿ ಆಪಕ, ಸುಸ್ತ್ ಆಯಿತ್ ಒರ್ ಪೊಳೆಕರೆಲ್ ಅರ್‌ತತ್. ಅಕ್ಕಣೆಕ್ ಪೊಳೆರೊಳ್‌ಲ್ ದಂಡ್‌ಮೀನ್‌ವ ನಲ್ಲಪ್ಪನೇ ನೋಟಿಯಂಡ್ ಕೂತ್‌ಟ್ಟಂಡಿಂಜತ್. ಬಲ್ಲೋರ್ ಮುಳ್‌ಗಿಡತ್‌ರ ಮದ್ದತ್ ಆ ಮೀನ್‌ವ ಕೆಣ್‌ಂಜಂಡ್‌ತಿಂಜತ್. ನಲ್ಲಪ್ಪ ಕನಿಕರತ್ ಮೀನ್‌ವಳ ಗಿಡತಿಂಜ ಬುಡ್‌ತಿತ್ ಬುಟ್ಟತ್. "ನೀಡ ಉಪಕಾರತ್‌ನ ನಂಗ ಎಂದೂ ಮರೆಯಲೆ, ಎಕ್ಕಾಚೇಂಗಿಯೂ ನೀಕ್ ನಂಗ ಸಹಾಯ ಮಾಡ್‌ವಾ"ಂದ್ ಮೀನ್‌ವ ಎಣ್ಣೆ ಚಿ.

ಸುಸ್ತ್ ತೇತಂಡ್, ನಲ್ಲಪ್ಪ ಕುದಾರೆ ಪತ್ತಿತ್ ಪೊರ್‌ಟತ್. ಪೋಯಂಡಿಪ್ಪಕ ಬಟ್ಟೆಮದ್ದೆ ಇರ್‌ಪು ಸಾಲಾಯಿತ್ ಪೋಯಂಡಿಂಜತ್. ಇದ್‌ನ ಕಂಡ ನಲ್ಲಪ್ಪ ಈಲೇ ಪೋಚೇಂಗಿ ಈ ಇರ್‌ಪುವ ಮನಾರ ಚತ್‌ಪೋಕೂಂದ್ ಕುದಾರೆ ಇಳಿಂಜಿತ್ ಬೋರೆ ಬಟ್ಟೆಕಾಲೆ ಪೋಚಿ. ಇರ್‌ಪುವಕೆಲ್ಲಾ ಪೆರ್ತ್ ಕುಸಿಯಾಯಿ ಪೋಚಿ. "ಎಕ್ಕಾಚೇಂಗಿಯೂ ನೀಕ್ ನಂಗ ಸಹಾಯ ಮಾಡ್‌ವಾ"ಂದೆಣ್ಣೆ ಚವ್ವ.

ಅನ್ನನೇ ನಲ್ಲಪ್ಪ ಆ ಊರ್ ಬುಟ್ಟಿತ್ ಮಿಂಞತ್‌ರ ಊರ್‌ಕ್ ಪೋಚಿ. ಅಲ್ಲಿ ಎತ್ತುವಕ ಇರ್‌ಟಾಯಿತಿಂಜತ್. ನಲ್ಲಪ್ಪ ಒರ್ ಪಳೆಯ ದೇವಸ್ಥಾನತ್‌ರ ಒಳ್‌ಲ್ ಬುದ್ದಂಡತ್. ಪೊಲಾಕ ಏವಕ ದೇವಸ್ಥಾನತ್‌ರೊಳ್‌ಲ್ ದಂಡ್ ಪಕ್ಕಿ ಕುಂಞಿಯ ಅಡಿಕ್ ಬುದ್ದಂಡ್ ವೋರ್‌ಟಂಡಿಂಜತ್. ನಲ್ಲಪ್ಪ

ಪಾಪಾಂದೆಣ್ಣಿಯಂಡ್ ಆ ಚುಪ್ಪಿ ಮರಿಯಳ ಎಡ್ತಿತ್, ಗೂಡ್‌ರೊಳ್‌ಲ್ ಬುಟ್ಟಿತ್, ಕುದಾರೆ ಪತ್ತಿಯಂಡ್ ಪೊರ್‌ಟತ್. ದಂಡ್ ದಿನ ಕಯಿಂಜದು "ಗಾಳಿಪುರ" ಎಣ್ಣುವಲ್ಲಿಕ್ ಎತ್ತ್‌ಚಿ. ಅಲ್ಲಿ ಒರ್ ಮನ್‌ಷ್ ತಮಟೆ ಕೊಟ್ಟಿಯಂಡ್, ಎನ್ನತಾನೋ ಎಣ್ಣಿಯಂಡಿಂಜತ್.

ನಲ್ಲಪ್ಪ ಅವಂಡ ಪಕ್ಕ ಪೋಚಿ.

ಅಲ್ಲಿ ಅಂವೊ ಇನ್ನನೆ ಎಣ್ಣಿಯಂಡಿಂಜತ್ - "ಕೇಳಿಯಪ್ಪೋ... ಕೇಳಿ ಈ ನಾಡ್‌ರ ರಾಜಕುಮಾರಿ ಎಣ್ಣುವನ್ನತ ಕಷ್ಟತ್‌ರ ಕೆಲಸತ್‌ನ ದಾರ್ ಮಾಡುವಾ, ಅಯಿಂಗಕ್ ಪಾದಿರಾಜ್ಯತ್‌ರ ಕೂಟ್‌ಕ್ ರಾಜಕುಮಾರಿನೋ ಮಂಗಲ ಕಯಿಚಿ ತಪ್ಪ..." ತಮಟೆಕಾರಂಡ ಸಂದೇಶ ಕೇಟಿತ್ ನಲ್ಲಪ್ಪ ಎನ್ನೊಂಗ್ ಒರ್ ಕೈ ನೋಟುವಕಾಗಾಂದ್ ನೇರೆ ಅರಮನೆಕ್ ಪೋಚಿ. ಇಲ್ಲಿಯೇ ಅದೃಷ್ಟ ಪರೀಕ್ಷೆ ಮಾಡಂಡೂಂದ್ ತೋಂದ್‌ಚವಂಗ್.

"ಈ ಕೆಲಸ ಮಾಡತ ಪೋಚೀಂಗಿ ನೀಡ ಮಂಡೆ ಪೋಪಾ"ಂದ್ ರಾಜ ಎಣ್ಣೊಚಿ. ನಲ್ಲಪ್ಪ "ಆಡ್‌"ಂದ್ ಒತ್ತಂಡತ್. ರಾಜಕುಮಾರಿ ಪೆರ್ತ್ ಅಹಂಕಾರಿ ಆಯಿ ತಿಂಜತ್. ಚೊಕ್ಕಿತ್ ಕಳಿಪಯಿಂಜತ್. ಅವ ನಲ್ಲಪ್ಪಂಗ್ ಕೆಲಸ ಎಣ್ಣುವಕೊಂದ್ ಒರ್ ಕುಂದ್‌ರ ಕೊಡಿಕ್ ಅಯೆಪ. ಅಲ್ಲಿ ಒರ್ ವ್ಯಕ್ತಿ ತಾಂಡ ಕೈಬೆರೆತಿಂಜ ಮೊಯಿರತ್‌ನ ಉತ್ತಿತ್ ಕುಂದ್‌ರ ಕೊಡಿಂಜ ಎಡ್ತಿತ್ ಕೋದಲಿಂಜ ಸಮುದ್ರಕ್ ಚಾಡಿರ್‌ತ್! ಅಂತು ನಲ್ಲಪ್ಪಂಗ್ - ಅದ್‌ನ ಎಡ್‌ತಬಾಂದ್ ಎಣ್ಣೊಚಿ. ನಲ್ಲಪ್ಪ ಇದ್ ಆಪಕುಳ್ಳ ಕೆಲಸ ಅಲ್ಲಾ..., ಇಲ್ಲಿಂಜ ಪಾರಿತ್ ಚಾವದೇ ನಲ್ಲದೊಂದ್ ಕುಂದ್‌ಲಿಂಜ ಸಮುದ್ರಕ್ ಪಾರ್‌ಚಿ. ಸಮುದ್ರತ್‌ರ ಒಳ್‌ಲ್ ದಂಡ್ ಮೀನ್‌ವ... ಒರ್ ಕಪ್ಪೆಚಿಪ್ಪ್‌ನ ಎಡ್‌ತ ಬಂದಿತ್ ಅವಂಗ್ ಕೊಡ್‌ತತ್. ಆ ಮೀನ್‌ವ ಆದ್ಯ ನಲ್ಲಪ್ಪ ಪೊಳೆಕರೆಲ್ ಕಾಪಾಡ್‌ನದ್! ನಲ್ಲಪ್ಪ ಕುಸೀಲ್ ಕಪ್ಪೆ ಚಿಪ್ಪ್‌ರೊಳ್‌ಲಿಂಜ ಮೊಯಿರತ್‌ನ ಕೊಂಡ ಪೋಯಿತ್ ರಾಜಕುಮಾರಿಕ್ ಕೊಡ್‌ತತ್.

ಪಿತ್ಯಾಂದ್ ರಾಜಕುಮಾರಿ ನಲ್ಲಪ್ಪನ ಕೂಟಿಯಂಡ್ ಒರ್ ಬೇಲ್‌ಕ್ ಪೋಚಿ. ಅಲ್ಲಿ ದಂಡ್ ಚೀಲ ದುಂಬ ರಾಗಿ ಇಂಜತ್. ಆ ರಾಗಿನ ಬೇಲ್‌ಕ್‌ಡಿಯ ಚೆಲ್ ಚಿಟ್ಟಿತ್. ಅಂತೂ ನಲ್ಲಪ್ಪಂಗ್‌ಣ್ಣೊಚಿ - "ನಾಳೆ ಪೋಲುವಾಂಡೊಳಿಯ ಈ ರಾಗಿನೆಲ್ಲಾ ಅಂಜಿತ್ ಚೀಲಕ್ ದುಂಬ್‌ಚಿಡ್"ಂದೆಣ್ಣುವಂಜಿ ಪೋಚಿ. ಇವ ರಾಜಕುಮಾರಿಯಾ, ಅಲ್ಲಾ ರಾಕ್ಷಸಿಯಾಂದ್ ನಲ್ಲಪ್ಪಂಗ್ ತೋಂದ್‌ಚಿ. ಬೇರತ್ ಅಂವೊ ಅಲ್ಲಿಯೇ ಅಳತ್.

ಅಕ್ಕಣೆ ಚೆನ್ನಂಗ್ ಇರ್‌ಪುವ ಅಲ್ಲಿಕ್ ಬಾತ್. ಅವು ನಲ್ಲಪ್ಪಂಗ್ ಪರಿಚಯ ಎಣ್ಣಿತ್, ನಂಗ ನೀಕ್ ಸಹಾಯ ಮಾಡುವಾಂದೆಣ್ಣೊಚಿ. ಇರ್‌ಪುವಡ ಸಂಸಾರ

ತೇರಾ ಬಂದಿತ್ ಪೊಲುವಾಂಡೊಳಿಯ ರಾಗಿನೆಲ್ಲಾ ಆಂಜಿತ್ ಚೀಲಕ್ ದುಂಬ್ ಚಿಟ್ಟಿತ್. ಪೊಲಾಕ ರಾಜಕುಮಾರಿ ಬಂದಿತ್ ನೋಟ್ ಚಿ. ಒಂದೂ ಎಣ್ಣೆ ತೆ ನಲ್ಲಪ್ಪನ ಕೂಟಿಯಂಡ್ ಅರಮನೆಕ್ ಪೋಚಿ.

ಅಲ್ಲಿ ರಾಜಕುಮಾರಿ ನಲ್ಲಪ್ಪಂಗೆಣ್ಣ್ ಚಿ - "ಏಳ್ ಕುಂದ್ ರಾಬರಿಲ್, ಏಳ್ ಸಮುದ್ರರಾಬರಿಕ್ ಒರ್ ಪೂಬನ ಉಂಡ್. ಅಲ್ಲಿ ಒರ್ ಸೇಬುಮರ ಉಂಡ್. ಅದಲ್ ಒರ್ ಪೊನರ ಸೇಬು ಉಂಡ್. ಅದನ್ ತೇಡಿತ್ ಕೊಜ್ಜಂಡ್ ಬಾ". ನಲ್ಲಪ್ಪ ಆಪದಾಡ್ ಒಂದ್ ಕುದರೆನ ಕೂಟಿಯಂಡ್ ಕುಂದ್ ಪತ್ತುವಕ್ ಸುರು ಮಾಡ್ ಚಿ. ಸುಸ್ತಾಪಕ ಅಂವೊ ಒರ್ ಮರತಾರಡಿಲ್ ಅಳ್ತತ್. ಅಕ್ಕಣೆಕ್ ಅಲ್ಲಿ ದಂಡ್ ಪಕ್ಷಿಯ ಬಂದಿತ್ ನಲ್ಲಪ್ಪನ ತಕ್ಕಾಪರಿಚಿಟ್ಟಿತ್. ನಲ್ಲಪ್ಪ ಅಯಿಂಡ ಕೂಡೆ ಕಷ್ಟಸುಖಿ ಎಲ್ಲಾ ಪರಂದಂಡತ್.

ಪಕ್ಷಿಯ ಎಣ್ಣ್ ಚಿ - ನಂಗಡ ತಾತ ಆ ಪೂಬನತ್ ಉಂಡ್..., ನೀನ್ ಬೇರಪಡತೇ, ನಂಗ ಕೇಟ ಬಪ್ಪಂದೆಣ್ಣ್ ಚಿ. ಪಿತ್ಯಾಂದ್ ಪಕ್ಷಿಯ ಸೇಬುನ ಕೊತ್ತಿಯಂಡ್ ಬಂದಿತ್ ಕೊಡ್ತತ್. ನಲ್ಲಪ್ಪ ಅರಮನೆಕ್ ಪೋಯಿತ್ ರಾಜಕುಮಾರಿಕ್ ಸೇಬುನ ಕೊಡ್ತತ್.

ಅವಕ್ ಅದನ್ ನೋಟಿತ್ ಪೆರ್ತ್ ಕುಸಿ ಆಯಿರ್ತ್. ಪಣ್ಣ್ ತಿಂದತ್. ಪಣ್ಣ್ ಕಡಿಚೆನ್ನೆ ಅವಡಲ್ಲಿಂಜ ಚೊಕ್ಕನ ಕಳಿ, ಅಹಂಕಾರ ಮಾಯ ಆಯಿತ್, ನಲ್ಲಪ್ಪಂಡ ಮೀದ ಪ್ರೀತಿ ಪುಟ್ ಚಿ. ಮಾರಾಜ ಎಣ್ಣ್ ನನ್ನೆ ರಾಜಕುಮಾರಿಕೂ, ನಲ್ಲಪ್ಪಂಗೂ ಮಂಗಲ ಕಯಿಚಿತ್ ಪಾದಿರಾಜ್ಯತ್ ಕೊಡ್ತತ್. ಅವು ದಂಡಾಳೂ ಪೆರ್ತ್ ಕಾಲಕೆತ್ತನೆ ಸುಖಿತ್ ಬಾಳ್ ಚಿ.

*

*

*

ನಾನಾ - ನೀನಾ

ಸೀನಪ್ಪಂಡಲ್ಲಿ ಒರ್ ಕತ್ತೆ ಪಿಂಞ ಒರ್ ತೈರಕೋಳಿ ಇಂಜತ್. ಕೋಳಿ ಗೂಡ್ ಪಕ್ಕತ್ಲೇ ಕತ್ತೆರ ಕೊಟ್ಟ್ ಇಂಜತ್. ತೈರಕೋಳಿ ಎಕ್ಕಲೂ ಬೊಳಿಯಾಪಕ, "ಕೊಕ್ಕರೇ ಕೋ"ಂದ್ ಕೂಗಿತ್ ಸೀನಪ್ಪನ ಎಚ್ಚರ ಮಾಡಿಯಂಡ್ ಇಂಜತ್. ಎಚ್ಚರ ಆನದು ಸೀನಪ್ಪ ಒಲಿಪಕುಳ್ಳ ಬಟ್ಟೆ ಮೂಟಿನ ಕತ್ತೆರ ಬೆನ್ನಲ್ ಬೆಚ್ಚಂಡ್ ಪೊಳೆಕ್ ಪೋಯಂಡಿಂಜತ್. ಇದೇ ಕ್ರಮ ದಿನೋದಿ ನಡಂದಂಡ್ ಇಂಜತ್.

ಒರ್ ದಿನ ಬೇಲ್‌ಲ್ ಕತ್ತೆ ಪಿಂಞ ತೈರಕೋಳಿ ಜೊತೆಲ್ ಮೇಂಜಂಡಿಂಜತ್. ಕತ್ತೆಕೆನ್ನಾಚೋ... ಇಂಜಕಿಂಜನೆಕೆ ಕೋಳಿನ ಕೇಟತ್ -

“ಏ... ತೈರಕೋಳಿಯೇ ಇಲ್ಲಿ ಕೇಳ್... ನಂಗಡ ಯಜಮಾನಂಗ್ ನಂಗ ದಂಡಾಳಾರ್ ಕೂಟ್‌ಲ್ ನನ್ನೇ ದುಂಬಾ ಕುಸಿ ಉಳ್ಳೊ...; ಎನ್ನೊಂಗ್ಣೊಕ ಯಜಮಾನಂಡ ಬಲ್ಯ ಬಟ್ಟೆ-ಕೆಟ್ವೊನ ಎಕ್ಕಾಲೂ ನಾನೇ ಪೊರ್‌ಪೊ...”.

“ಆಚೇಂಗಿ, ಎಕ್ಕಾಲೂ ಪೊಲಾಕನೇರ್ತೆ ಯಜಮಾನನ ಒಪ್ಪೊವೊ ನಾನ್. ಯಜಮಾನಂಗ್ ನಾಡ ಮೀದೇ ಕುಸಿ” ತೈರಕೋಳಿ ಬುಟ್ಟ್ ಕೊಡ್‌ತಾಲೆ. ಅಯಿಂಡ ತರ್ಕ ಬೈಟಾಕಣೆಕೂ ತ್‌ಂದಾಲೆ. ದಂಡೂ ಜಗಲಾಡಿಯಂಡ್ ಗೂಡ್ ಕೂಡ್‌ಚಿ.

ಅಂದ್ ಬೈಟ್ ಕತ್ತೆಕ್ ವರ್‌ಕೇ ಇಲ್ಲೆ. “ಆ ತೈರಕೋಳಿರ ಚೊಕ್ಕೇ... ಅದೊಂಡ ತಕ್ಕೊನ ಎನ್ನನೆ ಒತ್ತವೊ? ಯಜಮಾನಂಗ್ ಅವಂಡ ಮೀದ ಏರ ಕುಸಿಯಲೋ... ಯಜಮಾನನ ವರ್‌ಕಲಿಂಜ ಒಪ್ಪೊವೊ ಅವನಲೋ! ಇಲ್ಲೆ... ಯಜಮಾನಂಗ್ ನಾಡ ಮೀದ ಜಾಸ್ತಿ ಕುಸಿ, ಆಸೆ, ಪ್ರೀತಿ ಬಪ್ಪನ್ನನೆ ಎನ್ನೇಂಗೊಂದ್ ಮಾಡಂಡು...! ಇನ್ನೆಲ್ಲಾ ಬೇರ್‌ಚಿಟ್ವೊತಾಯಿ, ಆಯಿ... ನೇರ ಪೊಲ್‌ಂದತ್. ಅಕ್ಕಣೆ ಅದೊಂಗೊರ್ ಉಪಾಯ ಉದಿಚತ್. ತೈರಕೋಳಿ ಇಕ್ಕ ಕೂವ, ಅದ್ ಕೂಂದಿತ್ ಯಜಮಾನನ ಒಪ್ಪಿರ್‌ತ್. ಊಹುಂ... ಅದ್ ಕೂವಾಂಗಿಂಜ ಮಿಂಞ ನಾನೇ ಯಜಮಾನನ ಒಪ್ಪಿರುವಿ. ಕತ್ತೆ ಜೋರ್‌ಲ್ ಅರ್‌ಪಕ್ ಸುರು ಮಾಡ್‌ಚಿ. ಒರ್ ಕುರಿ, ದಂಡ್ ಕುರಿ, ಮೂಂದ್ ಕುರಿ!! ಕೆಮಿ ತೂತಾಪನ್ನನೆ ಅರ್‌ಂದತ್! ಸೀನಪ್ಪ ವರ್‌ಕಲಿಂಜಂವೊ ನೆಚ್ಚಿತ್ ಎಚ್ಚರಾಚಿ. ನರಿ ಎನ್ನೇಂಗಿ ಬಂದಿತಿಕ್ಕೊಂದ್ ದಡಬಡ ಏವಂಜಿ, ಕೊಟ್ವೊಕಪ್ಪರ ಓಡ್‌ಚಿ! ಅವನ ಕಂಡಿತ್ ಕೊಟ್ವೊಲ್ ಕತ್ತೆ ಬಾಲ್ ಆಟ್‌ಚಿ; ಮಂಡೆ ಕುಲ್‌ಕಚಿ; ಸೀನಪ್ಪ ಒಂದೂ ಕಾಂಗತಿಪ್ಪಕ, ಮುಂಡತೆ ವಾಪಾಸ್ ಪೋಚಿ. ಕತ್ತೆಕ್ ತಡ್‌ಪ ಕಯ್ಯತ ಕುಸಿ ಆಯಿರ್‌ತ್.

ಮೇವಕ್ ಬುಟ್ಟಿತಿಪ್ಪಕ ಕತ್ತೆ ಕೋಳಿನ ಕೇಟತ್ “ಕಂಡಿಯಾ..., ಇಂದ್ ಪೊಲಾಕ ಯಜಮಾನನ ನಾನ್ ಎಚ್ಚರ ಮಾಡಿಯೆ... ಬಟ್ಟೆ ಕೆಟ್ವೊ ಪೊರ್‌ತಿಯದೂ ನಾನೇ. ಇಕ್ಕ ಎಣ್ಣೆ, ದಾಡ ಮೀದ ಕುಸಿ ಜಾಸ್ತಿಂದ್?” ಕತ್ತೆರ ತಕ್ಕೊಕ್ ಕೋಳಿ ಸದ್ದೇ ಮಾಡ್‌ಲೆ.

“ನಾನ್ ನೀಡ ಕೆಲಸ ಮಾಡುವಿ. ನೀಕ್ ನಾಡ ಕೆಲಸ ಮಾಡುವ ಕಯ್ಯುವಾ...? ನೋಟಿಯಂಡಿರ್..., ಚೆನ್ನಂಗೇ ದಿವಸತ್, ನೀಡಗುಂಡ್ ಪ್ರಯೋಜನ ಇಲ್ಲೆಂದ್ ನೆರ್‌ಚಿತ್ ತಿಂಬ ನಿನ್ನ!” ಕತ್ತೆ ಅಹಂಕಾರತ್ ತೆಳಿಚತ್.

ಪಿತ್ಯಾಂದೂ ಕತ್ತೆ ಪೊಲಾಕನೇರ್ತೆ ತೈರಕೋಳಿ ಕೂವಾಂಗಿಂಜ ಮಿಂಗಳೇ ಜೋರ್‌ಲ್ ಅರ್‌ಂದತ್! ಸೀನಪ್ಪ ಅಂದೂ ಬೊತ್ತಿತ್ ಎದ್ದಿತ್ ಓಡ್‌ಚಿ. ಕತ್ತೆ ಅವನ ಕಂಡಿತ್ ಬಾಲ್ ಆಡ್‌ಚಿಟ್ಟತ್! ಸೀನಪ್ಪಂಗ್ ಎಲ್ಲಿಂಜತೋ ಚಡಿ, ಪಕ್ಕತ್‌ಲೇ ಬುದ್ದಿತಿಂಜ ದೊಣ್ಣೆ ಎಡ್‌ತಂಡ್ ಕತ್ತೆರ ಮೂಡ್-ಮುಸುಣೆ ನೋಟತೆ ಪುರ್ಕ ಬಾಟ್‌ಚಿ. ಕಯ್ಯುವಚ್ಚಕ್ ಬಾಟ್‌ನ ಪಿಂಞ ಇಂಞೊಮ್ಮ ಇನ್ನನೆ ಅರ್‌ಂದಕ, ತೊಂಡೆನ ನೆಕ್ಕಿರುವಿ..., ಎಚ್ಚರಾಂದ್ ಒಳ್‌ಕ್ ಪೋಚಿ! ಅಂದ್ ಮಜ್ಜಣ ಮೇವಕ ಕೋಳಿ ಕತ್ತೆರ ಪಕ್ಕ ಬಾತ್ -

“ಓ... ನಮಸ್ಕಾರ ಕತ್ತೆಯಣ್ಣಾ....” ಇಂದ್ ಪೊಲಾಕ ನೀಡ ಮೀದ ಯಜಮಾನಂಗ್ ವಿಪರೀತ ಪ್ರೀತಿ ಬಂದಿತಿಂಜನ್ನಕೆ ಕಂಡತ್. ಗೊತ್ತಾಚಿಲ್ಲ ದಾಡ ಮೀದ ಪ್ರೀತಿ ಜಾಸ್ತಿಂದ್; ದೇವ ಎಲ್ಲಾರ್‌ಕೂ ಓರೋರ್ ತರತ್‌ರ ಶಕ್ತಿ ತಂದಿತಿಪ್ಪ, ನಾಕ್ “ಕೊಕ್ಕರೇ ಕೋ”ಂದ್ ಕೂವ ಶಕ್ತಿ ಉಂಡ್. ನೀಕ್ ಕೆಟ್ಪ್ ಪೊರ್‌ಪ ಶಕ್ತಿ ಉಂಡ್. ದೇವ ನಂಗಕ್ ತಂದ ಶಕ್ತಿನ ಮಾತ್ರ ಕಾಟ್‌ಚೇಂಗಿ ಮದಿ!”

“ಮಾಘ್ ಮಾಡ್ ಕೋಳಿಯಣ್ಣಾ... ಇಂಞ ಮಿಂಞಕ್ ನೀನೇ ಕೂಂದಕ ಮದಿ... ನಾನ್ ನಾಡ ಕೆಲಸ ಮಾತ್ರ ಮಾಡುವಿ...” ಕತ್ತೆ ಮಂಡೆ ಬಗ್ಗ್‌ಚಿಟ್ಟಿಂಡ್ ಎಣ್ಣೆ ಚಿ. ತೈರಕೋಳಿ ಕತ್ತೆನ ಸಮಾಧಾನ ಮಾಡ್‌ಚಿ. ಅಲ್ಲಿಂಜ ಅವು ಒಮ್ಮೆ ಲೂ ಜಗಳಾಡತೆ, ಅಯಿಂಡಯಿಂಡ ಕೆಲಸ ಮಾಡಿಯಂಡ್ ಇಂಜತ್.

* * *

ಮೂಂದಾಳ್‌ಕ್ ಮೂಂದಾಳ್

ಮುತ್ತನಾಡ್‌ರ ಮುತ್ತಪ್ಪಂಗ್ ಮೂಂದ್‌ಕ್‌ಣ್ಣ ಮಕ್ಕ. ಅವ್ವ ಇಲ್ಲತ ಮಕ್ಕಾಂದ್, ಚೆನ್ನಂಗ್ ಕೋಪಟೆಲ್ ಚಾಕ್‌ನದೇ ಬಂದ. ಪೆರ್ತ್ ಸೋಮಾರಿಯ ಳಾಯಂಡ್, ಕಾಲ ಕಯಿಚಂಡ್ ಇಂಜತ್ ಮಕ್ಕ. ಬಲ್ಯಯಿಂಗ ಆಚೇಂಗಿಯೂ ಒರ್ ಪಣಿ ಕೆಯ್ಯುವ ಇಂಜಿಲೆ! ಮುತ್ತಪ್ಪ, ಪಾಪ ಕೂಲಿ ಮಾಡಿತ್ ಧಡಿಯಂಗಳ ಚಾಕಿಯಂಡಿಂಜತ್. ಮಕ್ಕಡ ಈ ಸೋಮಾರಿತನಗುಂಡ್ ಮುತ್ತಪ್ಪ ಎಕ್ಕಲೂ ಬೇಜಾರತ್ ಇಪ್ಪಯಿಂಜತ್. ಅಂದೋರ್ ದಿನ ಅಂವೊ ಪಣಿ ತೇತಿತ್ ವಾಪಾಸ್ ಬಂದಂಡಿಂಜತ್. ನಡ್‌ಂದ್ ನಡ್‌ಂದೇ ಸುಸ್ತಾಪಕ, ಒರ್ ಮರತ್‌ರಡಿಲ್ ಅಳ್‌ತತ್. ಚೆನ್ನ ನೇರ ಕಯ್ಯುವದು, ಇಂಞೊಬ್ಬೊ ಅದೇ ಮರತ್‌ರಡಿಲ್

ಬಂತಳ್ತತ್. ಅವಂಗೂ ವಯಸ್ಸಾಯಿತಿಂಜತ್. ಎನ್ನತೋ ಬೇರತ್ ಮುಳೀತಿಂಜ ವಂಡನ್ನನೆ ಕಾಂಬಯಿಂಜತ್.

ಮುತ್ತಪ್ಪ ಮೆಲ್ಲೆ ಅವನ ತಕ್ಕ ಪರಿಚಿಟ್ಟತ್ - "ನಿಂಗ ದಾಡ... ಇದ್‌ಂಗ್ ಮಿಂಞ ನಿಂಗಳ ಎಲ್ಲಿಯೋ ಕಂಡನೆಕೆ ಆಯಂಡುಂಡಲ್ಲಾ...?"

"ನಾಡ ಪೆದ ಪೊನ್ನಪ್ಪ, ಬೇರಳಿನಾಡ್‌ಂಜ ಬಂದಿಯೆ."

"ಅಕ್ಕುವಾ..., ನೇರ ಇರ್‌ಟಾಪಕಾಯಿತ್. ಬೇರಳಿನಾಡ್‌ಂಜ ಮುತ್ತನಾಡ್‌ಕ್ ಈ ನೇರಕ್ ಬರಂಡಿಕೆ ಎನ್ನೋ ಬಲ್ಯ ಸಂಗತಿಯೇ ಇಕ್ಕು ಕಾಂಬಲ್ಲಾ...?"

"ಅಕ್ಕುವಣ್ಣಾ..., ಮನೆಲ್ ವಯಸ್ಸಕ್ ಬಂದ ಮೂಂದ್ ಮೂಡಿಮಕ್ಕ...; ದಾಕೂ ಮಂಗಲಾಯಿತ್‌ಲ್ಲೆ. ಈ ಊರ್‌ಲ್ ಏದೇಂಗಿ ತಂದ್ ಇಕ್ಕುವಾಂದ್ ನೋಟಿಯಂಡ್ ಬಂದ. ಪಣ, ಪೌನ್ ಇಲ್ಲೇಂಗಿ ದಾರೂ ಮೂಸುಲೇಂದ್, ತಕ್ಕಮಟ್ಟಿಗೆ ಎಲ್ಲಾ ಮಾಡಿತ್ ಬೆಚ್ಚಿಯೆ. ಆಚೇಂಗಿ, ನಾಡ ಮೂಂದ್ ಮೂಡಿಯಕ್ ಬಾಯಿ ಏರ...; ಅಯಿಂಗಳ ಗೊತ್ತುಳ್ಳ ದಾರೂ ಮಂಗಲ ಕಯಿಪಕ್ ಮಿಂಞಕ್ ಬಪ್ಪುಲೆ."

"ಒರ್ ಲೆಕ್ಕತ್ ನಂಗ ದಂಡಾಳೂ ಮಕ್ಕಳುಂಡ್ ಕೆಟ್ಟತ್ ಪೊನ್ನಪ್ಪಣ್ಣಾ. ನಾಕೂ ಮೂಂದ್ ಕ್ಕಣ್ಣಮಕ್ಕ... ಉಂಬಕ್ ತಿಂಬಕಾಯಿತೇ ಪುಟ್ಟಾನಂತ ತೀನಿಮಾರಿಯ. ಈ ಮುದಿವಯಸ್ಸಲ್ ನಾನ್ ನೈಚಿತ್ ಮಕ್ಕಳ ಚಾಕಿಯಂಡ್ ಉಳ್ಳೊ. ನಾನ್ ಒರ್ ತಕ್ಕ ಎಣ್ಣುವಿ. ನಿಂಗಕ್ ಮೂಂದ್ ಮೂಡಿಮಕ್ಕ ಉಂಡ್, ಎನ್ನನಾಚೇಂಗಿಯೂ ಬಾಯಿಕರ್ತಿಯಾಂದ್ ಎಣ್ಣೆಯುಂಡುಳ್ಳಿರ. ಅಯಿಂಗಳಗುಂಡ್ ನಾಡ ಮಾರಂಗಳ ಸೆರಿ ಮಾಡಿಚಿಟ್ಟಕ ಎನ್ನನೆ?"

ಮುತ್ತಪ್ಪಂಡ ತಕ್ಕ ಕೇಟಿತ್ ಪೊನ್ನಪ್ಪಂಗ್ ಕುಸಿಯಾಯಿರ್‌ತ್. ತೇಡಿಯಂಡ್ ಪೋನಬಳ್ಳಿ ಕಾಲಕ್ ಚಿಕ್ಕನನ್ನೆಕಾಚಿ! ಸೆರಿ... ಒರ್ ದಿನ ಪೊನ್ನಪ್ಪನೂ, ಮುತ್ತಪ್ಪನೂ ಕೂಡಿಯಂಡ್ ಮೂಂದಾಳ್ ಸೋಮಾರಿಯಕ್, ಮೂಂದಾಳ್ ಬಾಯಿಕರ್ತಿಯಳ ಮಂಗಲ ಕಯಿಚತ್. ದಿನ ಕಯಿಂಜತೇಂಗಿಯೂ, ಮಕ್ಕ ನೈಚಿತ್ ಕೊಂಡಬಪ್ಪದ್ ಕಾಂಗತೆ ಮುತ್ತಪ್ಪ ಮೋನಿಯಂಗಳ್ ಎಣ್ಣೆ ಚಿ -

"ಇಂಞ ಇನ್ನನೆ ನಿಂಗ ಮನೆಲ್ ಕಾಲ ಕಯಿಪದ್ ಸೆರಿ ಇಲ್ಲೆ; ಮಿಂಞಕ್ ನೈಚಿತ್ ನಿಂಗ ನಿಂಗಡ ಸಂಸಾರತ್‌ನ ನಿಂಗಳೇ ನೋಟಿಯೋಂಡು."

ಮುತ್ತಪ್ಪಂಡ ತಕ್ಕ ಮಕ್ಕಡ ಕೆಮಿಕೇ ಪೋಯಿಲೆ. ಇಯಂಗಳ್ ಬುದ್ಧಿ ಎಣ್ಣುವಾಂಗಿಂಜ ಮೈಮಕ್ಕಕ್ ಎಣ್ಣುವದ್ ನಲ್ಲದ್‌ಂದ್ ತೋಂದ್‌ಚಿ ಮುತ್ತಪ್ಪಂಗ್!

ಪಿತ್ಯಾಂದ್ ಮುತ್ತಪ್ಪ ದಾರ್ಕೂ ಕಾಂಗತನ್ನನೆ ಓರೋರೆ ಮೈಮಳ ಕಾಕಿತ್ ಒರ್ ಗುಟ್ವ ಎಣ್ಣೆ ಕೊಡ್ತತ್. ಅಂದ್ ಬೈಟ್ ಎಲ್ಲಾ ಕೋಂಬರೆಲ್ ತಕ್ಕ-ಬಾಕ್ ಸುರುವಾಚಿ. ಮೂಂದಾಳೂ ವಡಿಯಂಗಡ ಮಂಡೆ ತಿಂದತ್.

“ನಿಂಗ ಪೆರ್ತ್ ಸೋಮಾರಿಯ, ನಾಡ ಅಕ್ಕತಂಗಿಯಡ ವಡಿಯಂಗಳ ನೋಟಿ. ಮಂಗಲಾನ ಪಿಂಞ ಅಯಿಂಡ ಅಯಿಂಡ ಪೊಣ್ಣ್ ಕ್ ಎನ್ನತೆಲ್ಲಾ ಎಡ್ತ ಬಂದಿತ್ ಕೊಡ್ತಿತ್. ಪುದಿ ಪುದಿಯ ಬಟ್ಟೆ, ಮಾಲ್ಮಟಿ, ಎಲ್ಲಾ ಎಡ್ತ ಬಂದಿತ್ ಕೊಡ್ತಿತ್. ನಿಂಗ ಮಾತ್ರ ನಾಕ್ ಒಂದೂ ಎಡ್ತ ಬಂದಿತ್ ತಪ್ಪುಲೆ” ಎಣ್ಣೆಯಂಡ್ ಮೊರ್ಡ್ವ ಕೂಡ್ಚಿ.

“ಓಹೋ ಅಕ್ಕುವಾ, ಆ ಕಳ್ಳಂಗ ನೈಚಿತ್ ಕಾಸ್ ಸಂಪಾದನೆ ಮಾಡ್ವಕ್ ಸುರು ಮಾಡಿರ್ತಾ? ಚದ್ವ್ ಮೊರ್ಡತೆ. ನಾಳೆ ನಾನ್ ಪಣಿಕ್ ಪೋಯಿತ್ ನೀಕ್ ಬೋಂಡಿಯಾನೆಲ್ಲಾ ಎಡ್ತ ಬಂದಿತ್ ತಪ್ಪಿ” ಸಮಾಧಾನ ಮಾಡ್ಚಿ ವಡಿಯ!

ಇದೇ ತಕ್ಕ - ಬಾಕ್ ಎಲ್ಲಾ ಕೋಂಬರೆಲ್ ನಡ್ಂದತ್. ಪಿತ್ಯಾಂದ್ ಪೊಲಾಕ ಮುತ್ತಪ್ಪಂಡ ಮೂಂದ್ ಮಕ್ಕ, ಬೋರೆ ಬೋರೆ ನೇರತ್, ಬೋರೆ ಬೋರೆ ದಿಕ್ಕಲ್ ಪಣಿಕೆಯ್ಯುವಕ್ ಪೋಚಿ. ಮುತ್ತಪ್ಪಂಡ ಗುಟ್ವ ನಲ್ಲ ಕೆಲಸ ಮಾಡ್ಚಿ! ಬೈಟಾಪಕ ಮೂಂದಾಳೂ ಕೈದುಂಬಾ ಸಾಮಾನ್ ಎಡ್ತಂಡ್ ಬಾತ್. ಮುತ್ತಪ್ಪ ಎಚ್ಚಕೋ ದಿನತಿಂಜ ಕಾತಂಡಿಂಜ ನೇರತ್ನ ಕಂಡಿತ್ ಕುಸೀಲ್ ಪಾಟ್ ಪಾಡ್ಚಿ!

*

*

*

ಪಾರಿವಾಳ ಪಿಂಞ ಮರಿಯ

ಕಡಿಯತ್ನಾಡ್ ತಿಮ್ಮಯ್ಯಂಡ ಬೇಲ್ರ ಪಕ್ಕ ಒರ್ ಪಾರಿವಾಳ ಪಿಂಞ ಅದ್ಂಡ ದಂಡ್ ಕುಂಞಿಯ ಮರತ್ಲ್ ವಾಸ ಮಾಡಿಯಂಡಿಂಜತ್. ಮರಿಯ ಚುಪ್ಪಿ - ಚುಪ್ಪಿ ಆಯಿತಿಂಜಾನಗುಂಡ್, ಪಾರಿವಾಳ ತಿಂಬಕ್ ತೇಡಿಯಂಡ್ ಪೊರ್ಮೆ ಪೋಪಯಿಂಜತ್.

ಅಂದ್ ಪೋಪಕ್ ಮಿಂಞ ಅದ್ ತಾಂಡ ಮಕ್ಕಕ್ ಇನ್ನನೆ ಎಣ್ಣೆತ್ ಪೋಚಿ- “ಕುಂಞಿಯಳೇ, ಇಲ್ಲಿ ದಾರೇಂಗಿ ಬಾತೇಂಗಿ, ಅಲ್ಲತ ಪೋನಕ, ದಾರೇಂಗಿ ಎಂತೇಂಗಿ ಪರ್ಂದಕ ನಾಕ್ ಎಣ್ಣೆತರಂಡು”. ಸೆರಿ, ಚುಪ್ಪಿಮರಿಯ ದಾರೇಂಗಿ ಬಕ್ಕುವಾಂದ್ ನೋಟಿಯಂಡಿಂಜತ್.

ಚೆನ್ನಂಗೇ ನೇರತ್ ಬೇಲಾರ ಯಜಮಾನ ತಿಮ್ಮಯ್ಯ ಮೋವಂಡ ಕೂಡೆ ಮರತ್‌ರಡಿಲ್ ತಕ್ಕ್ ಪರ್‌ಂದಂಜಿಂಜತ್. "ಬೋಳೆ ಕೊಯ್ಯುವಕ್ ಸಮಯ ಆಯಿತ್... ಮೋನೆ ನಂಗಡ ನೆರೆಕರೆಲುಳ್ಳಯಿಂಗಳೆಲ್ಲಾ ನಾಳೆಕ್ ಬಪ್ಪಕೆಣ್ಣ್... ಕೊಯ್ಯನೆ ಸುರು ಮಾಡನಾಂದ್ ಎಣ್ಣ್‌ಚಿ. ಇಯಂಡ ತಕ್ಕ್ ಕೇಟಿತ್ ಚುಪ್ಪಿ ಮರಿಯ ಬೊತ್ತಿತ್ ಗಾಡ್‌ತತ್. ಕೊಯ್ಯನೆ ಆಯಿಟಕ ನಂಗಕ್ ನಾಳೆಂಜ ತಿಂಬಕ್ ಒಂದೂ ಕಟ್ಟತಾಯಿರ್‌ವಲ್ಲಾಂದ್ ಅಯಿಂಡ ಬೇರ! ಅವ್ವೊ ಬಪ್ಪಾನೇ ಕಾತಂಜಿಂಜತ್.

ಅಂತೂ ಅವ್ವೊ ಬಂದನ್ನಕೆ ನಡಂದಾನೆಲ್ಲಾ ಅವು ಮೊರ್‌ಟಂಡ್ ಎಣ್ಣ್‌ಚಿ. "ಅಮ್ಮಾ ಅಮ್ಮಾ, ನಂಗಳ ಬೋರೆ ಜಾಗಕ್ ಕೂಟಿಯಂಡ್ ಪೋಂದ್ ತಬ್ಬಿಯಂಡತ್. ಅವ್ವ ಪಾರಿವಾಳ ಮಕ್ಕಳ ನೋಟಿತ್ ಬೇಜಾರತ್‌ರ ಕೂಡೆ ತೆಳಿಯೂ ಬಾತ್.

"ಅಯ್ಯೋ ಬೊತ್ತತಿ ಮಕ್ಕಳೇ, ತಿಮ್ಮಯ್ಯ ನೆರೆಕರೆಕಾರಕ್ಕೆಲ್ಲಾ ಕಾತಂಡುಂಡೇಂಗಿ ನಾಳೆ ಕೊಯ್ಯನೆ ಆಪಕ್ ಸಾಧ್ಯ ಇಲ್ಲೆ. ನಿಂಗ ಬೊತ್ತತೀ" ಅವ್ವ ಸಮಾಧಾನ ಮಾಡ್‌ಚಿ.

ಎಣ್ಣೆನಕೆಯೇ ತಿಮ್ಮಯ್ಯ ಪೊಲಾಕ ಬೇಲಾರ ಪಕ್ಕ ನೆರೆಕರೆಕಾರ್ ಪಾರಕಾತತ್. ಮಜ್ಜಣಾಚೇಂಗಿಯೂ ನೆರೆಕರೆಕಾರ ಬಂದದೇ ಇಲ್ಲೆ. ಅವಂಗ್ ಚೆಡಿ ಬಾತ್.

ಅಲ್ಲಿಂಜಿ ತಿಮ್ಮಯ್ಯ ಮೋವಂಗಣ್ಣ್‌ಚಿ - "ಮೋನೆ... ಈ ನೆರೆಕಾರಳ ನಂಬನಕ ಆಪುಲೆ... ನಾಳೆ ನಂಗಡ ಬೆಂದ್‌ಕಳೆಲ್ಲಾ ಕಾಕಿಯ ಬಾ. ಕೊಯ್ಯನೆ ಸುರು ಮಾಡನಾಂದ್ ಎಣ್ಣ್‌ಚಿ. ಪಾರಿವಾಳತ್‌ರ ಮರಿಯ ಅವ್ವಂಗ್ ವಿಷಯ ಎಣ್ಣ್‌ಚಿ.

ಅವ್ವ ಅಕ್ಕಲೂ ತೆಳಿಚೆಂಡೆಣ್ಣ್‌ಚಿ. "ಬೊತ್ತಿಯೋತಿ ಮಕ್ಕಳೇ, ತಿಮ್ಮಯ್ಯ ಬೆಂದ್‌ಕಳ ಕಾತಕ ನಾಳೆಯೂ ಕೊಯ್ಯನೆ ಸುರು ಮಾಡುವ ಕಯ್ಯಲೆ. ನಿಂಗ ಆರಾಮ್‌ಲ್ ಇರಿ" ಮಕ್ಕಕ್ ಸಮಾಧಾನ ಮಾಡ್‌ಚಿ. ಪಿತ್ಯಾಂದೂ ತಿಮ್ಮಯ್ಯ ಬೇಲಾರ ಪಕ್ಕ ಕಾತಂಡ್ ನಿಂದತ್. ಒರ್ ಬೆಂದ್‌ಕಳೂ ಬಂದ್‌ಲೆ. ಅವಂಗ್ ಚೆಡಿ ಬಾತ್. ಮೋವಂಗಣ್ಣ್‌ಚಿ -

"ನಾಳೆ ದಾರ್‌ಕೂ ಕಾಪದ್ ಬೋಂಡ. ಆಪಚ್ಚಕಾಡ್, ಪೊಲಾಕ ನಂಗ ದಂಡಾಳೇ ಕೊಯ್ಯನ. ಅಯಿಂಗಳ - ಇಯಂಗಳ, ನಂಬನಕ ನಂಗಡ ಪಣ ಸಾಗುಲೇಂದ್ ಎಣ್ಣೆತ್ ತಿಮ್ಮಯ್ಯ ಪೋಚಿ! ಪಾರಿವಾಳ ಮರಿಯ ಅವ್ವ ಬಂದನ್ನನೆ ವರದಿ ಒಪ್ಪ್‌ಚಿತ್ತಿತ್.

“ಅಂದಕ ನಾಳೆ ತಿಮ್ಮಯ್ಯ ಕೊಯ್ತುಣಿ ಸುರು ಮಾಡಿರುವ. ನಂಗ ಇಲ್ಲಿಂಜ ಜಾಗ ಖಾಲಿ ಮಾಡುವದೇ ನಲ್ಲದೇಂದ್ ಪಾರಿವಾಳ ತಾಂಡ ಮಕ್ಕಳ ಕೂಟಿಯಂಡ್ ಬೋರೆ ಜಾಗಕ್ ಪೋಚಿ.



ನೈಚ ದುಡ್ಡ್

ತಾಳೇರಿನಾಡ್ ಆಚಾರಿರ ಮೋಂವೊ ಸಂಕ್ರು. ಅಪ್ಪೊ ಅಪ್ಪೊ ನೈಚಿತ್ ಎಡ್ತ ಬಂದಾನ ತಿಂದಂಡ್ ಕಾಲ ಕಯಿಚಂಡ್ ಇಂಜತ್.

ಆಚಾರಿಕ್ ವಯಸ್ಸಾಯಂಡ್ ಬಾತ್. ಒರ್ ದಿನ ಮೋಂವೊನ ಕಾಕಿತ್ಲೆಚಿ “ನೋಟಪ್ಪಾ ಸಂಕ್ರು, ನೀನ್ ಇಂದ್ಂಜ ಪಣಿಕೆಚ್ಚಿತ್ ಸಂಪಾದನೆ ಮಾಡಂಡು. ಇಲ್ಲತ ಪೋಚೇಂಗಿ ನೈಚಿತ್ ಕೂಟ್ನಾನ ನೀಕ್ ತಪ್ಪುಲೆ. ತೇರಾ ದಾನ ಮಾಡಿರುವಿ”. ಅಪ್ಪಂಡ ಪಿರಿಪಿರಿ ಕೇಟಿತ್ ಸಂಕ್ರು ಪಿತ್ಯಾಂದ್ ಪಣಿಕ್ ಪೋಪಕ್ ಪೊರಟತ್. ಅಪ್ಪಂಗ್ ಕಾಂಗತನ್ನನೆ ಅವ್ವಂಡ ಕೈಲಿಂಜ ಚೆನ್ನ ದುಡ್ಡ್ನ, ಕೂಪೊದಿಯೂ ಕೇಟಂಡತ್. ಚೆನ್ನ ದೂರ ಪೋಯಿತ್ ಕೂಪೊದಿನ ಉಂಡಿತ್, ಮರತ್‌ರಡಿಲ್ ಆರಾಮ್‌ಲ್ ಬುದ್ಧಂಡ್ ವರಿತ್, ಬೈಟಾಪಕ ಬಾತ್. ಪೊಲಾಕ ಎಡ್ತ ಪೋನ ದುಡ್ಡ್ನ ಅಪ್ಪಂಗ್ ಕೊಡ್ತತ್. ಆಚಾರಿ ದುಡ್ಡ್ನ ಕೇಟಂಡ್ ಒಮ್ಮ ಮೂಸಿ ನೋಟಚಿ. ಅಂತೂ ದುಡ್ಡ್ನ ಕತ್ತಿಯಂಡಿಂಜ ಒಲೆಕ್ ಚಾಡಿರ್ತ್. ಮೋಂವೊ ನೋಟಿತ್, ಸದ್ದಿಲ್ಲತೆ ಕೋಂಬರೆಕ್ ಪೋಚಿ!

ಪಿತ್ಯಾಂದೂ ಸಂಕ್ರು ಪಣಿಕ್ ಪೋಪೀಂದೆಣ್ಣಿತ್, ಅವ್ವಂಡ ಕೈಲಿಂಜ ದುಡ್ಡ್ನ ಕೇಟಂಡತ್. ಅಂದೂ ಅಂವೊ ಕುಂದ್‌ಲ್ ಅಳ್ತಂಡ್ ಕಾಲ ಕಯಿಚಿತ್ ಬಾತ್. ಬೈಟಾಪಕ ಅಪ್ಪಂಗ್ ದುಡ್ಡ್ನ ಕೊಡ್‌ವಕ, ಅಪ್ಪೊ ವುನಾದಿಯ ಒಲೆಕ್ ಚಾಡಿರ್ತ್. ಆಚಾರಿ ಮೋಂವೊಗೆಣ್ಣಿಚಿ “ನೋಟಪ್ಪಾ ಕಷ್ಟಪಟ್ಟಿತ್ ಸಂಪಾದನೆ ಮಾಡತ ಪೋಚೇಂಗಿ ನೀಕೇ ಕಷ್ಟ ನೋಟ್!” ಸಂಕ್ರು ಸದ್ದಿಲ್ಲತೆ ಉಂಬಕ್ ಅಳ್ತತ್.

ಮೂಂದನೇ ದಿನ ಮೋಂವೊ ಪೋಪಕ..., ಅವ್ವಂಡ ಕೈಲಿಂಜ ದುಡ್ಡ್ನ, ಕೂಪೊದಿಯೂ ಕೇಟಿತ್. ಅಪ್ಪೊ ಮೋಂವಂಡ ಪರ ವಹಿಸುವಕಾಗಾಂದ್ ತೀರ್ಮಾನ ಮಾಡ್‌ಚಿ! ಮೋಂವಂಗ್ ಬಜ್ಜಿರುವಂಜಿ, ಬೋರೀ ಕೈಯಿಲ್ ಅಯೆಚತ್. ಸಂಕ್ರು ಪೊರಟ್ ಪೋಚಿ. ಬೋರೆ ಬಟ್ಟೆ ಕಾಂಗತೆ ಊರ್‌ರ ಪಣಕಾರಂಡಲ್ಲಿ ಪಣಿ ಕೇಟಿತ್. ಪಣಕಾರ ಅವಂಗ್ ಪಣಿ ಕೊಡ್ತತ್. ಸಂಕ್ರು

ಪಣಿ ಸುರು ಮಾಡ್‌ಚಿ. ಪುಳ್ಳಿ ಕೆತ್‌ಚಿ, ಗೊಬ್ಬರ ಕಡ್‌ತಚಿ, ತೋಟ ಕಳ್‌ತತ್. ಇನ್ನನೇ ಒರ್ ವಾರಕೆತ್ತನೆ ಅಲ್ಲಿ ಕೂಡಿಯಂಡತ್. ವಾರತಾರ ಆಖೀರಿಲ್ ಸಾಹುಕಾರ ಸಂಕ್ರುಕ್ ಕೈದುಂಬಾ ದುಡ್ಡ್ ಕೊಡ್‌ತತ್.

ಸಂಕ್ರು ಕುಸೀಲ್ ಎಡ್‌ತ ಬಂದಿತ್ ದುಡ್ಡ್‌ನ ಅಪ್ಪಂಡ ಕೈಕ್ ಕೊಡ್‌ತತ್. ಆಚಾರಿ ಅದ್‌ನ ಎಡ್‌ತಿತ್ ಕತ್ತಿಯಂಡಿಂಜ ಒಲೆಕ್ ಚಾಡಿರ್‌ತ್. ಅದ್‌ನ ಕಂಡಿತ್ ಕೂಡೆನ್ನೆ ಮೋಂವೊ ಕೂತ್‌ಟ್ಟತ್ - "ಅಯ್ಯೋ ಅಪ್ಪಾ... ಎಂತ ಮಾಡಿಟಿಯಾ, ಒರ್ ವಾರ ಕಷ್ಟಪಟ್ಟಿತ್ ನೈಚಿತ್ ಕೊಟ್ಟನ ದುಡ್ಡ್ ಅದ್. ಸುಲಭತ್ ತಿತ್‌ಕೊಟ್ಟಿಟಿಯಲ್ಲಾ..., ಆಂಡ ಬೆಲೆ ಗೊತ್ತಾ ನೀಕ್?" ಸಂಕ್ರು ಒಲೆರ ಮಿಂಞಲ್ ಅಳ್‌ತಂಡ್ ಗೋಳೋಂದ್ ಮೊರ್‌ಟಂಡ್ ದುಃಖ್‌ಚಿಟ್ಟತ್!

ಆಚಾರಿ ತೆಳಿಚಂಡ್ ಎಣ್ಣೆಚಿ. "ಕುಂಞೀ... ಇಕ್ಕ ನಾಕ್ ಗೊತ್ತಾಚಿ... ಇದ್ ನೀನ್ ನೈಚಿತ್ ಎಡ್‌ತ ಬಂದ ಪಣಂದ್! ಬೆವರ್ ಬೂಕಿತ್ ಕೊಂಡ ಬಂದ ಪಣಕ್ ಎಚ್ಚಕ್ ಬೆಲೆ ಉಂಡ್‌ಲೆಂದ್ ನೀಕಿಂದ್ ಗೊತ್ತಾಚಿಲ್ಲಾ; ಕುಸಿಯಾಚಿ ನಾಕ್. ನಾನ್ ಸಂಪಾದನೆ ಮಾಡ್‌ನ ಎಲ್ಲಾ ಸೊತ್ತ್ ಇಂದ್‌ಂಜ ನೀಕೇ ಕೂಡುವ".

ಸಂಕ್ರುಕ್ ಅಪ್ಪಂಡ ತಕ್ಕ ಕೇಟಿತ್ ಸಮಾಧಾನ ಆಚಿ. ಅಂದ್‌ಂಜ ಅಂವೊ ಎಂದೂ ಕಷ್ಟಪಟ್ಟಿತ್ ನೈಪಕ್ ಸುರು ಮಾಡ್‌ಚಿ.

*

*

*

ಚಂದ್ರಂಡೊಳ್‌ಲ್ ಮೊನ!

ಪೌಂಬಳೆಕಾಡ್‌ಲ್ ಇಂಜ ಒರ್ ಮೊನ ನೋಟುವಕ್ ಪೆರ್ತ್ ಚಾಯಿಂಜತ್. ಆ ಮೊನತಾರ ಮೇಲ್ ಪಾಲಾರನ್ನನೆ ಬೊಳ್‌ತೀತೆ ಇಂಜತ್. ಅನ್ನನೇ ಅದ್‌ಂಡ ಮನಸ್ಸು ಇಂಜತ್. ಈ ಮೊನ ಬೋರೆ ಪ್ರಾಣಿಯಡ ಕೂಡ ಕೂಡುವಯಿಂಜ್‌ಲೆ. ಎಲ್ಲಿಯಾಚೇಂಗಿ ಒಂಟಿಯಾಯಿತ್ ದೇವಳ ಗೇನ ಮಾಡ್‌ವಯಿಂಜತ್. ಚುಳಿಗರಿಕೆನ ಮಾತ್ರ ತಿಂಬಯಿಂಜತ್. ಅದ್‌ಂಗ್ ಚೆಡಿಯೇ ಬಪ್ಪಯಿಂಜ್‌ಲೆ! ದಾಡ ಕೂಡೆಯೂ ಜಗಳ ಮಾಡಿಯಂಡ್ ಇಂಜಿಲೆ. ಪೊಟ್ಟ ಪರ್‌ಂದಂಡ್ ಇಂಜಿಲೆ. ಬೋರೆಯಯಿಂಡ ವಸ್ತುನ ಕಟ್ಟಿಂಡಿಂಜಿಲೆ. ಆ ಮೊನ ದೇವಳ ಗೇನ ಮಾಡುವಕ, ಬೋರೆ ಪ್ರಾಣಿಯಳುಂಡ್ ತೊಂದರೆ ಆಪಯಿಂಜಾನಗುಂಡ್, ಇಲ್ಲಿ ಇಪ್ಪದ್ ಬೋಂಡಾಂದ್ ಇರ್ಪುಕುಂದ್‌ಕ್ ಪೋಚಿ. ಅಲ್ಲಿ ನಲ್ಲೋರ್ ಜಾಗ ತೇಡಿತ್ ನೆಲೆ ನಿಂದತ್.

ಇಂದ್ರಂಗ್ ಈ ಮೊನತ್‌ನ ಪರೀಕ್ಷೆ ಮಾಡಂಡೂಂದ್ ತೋಂದ್‌ಚಿ. ಇಂದ್ರ, ಋಷಿರ ವೇಷ ಇಟ್ಟಂಡ್, ಇರ್ಪುಕುಂದ್‌ಕ್ ಬಾತ್. ಋಷಿನ ಕಂಡಿತ್ ಮೊನ ಕೇಟತ್ - "ಸ್ವಾಮೀ..., ನಾಡಗುಂಡ್ ನಿಂಗಕೆನ್ನೇಂಗಿ ಆಂಡಿಂಜತಾ...?"

"ಅಯ್ಯೋ ಮೊನವೇ., ನಿನ್ನಾಂದ್‌ಂಜ ಉಪವಾಸ, ಇಲ್ಲಿಯೆನ್ನೇಂಗಿ ತೀನಿ ಕ್‌ಟ್ವಾವಾಂದ್ ತೇಡಿಯಂಡ್ ಬಂದಿಯೆ" ಋಷಿ ಎಣ್ಣ್‌ಚಿ.

"ಸ್ವಾಮೀ ನಾಡಪಕ್ಕ ಗರಿಕೆ ಉಂಡ್. ಅದ್‌ನ ನಿಂಗ ತಿಂಬುಲೆ. ನಾಡ ಪಕ್ಕ ಬೋರೆ ಒಂದೂ ಇಲ್ಲೆ.... ಅಂದಕಲೂ, ನಾಡ ಯರ್ಚಿ ದುಂಬ್‌ನ ತಡಿ ಉಂಡ್... ಅದ್‌ನೇ ನಿಂಗಕ್ ಅರ್ಪ್‌ಚಿಡ್‌ವಿ. ನನ್ನ ತಿಂದಿತ್ ನಿಂಗ ತೃಪ್ತಿ ಪಟ್ಟೋಳಿ"ಂದ್ ಮೊನ ಎಣ್ಣ್‌ಚಿ!

"ಎಂತ..., ನೀಡ ತಡಿರ ಯರ್ಚಿನ ತಿಂಬದಾ...? ಅಂದಕಲೂ, ನಾಕ್ ನಿನ್ನ ಬೇವ್‌ಚಿಟ್ಟಿತ್ ತಿಂಬಕ್ ಮನಸ್ಸಾಯಂಡಿಲ್ಲೆ".

ಋಷಿರ ತಕ್ಕ ಕೇಟಿತ್ ಮೊನಕ್ ಬೇಜಾರಾಚಿ. ಅದ್‌ಂಗ್ ತಾಂಡ ಮಿಂಞಾಲುಳ್ಳದ್ ಸಾಕ್ಷಾತ್ ಇಂದ್ರನೇಂದ್ ಗೊತ್ತಲೆ! ಅಂತೂ ಎಣ್ಣ್‌ಚಿ - "ಸ್ವಾಮೀ... ಬೋಂಡಾಂದೆಣ್ಣಿತಿ...; ನಾಡ ಯರ್ಚಿನ ನಿಂಗ ತಿಂದಕ ನಾಕ್ ಮೋಕ್ಷ ಕ್‌ಟ್ಟುವ. ನಾಡ ಯರ್ಚಿನ ನಿಂಗ ಬೇವ್‌ಚಿಡಂಡ. ಅಲ್ಲಿ ನೋಟಿ... ಪುಳ್ಳಿತುಂಡ್ ಉಂಡ್... ನಾನ್ ಅದ್‌ನ ಗುಡ್ಡೆ ಮಾಡ್‌ವಿ. ನಿಂಗ ಅದ್‌ನ ಒಮ್ಮೆ ಮೆಲ್ಲೆ ಕತ್ತ್‌ಚಿಟ್ಟಕ ನಾನ್ ಅದ್‌ಂಗ್ ಪಾರುವಿ, ನಿಂಗ ಬಯ್ಯಂಜಿ ನನ್ನ ತಿಂದೋಲು" ಮೊನತ್‌ರ ತಕ್ಕಕ್ ಋಷಿ ಒತ್ತತ್.

ಮೊನ ಸುತ್ತಮುತ್ತ ಓಡಿತ್ ಪುಳ್ಳಿಕಡ್ಡಿ ಅಂಜಂಡ್ ಬಂದಿತ್, ಗುಡ್ಡೆ ಕೂಟಿತ್, ಋಷಿಕ್ ತಿತ್ ಕತ್ತ್‌ಚಿಡುವಕೆಣ್ಣ್‌ಚಿ! ಋಷಿ ಪುಳ್ಳಿನ ಕತ್ತ್‌ಚಿಟ್ಟತ್. ಮೊನ ತಿತ್‌ಕ್ ಪಾರುವಕ್ ತಯಾರಾಚಿ. ಪಾರುವಾಂಗಿಂಜ ಮಿಂಞ ಮೂಂದ್‌ಕುರಿ ತಾಂಡ ಮೇಲ್‌ನ ಕೊಡ್‌ಕ್‌ಚಿ.

ಋಷಿ ಕೇಟಿತ್ "ನೀಕ್ ತಿತ್‌ಕ್ ಪಾರುವಕ್ ಪೋಡಿಯಾಯಂಡುಂಡ್ ಕಾಂಬಲ್ಲಾ... ಬೋಂಡ ಬುಡ್".

ಮೊನ ಎಣ್ಣ್‌ಚಿ "ಇಲ್ಲೆ ಸ್ವಾಮೀ... ನಾಡ ಮೇಲ್‌ಲ್ ಎಂತೇಂಗಿ ಪುಳು-ಪಾತೆ ಇಕ್ಕೂ, ನಾನ್ ತಿತ್‌ಕ್ ಪಾರ್‌ವಕ ಅವು ಚತ್ತಪೋಕೂಂದ್ ಮೇಲ್‌ನ ಕೊಡ್‌ಕಿಯೆ". ಮೊನ ದೇವಳ ಗೇನ ಮಾಡ್‌ವಂಜಿ ತಿತ್‌ಕ್ ಪಾರ್‌ಚಿ! ಇಂದ್ರಂಗ್ ಕುಸಿಯಾಚಿ. ತಿತ್‌ಕ್ ಪಾರ್‌ನ ಮೊನಕ್ ಒಂದೂ ಆಯಿಲೆ. ಅದ್‌ಂಡ ತಡಿ

ಬೆಂಜಿತೂ ಇಲ್ಲೆ! ಮೊನಕ್ ಆಶ್ಚರ್ಯ! ಅಕ್ಕಣೆಕ್ ಋಷಿರ ವೇಷ ಮರೆಯಾಯಿತ್, ಇಂದ್ರ ತಾಂಡ ನೇರ್ ಸ್ವರೂಪತ್ ಪ್ರತ್ಯಕ್ಷ ಆಚಿ.

“ಓ ಮೊನವೇ, ನೀಡ ತ್ಯಾಗತ್‌ನ ನಾನ್ ಮೆಚ್ಚೊನ. ನಿನ್ನ ಪರೀಕ್ಷೆ ಮಾಡ್‌ವ ಕಾಯಿತ್ ಸ್ವರ್ಗತಿಂಜ ಬಂದ. ಕೇಳ್, ನೀಕ್ ಎಂತ ವರ ಬೋಂಡು. ನಾ ತಪ್ಪಿ...” ಇಂದ್ರಂಡ ತಕ್ಕ ಕೇಟಿತ್ ಮೊನ ಎಣ್ಣೆಚಿ -

“ದೇವಾ, ನಾಕ್ ಬೋರೆ ವರ ಬೋಂಡ. ನಾಡ ದಾನಬುದ್ಧಿ, ದೇವಳ ತುದಿಪ ಬುದ್ಧಿ ಅನ್ನನೇ ಇರಡ್ ಅಚ್ಚಿಕೇ”ಂದ್! ಇಂದ್ರ “ತಥಾಸ್ತು” ಎಣ್ಣೆಚಿ. ಮೊನತ್‌ರ ಮಾತ್ಯಾಗ ಲೋಕತ್‌ರ ಜನಕೂ ಗೊತ್ತಾಂಡು. ಅಕ್ಕಕ್ಕೆ ಇದ್‌ನ ನೆನತಿಯಂಡಿರಂಡು. ಸೂರ್ಯ, ಚಂದ್ರ ಇಕ್ಕಣೆಕೂ ಇದ್‌ಂಡ ಗುರ್‌ತ್ ಇಪ್ಪನೆಕಾಂಡುಂದ್ ಇಂದ್ರ ಗೇನ ಮಾಡಿತ್, ಅಪ್ಪರಿಪ್ಪರ ನೋಟ್‌ಚಿ. ಪಕ್ಕತ್‌ಲೇ ಒರ್ ಕುಂದ್ ಇಂಜತ್. ಅಕ್ಕ ಇಂದ್ರ ಆಕಾಶತ್‌ರ ಎತ್ತರಕ್ ಬೋಳ್‌ಂದತ್. ಅಂತೂ ಕುಂದ್‌ನ ಎಡ್‌ತಿತ್ ಅಂಗೈಲ್ ಬೆಚ್ಚಂಡ್ ದಂಡೂ ಕೈನ ಉದ್‌ಚಿ. ಅಕ್ಕ ಅದ್‌ಲ್ ಒರ್ ರಸ ಬಾತ್! ಆ ರಸತ್‌ಲ್ ಆಕಾಶತಿಂಜ ಬೋಳ್‌ತ ಚಂದ್ರಂಡ ಮೀದ ಈ ಮೊನತ್‌ರ ಚಿತ್ರ ಬುಡ್‌ತ್‌ಚಿ. ಮೊನ ತಾಂಡ ತ್ಯಾಗತ್‌ನಗುಂಡ್ ಇಂದ್ರಂಡ ಮೆಚ್ಚಿಗೆ ಪಡ್‌ಂದಿತ್, ಲೋಕಕೆಲ್ಲಾ ಕಾಂಬಕಾಚಿ. ಇಕ್ಕಲೂ ನಂಗ ಚಂದ್ರಂಡ ಮೀದ ಈ ಮೊನತ್‌ರ ಚಿತ್ರತ್‌ನ ಕಾಂಗಲು!

*

*

*

ಪೌನಾರ ನವಿಲ್

ಮರೆನಾಡ್‌ರ ಮೂಲೆಲ್ ಇಂಜ ಪಟ್ಟಿ ಚಾಮಿಕ್ ನಾಲ್ ಮೂಡಿಮಕ್ಕ. ದಾರ್‌ಕೂ ಮಂಗಲಾಯಿತಿಂಜಿಲೆ. ಪೆರ್ತ್ ಸಾಧು. ದಾರ್‌ಕೂ ಒರ್ ಕಷ್ಟ ಕೊಡ್‌ತಂವೊ ಅಲ್ಲ. ಧರ್ಮಿಷ್ಯನಾಯಿತ್ ಬದ್‌ಕಿಯಂಡಿಂಜತ್. ಇನ್ನೆ ಇಂಜಲ್ಲಿ, ಒರ್ ದಿನ ಅಂವೊ ಚತ್‌ಪೋಚಿ. ಪಟ್ಟಿತಿ ಪೆರ್ತ್ ಕಷ್ಟಪಟ್ಟಿತ್ ಮಕ್ಕಳ ಚಾಕಿಯಂಡಿಂಜತ್.

ಪಟ್ಟಿ ಕಯಿಂಜ ಜನ್ಮತ್ ಮಾಡ್‌ನ ಪುಣ್ಯ ಕೆಲಸತ್‌ನಗುಂಡ್ ಒರ್ ನವಿಲಾಯಿತ್ ಪುಟ್‌ಚಿ! ಆ ನವಿಲ್‌ಕ್ ಪೌನಾರ ಗರಿ ಇಂಜತ್.

ಒರ್ ದಿನ ಆ ನವಿಲ್‌ಕ್ ತಾಂಡ ಕಯಿಂಜ ಜನ್ಮತ್‌ರ ಗೇನ ಬಂದಿತ್ ಪೊಣ್ಣ್, ಮಕ್ಕ ಇಂಜಲ್ಲಿಕ್ ಪಾರಿಯಂಡ್ ಬಾತ್. ಮನೆಲ್ ಜನ ಕಷ್ಟತುಳ್ಳಾನ

ಕಂಡಿತ್ ಅದಾಂಗ್ ಪೆರ್ತ್ ಬೇಜಾರಾಚಿ. ನವಿಲ್ ನೇರೆ ಮನೇರೊಳ್‌ಕ್ ಪೋಚಿ. ನವಿಲ್ ಬಂದಾನ ಕಂಡಿತ್ ಮನೇಲಿಂಜಯಿಂಗಲ್ಲಾ ಆಶ್ಚರ್ಯ! ಅಕ್ಕ ನವಿಲ್ ಮನ್‌ಷ್ಯಂಗಡನ್ನಕೆ ತಕ್ ಪರವಕ್ ಕೂಡ್‌ಚಿ.

“ಮಕ್ಕಳೇ, ಕಯಿಂಜ ಜನ್ಮತ್ ಇಲ್ಲಿಯೇ ನಿಂಗಡ ಅಪ್ಪನಾಯಿತ್ ಇಂಜ. ಇಕ್ಕ ನವಿಲಾಯಿತ್ ಪುಟಿಯೇ! ನಿಂಗಡ ಕಷ್ಟ ನೋಟಿತ್ ಬೇಜಾರಾಯುಂಡುಂಡ್. ಇಲ್ಲಿ ನೋಟಿ... ನಾಡ ಮೇಲ್‌ಲ್ ಪೌನಾರ ಗರಿ ಉಂಡ್. ಅದೊಂದಾನ ತಪ್ಪಿ ಮಾರಿತ್ ಬೋಂಡಿಯಾನಾನ ಕೊಂಡ ಬಂದೋಳಿ”ಂದ್ ನವಿಲ್ ಎಣ್ಣ್ ಚಿ.

ತಾಂಡ ಮೇಲ್‌ಲಿಂಜ ಒರ್ ಗರಿನ ಬಲಿಚಿ ಕೊಡ್‌ತ ನವಿಲ್, ಬಪ್ಪವಾರ ಬಂದಿತ್ ಇಂಞೊಂದ್ ತಪ್ಪಿಂದೆಣ್ಣ್ ಚಿ! ಅಲ್ಲಿಂಜ ಪಾರಿಯುಂಡ್ ಪೋಚಿ. ಪುಟಿಕ್ ಗರಿ ಮಾರಿತ್ ಕೈ ದುಂಬಾ ದುಡ್ಡ್ ಬಾತ್. ಇನ್ನನೆ ಪ್ರತಿವಾರವೂ ನಡೊಂದಂ ಡಿಂಜತ್. ಮರೆನಾಡ್‌ಲೇ ಬಲ್ ಮನ್‌ಷ್ಯಂಗಕಾಯಿತ್ ಬದ್‌ಕಿಯುಂಡ್ ಇಂಜತ್.

ಒರ್‌ದಿನ ಪುಟಿ ಮಕ್ಕಕೆಣ್ಣ್ ಚಿ - “ಅಲ್ಲಾ..., ಈ ನವಿಲ್ ಇಕ್ಕ ವಾರಕೊಮ್ಮೆ ಬಂದಿತ್ ಗರಿ ತಂದೆಂಡುಂಡ್... ಕಯಿಂಜ ಜನ್ಮತ್‌ರನ್ನನೆ ಎಡ್‌ಕ ಬಟ್ಟೆಲ್ ಚತ್ ಪೋನಕ ನಂಗಕ್ ಒಂದೂ ಕಾಟತಾಯಿರುವ. ಏದೇಂಗಿ ಬೋಟಿಕಾರ ಬೊಡಿ ಎನ್ನೇಂಗಿ ಬೆಚ್ಚಿಟಕ ಕಾಣತ ಬಟ್ಟೆ ಆಯಿ ಪೋಪ. ನಂಗಡ ಈ ಐಶ್ಚರ್ಯ ನಂಗಕ್ ಪೋರಾ..., ಇಂಞೊಲರ್ ಕುರಿ ಬಪ್ಪಕ ಚೆನ್ನಂಗ್ ಜಾಸ್ತಿ ಗರಿ ಕೇಟವನಾಂದ್ ಎಣ್ಣ್ ಚಿ! ಅಕ್ಕಣೆಕ್ ಮಕ್ಕ ಎಣ್ಣ್ ಚಿ - “ಜಾಸ್ತಿ ಗರಿ ಕೇಟಕ ನವಿಲ್ ಚೆಡಿ ಮಾಡಿಯುಂಡ್ ಪೋಯಿರ್‌ತೇಂಗಿ ಒಂದೂ ಇಲ್ಲತಾಯೋಪ. ಅದಾಂಗ್ ಬೋರೆಂತೇಂಗಿ ಉಪಾಯ ಮಾಡುಂಡು!”

“ಅದೇ ಅದೇ..., ಅದಾಂಗ್ ಎಂತೇಂಗಿ ಕುಡಿಪಕ್ ಕೊಡ್‌ಪಂಜಿ, ಅದಾಂಗ್ ಮಂಕ್ ಬಪ್ಪ ಮದ್ ಇಟ್ಟಕ ಆಚಿ. ಅಕ್ಕ ಎಲ್ಲಾ ಪೌನಾರ ಗರಿನ ನಂಗ ಬಲಿಚವಲೂ” ಅವ್ ಉಪಾಯ ಎಣ್ಣ್ ಚಿ! ಪೌನಾರ ನವಿಲ್ ಒರ್ ವಾರ ಕಯಿಂಜದು... ಪಾರಿಯುಂಡ್ ಬಾತ್. ಮಕ್ಕಳೂ, ಅವ್‌ನೂ ಕೂಡಿಯುಂಡ್ ಪಾಲ್‌ಕ್ ಮಂಕ್‌ಮದ್ ಇಟ್ಟಿತ್ ಕೊಡ್‌ತತ್. ನವಿಲ್ ಪಾಲ್ ಕುಡ್‌ಚಿತ್ ಮಂಕಾಚಿ! ಕೂಡೆನ್ನೆ ಅವ್‌ನೂ, ಮಕ್ಕಳೂ ಕೂಡಿಯುಂಡ್ ನವಿಲ್‌ರ ಗರಿನ ಬಲಿಚಿ ಬಲಿಚಿ, ಒರ್ ಪೊಟ್ಟಿಕ್ ದುಂಬಿಚಿಟ್ಟತ್. ಚುಪ್ಪಿ ತೊಪ್ಪಟ್ಟೆನೋ, ನೆಯ್ಕಿ ರೋಮತ್‌ನೋ ಬುಡತೆ ಅಯಿಂಗ ಬಲಿಚಿತಾಪಕ, ನವಿಲ್ ಬೋಳ್ ಬೋಳಾಚಿ! ಅಂತೂ ನವಿಲ್‌ನ ನೆಲತ್ ಒರ್ ಮೂಲೆಲ್ ಇಟ್ಟತ್. ಅವ್‌ನೂ, ಮಕ್ಕಳೂ ಪೋಯಿತ್ ಪೊಟ್ಟಿ ನೋಟುವಾ ಪೌನಾರ ಗರಿ ಪೋಯಿತ್ ಮಾಮೂಲ್ ಗರಿ ಆಯಿ ಪೋಯಿತ್. ಅದನ ನೋಟಿತ್ ಅವ್ ಮಂಕಾಯಿತ್ ಬುದ್ ಪೋಚಿ!

ಚೆನ್ನನೇರ ಕಯಿಂಜದು ನವಿಲ್‌ಕ್ ಎಚ್ಚರಾಚಿ. ನೋಟುವಕ ತಾಂಡ ಮೇಲ್ ಬೋಳಾನದ್ ಕಂಡತ್. ಪಕ್ಕತೇ ಪೊಟ್ಟಿದುಂಬಾ ಗರಿನೋ ಕಂಡತ್. ಪೊಣ್ಣ್ ಮಂಕಾಯಿತ್ ಬುದ್ಧ್ ಪೋನಾನ ನೋಟ್‌ಚಿ! ನವಿಲ್‌ಕ್ ಎಲ್ಲಾ ಸಂಗತಿ ಗೊತ್ತಾಚಿ. ಮಕ್ಕ ನೀರ್ ಕೊಂಡಾಪಂಜಿ ಅವ್ವಂಡ ಮೂಡ್‌ಕ್ ತಣ್‌ಚತ್.

ಎಚ್ಚರಾನ ಪಟ್ಟತಿ ಒರೇಪೋಲೆ ಮೊರಡ್‌ವಕ್ ಸುರು ಮಾಡ್‌ಚಿ. ಅಕ್ಕಣೆಕ್ ನವಿಲ್ ಎಣ್ಣ್‌ಚಿ - "ನಿಂಗ ದುಡ್‌ಕಿತ್ ತಪ್ಪು ಮಾಡಿಟಿರಾ...; ನಾಡ ಗರಿನ ನಾನಾಯಿತ್ ಬಲಿಚಿ ತಾತೇಂಗಿ ಮಾತ್ರ ಪೌನ್‌ರ ಗರಿಯಾಯಿತಿಪ್ಪ; ಬಲಾತ್ಕಾರತ್ ಬಲ್‌ಚಕ, ಸಾಮಾನ್ಯ ಗರಿಯಾಪ! ನಿಂಗಡ ಲಾಭತ್‌ನ ನಿಂಗಲೇ ಪಾಳಾಕಿಯಂಡಿರಾ..."

ನವಿಲ್ ಅಲ್ಲಿಂಜ ಎದ್ದಿತ್ ಮೆಲ್ಲೆ ನಡ್‌ಂದ್ ಪೊರ್‌ಮೆ ಪೋಚಿ! ಇನ್ನೆಂದೂ ಆ ಮನೆಕ್ ಬಂತಲೆ! ಅವ್ವನೂ, ಮಕ್ಕಳೂ ಅಯಿಂಡ ಪಾಳಾಸೆನಗುಂಡ್, ಮಿಂಞ ಇಂಜ ಗರೀಬ ಸ್ಥಿತಿಕೇ ಬಾತ್.

*

*

*

ಕಾಚಿ - ಪೀಚಿ!

ಕಾಚಿ-ಪೀಚಿ ಎಣ್ಣುವ ದಂಡಾಳ್ ಅಣ್ಣತಮ್ಮಣಂಗ ಇಂಜತ್. ಇಯಂಗ ದಂಡಾಳ್‌ಕೂ ಎಕ್ಕಲೂ ಒರೇ ಗೇನ. ಲೋಕತ್ ಜನಕ್ ಪೆದ ಇಟ್ಟಕ, ಒಂದೋ ದೇವಡ ಪೆದ ಆಯಿತಿರಂಡು, ಅಲ್ಲೇಂಗಿ ಮಹಾತ್ಮಂಗಡ ಪೆದ ಆಯಿತಿರಂಡು. ಆಚೇಂಗಿ, ನಂಗಡ ಪೆದ ಕಾಚಿ-ಪೀಚಿ. ಈ ತರ ಪೆದ ಉಳ್ಳವು ದಾರೂ ಇಲ್ಲೆ. ಕಾಡ್ ಜಾತಿಯಕ್ ಇಪ್ಪನ್ನತ ಪೆದ ಇದ್! ಈ ಪೆದತ್‌ನ ನಂಗ ಮಾತಿಯಂಡ್ ಲೋಕತ್ ಪ್ರಸಿದ್ಧಿಯಾಂಡೂಂದ್ ತೀರ್ಮಾನ ಮಾಡಿಯಂಡ್, ಅಣ್ಣತಮ್ಮಣಂಗ ದಂಡಾಳೂ ದೇಶ ಪೋಕ್ ಪೊರ್‌ಟತ್. ಪೋಪಕ ದಂಡಾಳೂ "ಶಿವಪ್ಪ"ಂದ್ ಒರೇ ಪೆದ ಇಟ್ಟಂಡತ್. ಭೂಲೋಕತ್ ಎಲ್ಲಾ ಸುಖಸಂಪತ್ ತಪ್ಪಂವೊ ಆ ಶಿವೊ. ಆನಗುಂಡ್, ಈ ಪೆದ ಎಲ್ಲಾಕಿಂಜ ನಲ್ಲ ಪೆದಂದೆಣ್ಣಿಯಂಡ್ ಪೋಚಿ.

ಒರ್ ದಿನ ಇವು ದಂಡಾಳೂ ಪೊಳೆರ ಬರಿಲ್ ಆರಾಮ್‌ಲಿಂಜತ್. ಅಕ್ಕಣೆಕ್ ಅಲ್ಲಿಕೊಬ್ಬೊ ಮಂಡೆಲ್ ಪುಳ್ಳಿಕೆಟ್ ಬೆಚ್ಚಂಡ್ ಪೊಳೆಕರೆಕ್ ಬಾತ್. ಶಿವಪ್ಪ ಅವನ ಕೇಟತ್ "ಎನ್ನಪ್ಪಾ... ನೀಡ ಪೆದ ಎಂತ?" ಪುಳ್ಳಿಕೆಟ್ ಪೊರ್‌ತಂಡಿಂಜಂವೊ

“ನಾಡ ಪೆದ ಶಿವಪ್ಪ.... ನಾನ್ ಪುಳ್ಳಿ ಮಾರಾವಂವೊ..., ನಿಂಗಕ್ ಪುಳ್ಳಿ ಬೋಂಡುವಾ”ಂದ್ ಇಯಂಗಳ ಕೇಟತ್. ಈ ಶಿವಪ್ಪಂಗ್ ದಂಡಾಳೂ “ಅಯ್ಯೋ ಶಿವಪ್ಪಾಂದ್ ಇಚ್ಚೆ ನಲ್ಲ ಪೆದ ಉಂಡೇಂಗಿಯೂ, ಈ ಮನ್‌ಷ್ಯ ಪುಳ್ಳಿ ಮಾರಿಯಂಡ್ ಬದ್‌ಕಿಯಂಡುಂಡ್. ಈ ಪೆದ ಸೆರಿ ಇಲ್ಲೆ, ಬೋರೆ ಸೆರಿಯಾನ ಪೆದ ಇಟ್ಟುಂಡೂಂದ್” ಗೇನ ಮಾಡಿತ್ “ಕುಬೇರ”ಂದ್ ಪೆದ ಬೆಚ್ಚವನಾಂದ್ ತೀರ್ಮಾನ ಮಾಡಿಯಂಡತ್!

ಅಂತೂ ದಂಡಾಳೂ ಮಿಂಞಾತ್‌ರ ಊರ್‌ಕ್ ಪೋಚಿ. ಇಯಂಡದಿಕೆ ಒರ್ ಮನ್‌ಷ್ಯ ಬಾತ್. ಅಂವೊ ಜಲ್ಲ್ ಬಟ್ಟೆ ಇಟ್ಟುಂಡ್ ಕೈಲ್ ಒಟ್ಟಾನ ಗಂಜಿನ ಪುಡಿಚಂಡ್ ಇಂಜತ್. ಇವು ದಂಡಾಳಾರ ಪಕ್ಕ ಬಂದ ಅಂವೊ ಭಿಕ್ಷೆ ಕೇಟತ್. ಭಿಕ್ಷೆ ಕೊಡ್‌ತ ಅಣ್ಣ ತಮ್ಮಣಂಗ “ನೀಡ ಪೆದ ಎಂತಪ್ಪಾ”ಂದ್ ಕೇಟತ್. ಭಿಕ್ಷೆ ಕಾರ ನಾಡ ಪೆದ “ಕುಬೇರ”ಂದ್ ಎಣ್ಣೆ ಚಿ. ಅಣ್ಣ ತಮ್ಮಣಂಗಕ್ ಪೆರ್ತ್ ಬೇಜಾರಾಯಿತ್, “ಛೇ, ಕುಬೇರಂದ್ ಎಂತಾ ನಲ್ಲ ಪೆದ..., ಆಚೇಂಗಿಯೂ ಇಂವೊ ಭಿಕ್ಷೆ ಬೋಡಿಯಂಡ್ ಬದ್‌ಕಿಯಂಡುಂಡ್. ನಂಗಕ್ ಈ ಪೆದ ಯೋಗ್ಯಾನದಲ್ಲ. ಪ್ರಪಂಚತ್ ದೀರ್ಘಾಯಸ್ಸೆಲ್ ಇಪ್ಪದೇ ಬಲ್ಯ ಸಂಪತ್ತೇಂದ್ ತೀರ್ಮಾನ ಮಾಡಿತ್ ದಂಡಾಳೂ “ದೀರ್ಘಾಯಸ್ಸೆಲ್”ಂದ್ ಪೆದ ಇಟ್ಟುಂಡತ್! ಇನ್ನನೆ ಮಿಂಞಾತ್‌ರ ಊರ್‌ಕ್ ಪೋಚಿ. ಒರ್ ದಿನ ಮಜ್ಜಣ ಮರತ್‌ರಡಿಲ್ ಅಳಾತಂಡ್ ಉಂಡಂಡಿಪ್ಪಕ, ಚೆನ್ನಂಗ್ ಜನ ಚಟ್ಟತ್ ಹೆಣ ಎಡ್‌ತಂಡ್ ಪೋಯಂಡಿಂಜತ್. ಅಣ್ಣ - ತಮ್ಮಣಂಗ ದಂಡಾಳೂ ಉಂಬಾನ ಬುಟ್ಟಿತ್ ಎದ್ದಿತ್ ಜನಡ ಪಕ್ಕ ಪೋಚಿ. ಜನಳ ತಡ್‌ತಿತ್ ಕೇಟತ್ “ಚತ್ತ್ ಪೋನವಂಡ ಪೆದ ಎಂತ” ಜನ ಎಣ್ಣೆ ಚಿ. “ದೀರ್ಘಾಯಸ್ಸೆಲ್”ಂದ್! ಈ ಪೆದ ಕೇಟದೂ ಅಣ್ಣ-ತಮ್ಮಣ ದಂಡಾಳೂಕೂ ಬೇಜಾರ ಆಚಿ.

ಅಯ್ಯೋ, ದೀರ್ಘಾಯಸ್ಸೆಲ್‌ಂದ್ ಪೆದ ಬೆಚ್ಚಂಡತೇಂಗಿಯೂ, ಅಂವೊ ಚತ್ತ್ ಪೋಚಿ. ಈ ಪೆದ ನಲ್ಲದಲ್ಲ. ‘ಶಿವಪ್ಪ’ಂದ್ ಪೆದ ಉಳ್ಳಂವೊ ಪುಳ್ಳಿ ಮಾರುವಂವೊನಾಯಿತೇ ಉಂಡ್. ಕುಬೇರಂದ್ ಕಾಕ್‌ಚಿಟ್ಟುಂಡಂವೊ ಭಿಕ್ಷೆ ಕಾರ ನಾಯಿತೇ ಬದ್‌ಕಿಯಂಡುಂಡ್... ಪುದಿಯ ಪೆದ ನಂಗಕ್ ಬೋಂಡ! ಓರೊಂದಾತ್ ಓರೋರ್ ಕೇಡ್ ಉಂಡ್. ಪೆದತ್‌ರ ಪ್ರಕಾರ ಒಂದೂ ನಡಪುಲೆ. ನಂಗಕ್ ಮಿಂಞಾ ಇಂಜ ಪೆದವೇ ಇಂಜಕ ಮದಿ. ಅದೇ ಜೀವನ ಮದಿ. ಕೇಳಿ ಎಡ್‌ಪದೊಂದೂ ಬೋಂಡ, ಉಳ್ಳಾತ್ ಬದ್‌ಕ್‌ಚೇಂಗಿ ಮದೀಂದ್ ಕಾಚಿ-ಪೀಚಿ ದಂಡಾಳೂ ತೀರ್ಮಾನ ಮಾಡಿಯಂಡ್ ಊರೂರ್ ಸುತ್ತುವದ್ ಬುಟ್ಟಿತ್ ಪಾಪಾಸ್ ಆರ್‌ಕೇರಿ ನಾಡ್‌ಕೇ ಪೋಚಿ!



ಕಾಕೆ ಪಿಂಞ ಗಪ್ಪು

"ಈರುಳ್ಳಿ ಬನ" ಕಾಡಾರ ಪಕ್ಕ ಗಪ್ಪು ಎಣ್ಣುವ ಒರ್ ಬೋಟೆಕಾರ ಇಂಜತ್. ಗಪ್ಪು ಒರ್ ದಿನ ಪಕ್ಕಿಯಳ ಪುಡಿಪಹೋಂದ್ ಬಲೆ ಬೆಚ್ಚಿತಿಂಜತ್. ಬೈಟಾಪಕ ನೋಟವಕ ಅದೊಂಡೊಳ್ಲಾ ಒರ್ ಕಾಕೆ ಇಂಜತ್. ಗಪ್ಪು ಬಲೆರೊಳ್ಲಿಂಜ ಅದೊನ ಪುಡಿಪಹೋಂದ್ ಪೋಪಕ, ಅದೊ ಮನೊಷ್ಯಂಗಡನ್ನಕೆ ತಕ್ಕ ಪರಂದತ್ -

"ಗಪ್ಪು... ನನ್ನ ಬುಟ್ಟಾರ್, ನೀಕ್ ನಾಕಿಂಜ ಚಾಯುಳ್ಳ ಪಕ್ಕಿ ಕೊಟ್ಟಾವ. ಆನಗುಂಡ್ ನೀಕ್ ನಲ್ಲದಾಪ". ಕಾಕೆರ ತಕ್ಕ ಕೇಟಿತ್ ಗಪ್ಪು ಅದೊನ ಬುಡಾತಿತ್ ಪೊರಮೆ ಬುಟ್ಟತ್. ಪುನಾದಿಯ ಆ ಬಲೆನ ಬಿರಿಪಂಜ ಪೋಚಿ ಗಪ್ಪು.

ಪಿತ್ತಾಂದ್ ಪೋಯಿತ್ ನೋಟವಕ ಬಲೆರೊಳ್ಲಾ ಒರ್ ಪಕ್ಕಿ ಇಂಜತ್. ಅದೊ ರಂಗೊರಂಗೊರ ಗರಿಲ್ ಪೆರ್ತ್ ಚಾಯಿ ಕಾಂಬಯಿಂಜತ್. ಗಪ್ಪು ಆ ಪಕ್ಕಿನ ಬಲೆರೊಳ್ಲಿಂಜ ಎಡತತ್. ಅದೊನ ಕೊಂಡ ಪೋಯಿತ್ ಆ ರಾಜ್ಯತೊರ ಮಾರಾಜಂಗ್ ಕೊಡಪಿಂಜ್ ಗೇನ ಮಾಡ್ಚಿ. ಅನ್ನನೆ ರಾಜಂಡ ದರ್ಬಾರ್ಕ್ ಪೋಯಂಡಿಪ್ಪಕ, ರಾಜಂಡ ಮಂತ್ರಿಯೊಬ್ಬೊ ರಂಗೊರ ಪಕ್ಕಿನ ಕಂಡಿತ್, "ನಾಕ್ ತಾ ಅದೊನಾ"ಂದ್ ಕೇಟಿತ್. ಗಪ್ಪು ಪಕ್ಕಿನ ಮಂತ್ರಿಕ್ ಕೊಡಕತೆ ರಾಜಂಗೇ ಕೊಂಡ ಪೋಯಿತ್ ಕೊಡತತ್. ರಾಜಂಗ್ ಪಕ್ಕಿನ ಕಂಡಿತ್ ಪೆರ್ತ್ ಕುಸಿಯಾಯಿರ್ತ್. ಗಪ್ಪುಕ್ ರಾಜ ಆಯಿರ ಉರಪಿಯ ಇನಾಂ ಕೊಡತತ್.

ಇಪ್ಪರ ಮಂತ್ರಿಕ್ ಗಪ್ಪುರ ಮೀದ ಕಿಚ್ಚ ಅಳಚಿ. ಎನ್ನಾಚೇಂಗಿ ಮಾಡಿತ್ ಗಪ್ಪುನ ಪಾಳ ಮಾಡಂಡೊಂದ್ ಗೇನ ಮಾಡಿಯಂಡ್, ಅಂವೊ ರಾಜಂಡ ಪಕ್ಕ ಪೋಚಿ. ಅಲ್ಲಿ "ಮಾರಾಜ ಈ ಪಕ್ಕಿ ಪೆರ್ತ್ ಚಾಯುಂಡ್. ಆಚೇಂಗಿ, ಇದೊನ ಇನ್ನತಾ ಪಂಜರತೊರೊಳ್ಲಾ ಕೂಟ ಬೆಚ್ಚಕ ನಾಕೆನ್ನೊಂಗೋ ಚಾಯಿ ಕಂಡಂಡಿಲ್ಲೆ. ಈ ಪಕ್ಕಿನ ಒರ್ ಆನೆಪಲ್ಲಾರ ಅರಮನೆಲ್ ಬೆಚ್ಚಕ ಸಾರ್ಥಕ ಆಕು. ಗಪ್ಪುಕ್ ಎಣ್ಣೆಚೇಂಗಿ ಅಂವೊ ಈ ಪಕ್ಕಿಕುಳ್ಳ ಅರಮನೆ ತಯಾರ್ ಮಾಡುವಕ ಬೋಂಡಿಯಚ್ಚಕ್ ದಂತ ಎಡತ ಬಪ್ಪಾ"ಂದ್ ಎಣ್ಣೆಚಿ, ಮಂತ್ರಿ.

ಮಾರಾಜ, ಕೂಡೆನ್ನೆ ಗಪ್ಪುಕ್ ಅಪ್ಪಣೆ ಮಾಡ್ಚಿ. ಇದೊನ ಕೇಟಿ ಗಪ್ಪುಕ್ ಮಂಡೆ ನೊಂಬಲ ಅಳಚಿ. "ಅಚ್ಚಕ್ ಆನೆಪಲ್ಲಾನ ಎಲ್ಲಿಂಜ ನಾನ್ ಎಡತೆ ಬರಡಪ್ಪಾ"ಂದ್ ಬೇರ ಪುಟ್ಟಾಚಿ. ಅದೇ ಬೇರತ್ ಒರ್ ಮರತೊರಡಿಲ್ ಅಳತಂಡ್ ಗಪ್ಪು ಬೇರೊಚಿಟ್ಟುಂಡಿಂಜತ್. ಅಕ್ಕಣೆಕ್ ಒರ್ ಕಾಕೆ ಅಲ್ಲಿಕ್ ಪಾರಿಯಂಡ್ ಬಾತ್.

ಅದ್ ಮಿಂಞ ಗಪ್ಪು ಬಲೆಂಜ ಬುಟ್ಟು ಕಾಕೆ ಆಯಿತಿಂಜತ್. ಆ ಕಾಕೆ ಗಪ್ಪುರ ಬೇರ ಅರಿಂಜಂಡತ್.

ಬೇರ್ ಚಿಡತೆ ಗಪ್ಪು, ನೀನ್ ರಾಜಂಡ ಪಕ್ಕ ಪೋಯಿತ್ ನೂರ್ ಪೀಪಾಯಿ ಕಳ್ಳು ಬೋಂಡೂಂದೆಣ್ಣ್. ರಾಜ ತಪ್ಪ. ಅದ್ನ ಎಡ್ತ ಪೋಯಿತ್ ಈ ಈರುಳ್ಳಿ ಬನತ್ ಅಕರೆಲುಳ್ಳ ಬತ್ತಿಪೋನ ಕೆರೆ ಉಂಡಲ್ಲಾ...., ಅದ್ಂಗ್ ಈ ಕಳ್ಳನೆಲ್ಲಾ ಬೂಕ್! ಈ ಕಳ್ಳನ ಕುಡಿಪಕ್ ಆನೆಯ ಬಪ್ಪ. ಆನೆಯ ಕಳ್ಳ ಕುಡಿಚಿತ್ ಮಂಕ್ಲಾ ಕರೆಲ್ ಬುದ್ದವಲ್ಲಾ. ಅಕ್ಕ ಅಯಿಂಡ ಪಲ್ಲನ ಕೆತ್ತಿತೆಡ್ತ. ಅಂತೂ ಅದ್ನ ಎಡ್ತ ಪೋಯಿತ್ ರಾಜಂಗ್ ಕೊಡ್" ಕಾಕೆ ಎಣ್ಣ್ನನನ್ನೆ ಗಪ್ಪು ಮಾಡ್ಚಿ. ರಾಜಂಗ್ ಆನೆಪಲ್ಲ ಕೊಡ್ತತ್. ಮಾರಾಜಂಗ್ ಪೆರ್ತ್ ಕುಸಿಯಾಯಿರ್ತ್. ಪುನಾದಿಯ ರಾಜ ಆಯಿರ ಉರ್ಪಿಯತ್ ಇನಾಂನ ಕೊಡ್ತತ್. ಪಕ್ಷಿಕ್ ಚಾಯುಳ್ಳ ದಂತತ್ ಅರಮನೆ ತಯಾರ್ ಆಚಿ.

"ಈನೆಲ್ಲಾ ನೋಟೊನ ಕೇಡ್ತರ ಮಂತ್ರಿಕ್ ಭಯಂಕರ ಚೆಡಿ ಬಾತ್! ಇಂಞೂ ಎಂತೇಂಗಿ ಮಾಡಿತ್, ಈ ಗಪ್ಪುನ ಪಾಳ್ಬಟ್ಟೆಕ್ ಕೂಟಂಡೂಂದ್ ಗೇನ ಮಾಡ್ಚಂವೊ. ಪಿತ್ಯಾಂದೇ ಮಾರಾಜಂಗ್ಣೆಚಿ "ಮಾರಾಜಾ... ಪಕ್ಷಿಕ್ ಅರಮನೆಯಾಚಿ. ಆಚೇಂಗಿ, ಇಚ್ಚ ಚಾಯುಳ್ಳ ರಂಗ್ ಪಕ್ಷಿ ಪಾಡತ ಪೋಚೇಂಗಿ ಎಂತ ಚಾಯಿ" ಮಂತ್ರಿ ರಾಜಂಡ ಮಂಡೆ ತಿರ್ಕ್ಚಿ. ರಾಜಂಗ್ ನೇರೇಂದಾಚಿ!

"ಅನ್ನನಾಚೇಂಗಿ ಆ ಪಕ್ಷಿ ಪಾಡುವನ್ನೆ ಮಾಡುವಯಿಂಗಳ ಕಾಕಿಯ ಬಪ್ಪಕ್ ಆ ಗಪ್ಪುಕೆಣ್ಣ್..." ರಾಜಾಚ್ಚೆ ಮಾಡ್ಚಿ. ಗಪ್ಪುಕ್ ರಾಜಂಡ ಆಚ್ಚೆ ಕೇಟಿತ್ ಮಂಡೆ ತಿರ್ಚಿ. ಅಕ್ಕಣೆಕ್ ಕಾಕೆ ಅಲ್ಲಿಕ್ ಪಾರಿಯಂಡ್ ಬಾತ್.

"ಬೊತ್ತತೆ ಗಪ್ಪು, ನೀ ಪೋಯಿತ್ ಮಾರಾಜಂಗ್ಣೆ... ಆ ಕೆಲಸ ಆಪದಾಚೇಂಗಿ ನಾಕೋರ್ ಬಲ್ಯ ಹಡಗ್ ಪಿಂಞ ಅದ್ಲ್ ನೂರ್ ಜನ ಪಾಡಿತ್ ಆಡುವ ಮೂಡಿಯಳ ಬುಡ್ಂದೆಣ್ಣ್!" ಕಾಕೆ ಎಣ್ಣ್ನನನ್ನೆ ಗಪ್ಪು ಮೂಡಿಯಳ ಕೂಟಿಯಂಡ್ ಹಡಗ್ಲ್ ಏಳ್ ಸಮುದ್ರ ದಾಟಿತ್ ಪೋಚಿ. ಕಡೇಕ್ ಒರ್ ದ್ವೀಪಕ್ ಎತ್ತ್ಚಿ. ಆ ದ್ವೀಪತ್ ಕಿನ್ನರಂಗಳೇ ದುಂಬಿತಿಂಜತ್. ಹಡಗ್ಲ್ ಮೂಡಿಯಡ ಆಟ್-ಪಾಟ್ ಜೋರ್ಲ್ ನಡ್ಂದಂಡಿಂಜತ್! ಆ ಆಟ್-ಪಾಟ್ ನೋಟೊವಕೊಂದ್ ಕಿನ್ನರಿ ರಾಜಕುಮಾರಿ ಹಡಗ್ ಕೊಡಿಯ ಬಾತ್. ಅವ ಹಡಗ್ ಕೊಡಿಲ್ ಅಳತಂಡ್ ಆಟ್-ಪಾಟ್ ನೋಟಿಯಂಡಿಂಜತ್. ಕಾಕೆ ಎಣ್ಣ್ನನನ್ನೆಯೇ ಗಪ್ಪು ಹಡಗ್ನ ಈರುಳ್ಳಿ ಬನಕಪ್ಪರ ತಿರ್ಕ್ಚಿ!

ಹಡಗ್ ಬಂದಿತ್ ಅರಮನೆರ ಪಕ್ಕ ಎತ್ತನನ್ನೆ ಆನೆದಂತೆ ಅರಮನೆಲಿಂಜ ರಂಗ್ ಪಕ್ಕಿ ಪಾಡುವ ಕೂಡ್ ಚಿ! ಪಕ್ಕಿರ ಪಾಟ್ ಕೇಟಿತ್ ಹಡಗ್ ಕೊಡಿಲಿಂಜ ಕಿನ್ನರಿ ರಾಜಕುಮಾರಿ ಆಟ್ ಆಡಿಯಂಡ್ ಅರಮನೆಕ್ ಬಾತ್! ಪಕ್ಕಿರ ಪಾಟೂ, ಕಿನ್ನರಿರ ಆಟೂ ನೋಟಿತ್ ರಾಜನೂ, ಮಂತ್ರಿಯಳೂ, ಪ್ರಜೆಯಳೂ ಮೆಚ್ಚ್ಚಿ. ಕಿನ್ನರಿ ಆಡಿಯಂಡೆ ಪಕ್ಕಿನೊಮ್ಮ, ಗಪ್ಪುನೊಮ್ಮ ನೋಟ್ ಚಿ. ಕೂಡೆನ್ನೆ ಅರಮನೆ ಇಡೀ ಇರ್ ಟ್ ಕವಂಜತ್! ಪಕ್ಕಿರ ಪಾಟ್ ನಿಂದತ್. ಕಿನ್ನರಿರ ಆಟ್ ಸದ್ದೇ ಇಲ್ಲೆ.

ಅಲ್ಲಿಂಜ ಚೆನ್ನ ನೇರ ಕಯಿಂಜದು, ಅರಮನೆಲ್ ಬೊಳಿ ಬಾತ್. ನೋಟ್ ಚೇಂಗಿ ಪಕ್ಕಿಯೂ ಇಲ್ಲೆ, ಕಿನ್ನರಿಯೂ ಇಲ್ಲೆ. ಇಯಂಗಳ ತೇಡುವಕ್ ಒಂದ್ ಗಪ್ಪುನ ನೋಟ್ ಚೇಂಗಿ ಅವನೋ ಕಾಂಬುಲೆ! ಎಲ್ಲರೂ ಮಾಯ ಆಯಿಂಜತ್.

ಕಿನ್ನರಿ ರಂಗ್ ಪಕ್ಕಿನೋ ಪಿಂಞ ಗಪ್ಪುನೋ ಕೂಟಿಯಂಡ್ ತಾಂಡ ಕಿನ್ನರಿ ರಾಜ್ಯಕ್ ಪೋಯಿರ್ ತಿಂಜತ್. ಗಪ್ಪು ಕಿನ್ನರಿ ರಾಜಕುಮಾರಿನ ಮಂಗಲಾಚಿ. ಸುಮಾರ್ ಕಾಲಕೆತ್ತನೆ ಗಪ್ಪು ಕಿನ್ನರಿರ ಆಟ್ ಕೂಟ್ ರಂಗ್ ಪಕ್ಕಿರ ಪಾಟ್ ನೋ ಕೇಟಿಂಡ್ ಸುಖಿತ್ ಬಾಳ್ ಚಿ.

*

*

*

ಬೀನೆ ಜೋಯಪ್ಪ

ಗಡಿನಾಡ್ ಲ್ ಜೋಯಪ್ಪ ಬಟ್ಟೆ ವ್ಯಾಪಾರಿ ಆಯಿಂಜತ್. ನಲ್ಲ ನಲ್ಲ ಬಟ್ಟೆ-ಬರಿನ ಊರೂರ್ ತಿರಿತ್, ವ್ಯಾಪಾರ ಮಾಡಿತ್, ಪೆರ್ತ್ ಲಾಭ ಪಡ್ ದಂಡಿಂಜತ್.

ಒಮ್ಮ ಅಂವೊ ನಲ್ಲ ನಲ್ಲ ಬೆಲೆ ಬಾಳ್ ವನ್ನತ ಬಟ್ಟೆನ ಪೊರ್ತಂಡ್ ಪೋಯಿಂಜಿಂಜತ್! ಬಟ್ಟೆ ಕೆಟ್ ಪೆರ್ತ್ ತೂಕ ಇಂಜಾನಗುಂಡ್, ಅದ್ ನ ಒರ್ ಚೀಲತ್ ರೊಳ್ ಕ್ ಇಟ್ಟಿತ್, ಎಲ್ಲಿಯೇಂಗಿ ಒರ್ ಆಳ್ ಕಟ್ ಪಾಂದ್ ತೇಡಿಯಂಡ್ ಪೋಚಿ. ಪೋಯಿಂಜಿಪ್ಪಕ ಒರ್ ಮರತ್ ರಡಿಲ್ ಪೆದ್ದಂಡನ್ನೆ ಅಳ್ ತಿಂಜವನ ಕಂಡತ್. ಅಂವೊ ಗಟ್ಟಿ ಗಟ್ಟಿಯಾಯಿಂಜಾನಗುಂಡ್, ಅವಂಡ ಪಕ್ಕ ಪೋಯಿತ್ ಅವನ ಕಾಕ್ ಚಿ. ಬೋರೆ ಆಳ್ ಕೇಪ ಸಂಬಳಕಿಂಜ ಪಾದಿಲ್ ಕೆಯ್ಯುವಕ್ ಅಂವೊ ತಯಾರಾಚಿ. ಜೋಯಪ್ಪ ಪೆರ್ತ್ ಕುಸಿಯಾಯಿರ್ತ್.

ಎನ್ನೇಂಗಾಡ್, ಪಾದಿಸಂಬಳ ಉಳಿಂಜತ್‌ಂದ್ ಸಂತೋಷ ಆಚಿ. ಆಸಾಮಿ ಚೆನ್ನಂಗ್ ಪೆದ್. ಇಕ್ಕ ಉಳ್ಳ ಬಟ್ಟೆಕೆಟ್ಟಾರ ಕೂಟ್‌ಕ್, ಮನೆಂಜ ಇಂಞೋರ್ ಕೆಟ್ಟ್ ಎಡ್‌ತ ಬಂದಿತ್ ಇವಂಡ ಮಂಡೆಕ್ ಪೊರ್‌ಪ್‌ಚಿಟ್ಟಾರ್‌ವೀಂದ್ ಜೋಯಪ್ಪ ಗೇನ ಮಾಡ್‌ಚಿ.

“ನೋಟಿಪ್ಪಾ..., ನಾನ್ ಚೆನ್ನ ಮನೆಕ್ ಪೋಯಿತ್ ಬಪ್ಪಿ. ನೋಟಿಲ್ಲಿ... ಈ ಚೀಲ ನಾಡದ್. ಅದ್‌ನ ಎಚ್ಚರತ್ ನೋಟಿಯಾ... ಅಕಸ್ಮಾತ್ ಮಳೆ ಬಾತೇಂಗಿ, ಈ ಚೀಲ ಪುಂಡೆಯಾಕತನ್ನೆ ನೋಟಿಯಂಡು, ಗೊತ್ತಾಚಾ?” ಆಳ್‌ಕ್ ಎಚ್ಚರ ಕೊಡ್‌ತಿತ್ ಮನೆಕ್ ಪೋಚಿ. ಅಂವೊ ಅಪ್ಪರ ಪೋಯಿತ್ ಚೆನ್ನ ನೇರತೇ ಚೆರ್‌ಂಬನೆ ಮಳೆ ಪೊಯ್ಯುವಕ್ ಸುರುವಾಚಿ. ಪೆದ್ ಆಳ್‌ಕ್ ಎಂತ ಮಾಡಂಡೂಂದೇ ಗೊತ್ತಾಕತಾಚಿ. ಮಳೆ ಜೋರ್‌ಲೇ ಪೊಯ್ಯುವಕ್ ಸುರು ಮಾಡ್‌ಚಿ. ಆಳ್ ಗಡಿಬಿಡಿ ಆಯಿತ್ ಮುಟ್ಟಾಳ ಕೆಲಸ ಮಾಡ್‌ಚಿ. “ಯಜಮಾನ ಈ ಚೀಲತನ ಎಚ್ಚರ ಮಾಡಂಡೂಂದೆಣ್ಣ ಚೆಲ್ಲಾ...” ಎಣ್ಣೆಯೆಂಡ್ ಬೆರಿಬೆರಿಯ ಚೀಲತರ ಕೆಟ್ಟ್ ಉತ್‌ಚಿ. ಅಂತೂ ಅದ್‌ಲಿಂಜ ಬಲ್ಯ ಬಲ್ಯ ಬಟ್ಟೆನೆಲ್ಲಾ ಪೊರ್‌ಮೆ ಬಲಿಚಿ ಇಟ್ಟತ್! ಆ ಬಟ್ಟೆಲ್ ಚೀಲತನ ಚಾಯಿಲ್ ಸುತ್ತ್‌ಚಿ. ಚೀಲಕ್ ನೀರ್ ಕೂಡತನ್ನೆಕ್ ಎಲ್ಲಾ ಬಟ್ಟೆನೋ ಸುತ್ತನ ಪಿಂಞ ಅವಂಗ್ ನೆಮ್ಮದಿ ಆಚಿ! ಅಂತೂ ಜೋಯಪ್ಪನ ಕಾತಂಡ್ ಆಳ್‌ತತ್.

ಚೆನ್ನ ನೇರತ್ ಮಳೆ ಬೇಂಗ್‌ಚಿ. ಜೋಯಪ್ಪ ಮನೆಂಜ ಇಂಞೋರ್ ಬಟ್ಟೆಕೆಟ್ಟನ ಮಂಡೆಲ್ ಪೊರ್‌ತಂಡ್ ಬಾತ್. ಬಂದವಂಡ ಕಣ್ಣ್ ಒರ್ ಜಾಗತ್ ನಿಂದತ್. ವ್ಯಾಪಾರ ಮಾಡಿತ್ ಲಾಭ ಪೊಯ್ಯುವಕ್‌ಂದ್ ಎಡ್‌ತ ಬಂದ ಬಟ್ಟೆ ಎಲ್ಲಾ ಚೀಲತನ ಸುತ್ತಿಯೆಂಡ್ ಅಳ್‌ತಿತಿಂಜತ್. ಬಲ್ಯ ಮಳೆನಗುಂಡ್ ಆ ಬಟ್ಟೆರ ರಂಗ್ ಪೋಯಿತೂ, ಮಣ್ಣ್ ಮೆತ್ತಿತೂ ವಿಚಿತ್ರ ರಂಗ್‌ಲ್ ಇಂಜತ್. ಆನೆಲ್ಲಾ ಕಾಂಬಂಜ ಅವಂಡ ಪಿತ್ತ ನೆತ್ತಿಕೇರ್‌ಚಿ.

“ಏದ್ ಊರ್‌ರ ಮುಟ್ಟಾಳ ನೀನ್. ಇದೆನ್ನತ ಅನಾಹುತ ಮಾಡಿ ಬೆಚ್ಚಿತ್ತುಳ್ಳಿಯಾ?” ಜೋಯಪ್ಪ ಪಾರಿಕಳಿಪ ಕೂಡ್‌ಚಿ! ಪೆದ್ ಆಳ್ ಬೊತ್ತಿಯೆಂಡ್ “ಅಯ್ಯೋ ನಿಂಗಳೇ ತನ್ನೆ ಎಣ್ಣೆಯೇ, ಚೀಲತನ ಎಚ್ಚರತ್ ನೋಟಿಯಾಂದ್. ಅನ್ನನೆ ಮಾಡಿಯೆ ನಾನ್. ಇದ್‌ಲೆಂತ ತಪ್ಪು?” ಪೆದ್‌ಂಡ ತಕ್ಕ ಕೇಟಿತ್ ಜೋಯಪ್ಪ ಕೂತ್‌ಟ್ಟತ್. “ಇದ್‌ಲ್ ನೀಡ ತಪ್ಪೇ ಇಲ್ಲೆ... ಎಲ್ಲಾ ನಾಡದೇ! ಪೋಯಿ ಪೋಯಿ ನೀಡನ್ನತ ಮುಟ್ಟಾಳನ ಕೆಲಸಕ್ ಕೂಟಿಯೆಂಡನಲ್ಲಾ... ಅದೇ ಮಾತಪ್ಪಾ... ಚೆನ್ನಂಗ್ ಪಣ ಉಳಿಚಿಡ್‌ವಕ್ ಪೋಯಿತ್ ಎಲ್ಲಾ ಸರ್ವನಾಶ ಆಚಿಲ್ಲಾ ದೇವಳೇ!”

ಜೋಯಪ್ಪ ಕೋದಕ್ ಉರಂಡಿತ್ ಬಾಯಿ ಬಡಿಪ ಕೂಡ್‌ಚಿ. ಪೆದ್ನ್ ಆಳ್ ಒರ್ ಗಳಿಗೆ ಜೀನೆ ಜೋಯಪ್ಪಂಡ ಅವತಾರತನ ನೋಟಿತ್ ಒಂದೂ ಅರ್ಥಾಕತೆ ಅಲ್ಲಿಂಜ ಕಾಲ್ ಎಡ್‌ತತ್!



ಪೊನ್ನಿರ ಅದ್ಯಪ್ಪ

ಬೇರಳಿನಾಡ್‌ರ ಮೂಲೆಲ್ ಒರ್ ತೊಂಡನೂ, ತೊಂಡಿಯೂ ಇಂಜತ್. ಅಯಿಂಗಕ್ ದಂಡ್ ಮೂಡಿಮಕ್ಕ; ಮಂಗಲಕ್ ವಯಸ್ಸಾಯಿಂಜತ್. ಪಾಪ, ತೊಂಡಂಗೂ, ತೊಂಡಿಕೂ ಮೂಡಿಯಡ ಮಂಗಲ ಕಯಿಕನಾಂದೆಣ್ಣುವಕ ಕೈಲ್ ಕಾಸ್ ಇಲ್ಲೆ. ಬಡತನ, ಮೂಡಿಮಕ್ಕಳೇ ನೈಚಿತ್ ಅಪ್ಪವ್ವನ ಚಾಕಿಯಂಡಿಂಜತ್! ಇನ್ನನೇ ಇಪ್ಪಕ ಒರ್ ದಿನ ಪೆರಿಯ ಮೋವಳಾನ ಪೊನ್ನಿನ ನೋಟುವಕ್ ಒರ್ ಕ್ಣ ಬಪ್ಪಂದೆಣ್ಣ್ ಚಿ. ಬಂದಯಿಂಗಳ ತಕ್ಕಾರ ಮಾಡ್‌ವದಾಚೇಂಗಿ ಎಂತೆಂಗೊಂದ್ ಬೋಂಡುವಲ್ಲಾ, ಅನ್ನನಾಯಿತ್ ಪೊನ್ನಿ ಕೈಲಿಂಜ ಚೆನ್ನ ದುಡ್ಡ್‌ನ ಎಡ್‌ತಂಡ್ ಪೇಟೆಕ್ ಪೋಚಿ.

ಪೇಟೆಂಜ, ಚೆನ್ನ ಪಾಲ್, ಕಜ್ಜಾಯ ಎಡ್‌ತಂಡ್ ಬಾತ್. ಪೊನ್ನಿ ಪೇಟೆಂಜ ಮನೆಕ್ ಬಂದಂಡಿಪ್ಪಕ, ಬಟ್ಟೆಲ್ ಒರ್ ಮನೆರೊಳ್‌ಲ್ ದಾರೋ ಮೊರ್‌ಡುವ ಸದ್ ಕೇಟತ್. ಪೊನ್ನಿ ನೇರೆ, ಸದ್ ಬಂದಂಡಿಂಜ ಮನೆರೊಳ್‌ಕ್ ಪೋಚಿ. ಅಲ್ಲಿ ಒರ್ ಪೊಣ್ಣಾಳ್ಳೂ, ದಂಡ್ ಮಕ್ಕಳೂ ಅಳಾತಂಡ್ ಮೊರ್‌ಟಂಡಿಂಜತ್! ಪೊನ್ನಿ ಅಯಿಂಗಳ ಸಮಾಧಾನ ಮಾಡಿತ್ ವಿಷಯ ಎಂತಂದ್ ಕೇಟತ್.

ಆ ಪೊಣ್ಣಾಳ್ ಮೊರ್‌ಟಂಡ್ "ಮೊನಿಯಾಂದ್‌ಂಜ, ನಾಕೂ ಮಕ್ಕಕೂ, ಕೆಲಕ್ ತಿಂಬಕ್ ಒಂದೂ ಇಲ್ಲೆ. ಪಯಿಚೆಂಡುಂಡ್. ಪಯಿಪು ತಡ್‌ಪ ಕಯ್ಯತೆ ನಂಗೆಲ್ಲಾ ಮೊರ್‌ಟಂಡುಂಡ್"ಂದ್ ಎಣ್ಣ್ ಚಿ. ಪೊನ್ನಿಕ್ ಅಯಿಂಗಳ ಕಂಡಿತ್ ಪೆರ್ತ್ ಬೇಜಾರ ಆಚಿ. ಅವ ತಾಂಡ ಕೈಲಿಂಜ ಪಾಲ್ - ಕಜ್ಜಾಯತ್‌ನೆಲ್ಲಾ ಕೊಡ್‌ತತ್. ಅಯಿಂಗ ಅದ್‌ನ ತಿಂದತ್.

ಪೊನ್ನಿ ಪೋಪಕ್ ಪೊರ್‌ಡ್‌ವಕ, ಪೊಣ್ಣಾಳ್ ಕುಸೀಲ್ ಎಣ್ಣ್ ಚಿ- "ನೀ ನಂಗಕ್ ತಿಂಬಕ್ ತಂದಿಯ. ಆಚೇಂಗಿ, ನೀಕ್ ತಪ್ಪಕ್ ನಾಡ ಕೈಲ್ ಒಂದೂ ಇಲ್ಲೆ.

ಮನೆರ ಅಟ್ಟತ್ ಮಣ್ಣಾರ ಕುಡಿಕೆ ಉಂಡ್. ಆನ ತಪ್ಪಿ ಬೋಂಡಾಂದೆಣ್ಣೆ ತೆ ಎಡ್ತ ಪೋ"ಂದೆಣ್ಣೆ ತ್ ಪೊಣ್ಣಾಳ್ ದಂಡ್ ಕುಡಿಕೆನ ಕೊಡ್ತತ್.

ಪೊನ್ನಿ ದಂಡ್ ಕುಡಿಕೆನ ಎಡ್ತಂಡ್ ಮನೆಕ್ ಪೋಚಿ. ಪಿತ್ತಾಂದ್ ಪೊನ್ನಿನ ನೋಟ್ವಕ್ ಕ್ಣೆಂಡ ಕಡೆಕಾರ ಬಾತ್. ಇಯಂಡ ತಕ್ಕಾರ ಸೆರಿ ಇಲ್ಲತೆ, ಅಯಿಂಗ ಚೆಡಿಂಜಂಡ್ ವಾಪಾಸ್ ಪೋಚಿ. ಪೊನ್ನಿಕ್ ಬೇಜಾರಾಚಿ. ಮನೆಲ್ ಉಂಬಕ್ ಕೂಳಿಲ್ಲೆ. ಎಲ್ಲಿಯೂ ಪಣಿಯೂ ಇಲ್ಲೆ. ಪೊನ್ನಿ ದಂಡ್ ಕುಡಿಕೆನ ಎಡ್ತಂಡ್ ಪೇಟೆಕ್ ಪೋಚಿ. ಅದ್ನ ಮಾರಿತ್ ದುಡ್ಡ್ ಕ್ಷೆಚೇಂಗಿ, ಅಡಿಗುಳ್ಳ ಸಾಮಾನ್ ಎಡ್ತ ಬಕ್ಕಲೂಂದ್ ಗೇನ ಮಾಡಿಯಂಡ್, ಪೇಟೆಲ್ ಕುಡಿಕೆ ಮಾರ್ವಕ್ ಆಳ್ತತ್. ಬೈಟಾಚೇಂಗಿಯೂ ಅವಡ ಕುಡಿಕೆನ ಎಡ್ಪಕ್ ದಾರೂ ಬಂದ್ಲೆ. ಅಪ ಬೇಜಾರತ್ ಮನೆಕ್ ಪೋಪಕ್ ಪೊರಾಟತ್. ಅಕ್ಕಣೆಕ್ ಒರ್ ಮೀನ್ಕಾರ ವ್ಯಾಪಾರ ತೇತಂಡ್ ಪೋಯಂಡಿಂಜತ್. ಅವಂಡ ಪಕ್ಕ ಒರ್ ಮೀನಿಂಜತ್.

ಪೊನ್ನಿನ ಅಂವೊ ಮೀನ್ ಬೋಂಡುವಾಂದ್ ಕೇಟತ್.

'ನಾಡ ಪಕ್ಕ ದುಡ್ಡಿಲ್ಲೆ"ಂದ್ ಪೊನ್ನಿ ಎಣ್ಣೆಚಿ. "ಈ ಕುಡಿಕೆ ಉಂಡ್..., ಇದ್ನ ಎಡ್ತಂಡ್ ಮೀನ್ ತಪ್ಪಿಯಾ"ಂದ್ ಪೊನ್ನಿ ನೇರೆ ಕೇಟತ್. ಮೀನ್ಕಾರ ಮೀನ್ ಕೊಡ್ತಿತ್ ಕುಡಿಕೆನ ಕೇಟಂಡ್ ಪೋಚಿ.

ಅವ ಮೀನ್ ಮನೆಕೆಡ್ತ ಬಾತ್. ಅದ್ನ ಕತ್ತಿತ್ ಮುರಿಪಕ, ಅವಕ್ ಮೀನ್ರೊಳ್ ಒರ್ ಪೊನ್ರ ಮೊಯಿರ ಕ್ಷೆಚಿ! ಚಾಯಿಲ್ ನೋಟ್ವಕ್ ಅದ್ ಆ ರಾಜ್ಯತ್ ರಾಜಂಡ ಗುರ್ತ್ ಉಳ್ಳ ಮೊಯಿರ. ಕೂಡೆನ್ನೆ ಅವ ಮೊಯಿರತ್ನ ಎಡ್ತಂಡ್ ರಾಜಂಡ ಆಸ್ಥಾನಕ್ ಪೋಚಿ. ಅಲ್ಲಿ ರಾಜಂಗ್ ಕೊಡ್ತತ್. ರಾಜಂಗ್ ಮೊಯಿರ ಕಂಡಿತ್ ಪೆರ್ತ್ ಕುಸಿಯಾಯಿ ಪೋಚಿ!

ರಾಜ ಪೊಳೆಲ್ ದೋಣೆಲ್ ತೇಲಿಯಂಡಿಪ್ಪಕ ಮೊಯಿರ ನೀರ್ಕ್ ಬುದ್ಧ್ ಪೋಯಿತಿಂಜತ್. ಅದ್ನ ಮೀನ್ ತಿಂದಿತಿಂಜತ್.

ಗುರ್ತ್ ಮೊಯಿರ ಇಲ್ಲ ತಾಂಗ್ ರಾಜನ ಸಿಂಹಾಸನತಿಂಜ ಉಳ್ಳಪ್ಪವಕ್ ಎಲ್ಲಾ ಮಂತ್ರಿಯ ಪೇಚಾಡಿಯಂಡಿಂಜತ್. ಪೊನ್ನಿನಗುಂಡ್, ತಾಂಡ ಸ್ಥಾನಮಾನ ಉಳಿಂಜಾಂಗ್ ರಾಜ ಅವಕ್ ಪಣ ಕೊಡ್ತಿತ್, ಕಷ್ಟಬಪ್ಪಕ ಬಾಂದೆಣ್ಣೆ ಚಿ.

ಪೊನ್ನಿ ರಾಜ ಕೊಡ್ತ ಪಣತ್ನ ನಲ್ಲರಿಕೆಲ್ ಬಳಸಿಯಂಡ್ ಸುಖತ್ ಬದ್ಕೆಚಿ.



ಪಾಳಾಸೆ

ಎಡೆನಾಡ್‌ರ ನಡುಲ್ ಬಿದ್ದು ಎಣ್ಣುವಂವೊ ಇಂಜತ್. ಪಳೆಯ ಒರ್ ಮನೆ, ಒರ್ ಪಯ್ಯು ಪಿಂಞ ನಾಲ್ ಬೇಲ್ ಮಾತ್ರ ಅವಂಡ ಆಸ್ತಿ. ಅವಂಗೋ ಆರ್ ಮಕ್ಕ. ಆಚೇಂಗಿಯೂ ಕಷ್ಟಪಟ್ಟಿತ್, ಪೊಣ್ಣ್ ಮಕ್ಕಳ ಚಾಕಿಯಂಡಿಂಜತ್. ಎಕ್ಕಾಲೂ ಪೊಲಾಕ ಏಳ್ ಗಂಟೆಕ್ ಮನೆಬುಟ್ಟಿತ್, ಬೇಲ್‌ಕ್ ಪೋನಕ, ಬೈಟ್ ಆರ್ ಗಂಟೆಕೇ ಮನೆ ಕೂಡುವಯಿಂಜಿಯೆ.

ಒರ್ ದಿನ ಬಿದ್ದು ದಂಡ್ ಒಣಕ್ ಒಟ್ಟಿನ ಕೆಟ್ಟಿಯಂಡ್ ಬೇಲ್‌ಕ್ ಪೋಯಿತಿಂಜತ್. ಮಜ್ಜಣಾಕಣೆ ಪಣಿಕೆಜ್ಜಿತ್, ಒರ್ ಮರತ್‌ರಡಿಲ್ ಉಂಬಕ್ ಆಳ್‌ತತ್. ಆ ಮರತ್‌ರಡಿಲ್ ಒರ್ ಪುತ್ತ್ ಇಂಜತ್. ಅದ್‌ಂಡೊಳ್‌ಲ್ ಒರ್ ಪಾಂಬು ವಾಸ ಮಾಡಿಯಂಡ್ ಇಂಜತ್. ಬಿದ್ದು ಉಂಡಂಡಿಪ್ಪಕ, ಆ ಪಾಂಬ್ ಮೆಲ್ಲೆ ಪುತ್ತ್‌ರೊಳಿಂಜ ಪೊರಮೆ ಬಾತ್. ಬಿದ್ದು ಕಂಡತ್. ಅಂದಕಲೂ ಅವೊ ಬೊತ್ತತೆ ಮನೆಂಜ ಎಡ್‌ತ ಬಂತಿಂಜ ಪಾಲ್‌ನ ಒರ್ ಬಟ್ಟಳಕ್ ಬೂಕಿತ್, ಪಾಂಬುರ ಪಕ್ಕ ಬೆಚ್ಚಿ ಕೊಡ್‌ತತ್. ಬಿದ್ದು ಉಂಡಿತ್ ಬೇಲ್‌ಕ್ ಪಣಿ ಕೆಯ್ಯುವಕ್ ಪೋಚಿ. ಬೈಟಾಪಕ ಬಂದಿತ್ ಆ ಮರತ್‌ರಡಿಂಜ ಬಟ್ಟಳ ಎಡ್‌ಪಕ, ಬಟ್ಟಳತ್ ಒರ್ ಪೊನ್‌ರ ತುಂಡ್ ಇಂಜತ್! ಅವೊ ಅದ್‌ನ ಕುಸೀಲ್ ಎಡ್‌ತಂಡ್ ಮನೆಕ್ ಪೋಚಿ. ದಿನಾ ಬಿದ್ದು ಪಾಂಬುಕ್ ಪಾಲ್ ಬೂಕಿ ಕೊಡ್‌ತಂಡಿಂಜತ್. ಪಾಂಬ್ ಅವಂಗ್ ಪೊನ್‌ರ ತುಂಡ್‌ನ ಕೊಡ್‌ತಂಡಿಂಜತ್. ಅವೊ ಪೊನ್ ಮಾರಿತ್ ಇಡೀ ಎಡೆನಾಡ್‌ಕೇ ಬಲ್ಯ ಪಣಕಾರನಾಚಿ! ಪಳೆಯ ಮನೆ ಇಂಜ ಜಾಗತ್ ಪುದಿಯ ಮನೆ ಎದ್ ನಿಂದತ್! ಮೂಡಿಮಕ್ಕಳೆಲ್ಲಾ ಮಂಗಲ ಕಯಿಚತ್; ಬೋಂಡಿಯಚ್ಚಕ್ ಪಯ್ಯುವಳೋ, ಎತ್ತವಳೋ ಎಡ್‌ತತ್! ಇನ್ನನೆ ತಾಂಗ್ ಬೋಂಡಿಯಾನದೆಲ್ಲಾ ಮಾಡಿಯಂಡತ್. ಆಚೇಂಗಿ ಒರ್ ದಿನವೂ, ಅವೊ ಪಾಂಬ್‌ಕ್ ಪಾಲ್ ಬೂಕ್‌ವಕ್ ಮರ್‌ಂದಂಡಿಂಜಿಲೆ.

ಒರ್ ದಿನ ಬಿದ್ದು ಎಲ್ಲಿಯೋ ಪೋಕಂಡಿಂಜತ್. ಅವೊ ತಾಂಡ ಮೋಂವನ ಕಾಕಿತ್ ಎಣ್ಣ್ ಚಿ. "ಮೋನೇ... ನಂಜೂ... ಬೇಲ್‌ಲ್ ಮರತ್‌ರಡಿಲ್ ಉಳ್ಳ ಪುತ್ತ್‌ರ ಮಿಂಞಲ್ ಪಾಲ್ ಬೆಪ್ಪಕ್ ಮಾತ್ರ ಮರ್‌ಂದ್‌ರತೆ. ನಾನ್ ಮೂಂದ್ ದಿನ ಮನೆಲಿಪ್ಪಲೆ... ನಾ ಬರಣೆಕ್ ಪಾಲ್ ಬೂಕಿಯಂಡಿರ್"ಂದ್ ಎಣ್ಣಿತ್ ಪೋಚಿ.

ನಂಜು ಪಿತ್ಯಾಂದ್ ಪೊಲಾಕ ಪಾಲ್ ಎಡ್‌ತಂಡ್ ಬೇಲ್‌ಕ್ ಪೋಚಿ. ಪುತ್ತ್‌ರ ಮಿಂಞಲ್ ಪಾಲ್ ಬೂಕಿತ್ ಬೆಚ್ಚತ್. ಪೊನ್‌ರ ತುಂಡ್ ಕೊಟ್ಟಿಚಿ.

ಅನ್ನನೇ ದಂಡ್ ದಿನ ಮಾಡ್‌ಚಿ. ಮೂಂದನೆ ದಿನ ಪೋಪಕ್ ಪೊರಡ್‌ವಕ ಅವಂಗೋರ್ ಕೆಟ್ಟ ಗೇನ ಬಾತ್! "ಅಲ್ಲಾ..., ಆ ಪಾಂಬುರ ಪುತ್ತ್‌ಲ್ ಬೋಂಡಿಯಚ್ಚಕ್ ಪೌನ್ ಇಕ್ಕು ಕಾಂಬಾ. ಎಕ್ಕಲೂ ಬಂದಿತ್ ಓರಂದೇ ಎಡ್‌ತ ಪೋಪಾಂಗಿಂಜ ಒಮ್ಮೆಕೇ ಎಡ್‌ತ ಪೋಯಿಟಕ, ಎಕ್ಕಲೂ ಬೇಲ್‌ಕ್ ಬಪ್ಪದ್ ತಪ್ಪುವಾಂದ್ ಗೇನ ಮಾಡ್‌ಚಿ. ಅಂತೂ ಮನೆಂಜ ಪೋಪಕಲೇ ಒರ್ ಗುದ್ದಲಿ ಎಡ್‌ತಂಡ್ ಬೇಲ್‌ಕ್ ಪೋಚಿ. ಪಾಲನ ಪುತ್ತ್‌ರ ಮಿಂಞಲ್ ಬೆಚ್ಚಿತ್ ಪಾಂಬು ಬಪ್ಪಾನೇ ಕಾತಂಡಿಂಜತ್! ಪಾಂಬ್ ಮಂಡೆ ಉಳ್‌ಕ್‌ವಕ ನಂಜು ಪಾಂಬ್‌ನ ಕೊಲ್ಲ್‌ವಕೇಂದ್ ಗುದ್ದಲಿ ನೇತ್‌ಚಿ. ಅಕ್ಕಣೆ ಪಾಂಬು ನಂಜುನ ಕಡಿಚಿರ್‌ತ್! ತಾಂಡ ಪಾಳಾಸೆನಗುಂಡ್, ನಂಜು ಅಲ್ಲಿಯೇ ಚತ್ತ್ ಪೋಚಿ!

*

*

*

ಚೋಮುಣಿ - ಪೆಮ್ಮುಣಿ

ಬೋಟೋಳಿ ನಾಡ್‌ಲಿಂಜ ಚೋಮುಣಿಯೂ - ಪೆಮ್ಮುಣಿಯೂ ಬಾಲ್ಯ ಸಿನೇತಂಗ. ಪೆಮ್ಮುಣಿ ಚೆನ್ನಂಗ್ ಸಾಧು. ಆಚೇಂಗಿ ಚೋಮುಣಿ ಮಾತ್‌ಗಾರ ಮಲ್ಲ, ಚುರ್‌ಕ್ ಬುದ್ಧಿರಂವೊ! ಒಮ್ಮೆ ಇವು ದಂಡಾಳೂ ತೀರ್ಥಯಾತ್ರೆ ಪೊರ್‌ಟತ್. ಅಕ್ಕಣೆ ಚೋಮುಣಿಕೆನ್ನತೋ ತೊಂದರೆ ಬಂದಾನಗುಂಡ್ ಅವೊ ಬಾಕಿಯಾಚಿ. ಅನ್ನನಾಯಿತ್ ಪೆಮ್ಮುಣಿಯೊಬ್ಬನೇ ಪೋಕಂಡಿಯಾಚಿ. ಪಂಡ್ ಇಕ್ಕತ್‌ರನ್ನನೆ, ಕಾರ್, ಬಸ್ಸು, ರೈಲ್ ಒಂದೂ ಇಂಜಿಲೆ. ಅನ್ನನಾಯಿತ್, ಪೆಮ್ಮುಣಿ ಕುದ್‌ರೆಲ್ ಪ್ರಯಾಣ ಸುರು ಮಾಡ್‌ಚಿ. ಪೋಪಕ್ ಮಿಂಞ ಚೋಮುಣಿ "ನೋಟ್, ಪೆಮ್ಮುಣಿ, ನೀನ್ ಪೋಪ ಬರಿಲ್ ಕಪಟಪುರ ಎಣ್ಣಾವೋರ್ ಊರ್‌ರ ಜನ ಭಯಂಕರ ಚದಿಯಂಗ, ನೀನ್ ಅಲ್ಲಿ ಬೈಟ್ ನೇರತ್ ಒಳಿಯತೆ. ನೇರೆ ಪೋಯಿರ್, ಎಚ್ಚರತ್ ಪೋಯಿತ್ ಬಾಂ"ದ್ ಎಣ್ಣೆತ್ ಪೆಮ್ಮುಣಿನ ಅಯೆಚತ್. ಪೆಮ್ಮುಣಿ ಕುದ್‌ರೆಲ್ ಓರೋರೆ ಊರ್‌ನ ದಾಟಿಯಂಡ್ ಪೋಚಿ. ಕಡೇಕ್ ಕಪಟಪುರಕೆತ್ತುವಕ ಇರ್‌ಟಾಯಿ ಪೋಚಿ. ಆ ಊರ್‌ರ ಜನ ಇವನ ಕಂಡಿತ್ ಪೆರ್ತ್ ಕುಸೀಲ್ ಮನೆಕ್ ಕೂಟಿಯ ಪೋಚಿ. ಪೆಮ್ಮುಣಿನ ಚಾಯಿಲ್ ತಕ್ಕಾರ ಮಾಡ್‌ಚಿ. ಊಟ ತಿಂಡಿ, ಬುದ್ಧವಕ್ ಜಾಗ ಕೊಡ್‌ತತ್. ಅವೊ ಚೋಮುಣಿನ ಬಜ್ಜತ್. ಇನ್ನತಾ ನಲ್ಲ ಜನಳ ಅವೊ ಚದಿಯಂಗಾಂದ್ ಎಣ್ಣೆಚಲ್ಲ್ಯಾ...ಂದ್ ಪೆಮ್ಮುಣಿ ಸುಖತ್ ಬುದ್ಧಂಡ್ ವರ್‌ಚಿ. ಪೊಲಾಕ ಎಚ್ಚರಾಯಿತ್ ನೋಟ್‌ವಕ್ ಅವಂಡ ಪಕ್ಕ ಇಂಜ

ದುಡ್ಡೂ ಕಾಂಬುಲೆ. ಕೆಟ್ಟತಿಂಜ ಕುದುರೆಯೂ ಕಾಂಬುಲೆ! ಅಲ್ಲಿಯತರ ಜನಳ ಕೇಟತಂವೊ.

ಅವು ತೀರಾ ಚೆಡಿಂಜಂಡ್ “ಇಚ್ಚೆ ಚಾಯಿಲ್ ನಿನ್ನ ನೋಟುಚೇಂಗಿ, ನೀನ್ ನಂಗಳ ಕಳ್ಳಾಂದ್ ಎಣ್ಣುವಿಯಾಂದ್” ಪೆಮ್ಮುಣಿಕ್ ಪುರ್ಕ ಬಾಟಿರ್‌ವಂಜಿ ಅಯೆಚತ್. ಅಂವೊ ಎನ್ನನೆಲ್ಲೊ ಕಷ್ಟಪಟ್ಟಿತ್ ಬೋಟೋಳಿ ನಾಡ್‌ಕ್ ಬಂದಿತ್ ಎತ್ತಚಿ.

“ನೀನ್ ಎಣ್ಣಾನದ್ ನೇರೆ. ಕಪಟಪುರತರ ಜನಳುಂಡ್ ನಾನ್ ಚೆದಿಕ್ ಕೆಣೆಂಜಂಡ್ ಪೆಮ್ಮುಣಿ ಚೋಮುಣಿಕ್ ಎಣ್ಣಾಚಿ! ಚೋಮುಣಿ ಅವನ ಸಮಾಧಾನ ಮಾಡಿತ್ ಕಪಟಪುರತರ ಜನಕ್ ಬುದ್ಧಿ ಪಡಪ್ಪಾಚೆಡಂಡೂಂದ್ ತೀರ್ಮಾನ ಮಾಡ್‌ಚಿ. ಪಿತ್ಯಾಂದೇ ಚೋಮುಣಿ ಒರ್ ಕತ್ತೆನ ಆಟಿಯಂಡ್ ಆ ಊರ್‌ಕಪ್ಪರ ಪ್ರಯಾಣ ಮಾಡ್‌ಚಿ. ಆ ಊರ್ ಬಂದಿತೆತ್ತುವಕ, ಚೋಮುಣಿ ಕತ್ತೆರ ಬೆನ್ನಕ್ ಪತ್ತಿತ್ ಬಾಲ್‌ರ ಬರಿಕ್ ಮೂಡ್ ಇಟ್ಟಿತ್! ಬಾಲ್‌ಕಾಲೇ ಕೇರ್ ಇಡ್‌ವಂಜ ಪುಡಿಚೆಂಡ್‌ತಿಂಜತ್! ಕಪಟಪುರತರ ಜನ ಇವನ ನೋಟಿತ್, ಇಂವೊ ಏದೋ ಅಡ್ಡೀ ಮುಟ್ಟಾಳಂದೆಣ್ಣಿಯಂಡ್, ಇವನ ಸುಲಭತ್ ಬಲೆಕ್ ಬೂಕಲೂಂದ್ ಲೆಕ್ಕಾಚಾರ ಇಟ್ಟಿತ್! ಚೋಮುಣಿನ ಕುಸೀಲ್ ಕೂಟಿಯ ಪೋಯಿತ್ ತಕ್ಕಾರ ಮಾಡ್‌ಚಿ. ಇಂವೊ ಬೈಟ್ ಕತ್ತೆರ ಪಕ್ಕ ಬುದ್ಧಂಡತ್. ಬೈಟ್ ದಾರೂ ಇಲ್ಲತ ಸಂದರ್ಭತ್, ತಾಂಡ ಕೈಲಿಂಜ ಪೌನ್‌ರ ಕಾಸ್‌ನೆಲ್ಲಾ ಚಾಣತ್‌ರೊಳ್‌ಲ ಮುಚ್ಚಿಚಿ. ಪಿತ್ಯಾಂದ್ ಪೊಲಾಕ ಚೋಮುಣಿ, ಜನಡ ಕೈಲಿಂಜಿ ಒರ್ ಕುಕ್ಕೆ ಕೇಟಂಡತ್. ಅಂತೂ ಅಂವೊ ಆ ಕುಕ್ಕೆಲ್ ಕತ್ತೆರ ಚಾಣತ್‌ನ ಇಟ್ಟುಂಡ್ ಪೊಳೆರಪ್ಪರ ಪೋಚಿ. ಜನಳೂ ಅವಂಗ್ ಕಾಂಗತನ್ನೆ ಬಯ್ಯನ್ನೇ ನಡಂದತ್. ಪೊಳೆಲ್ ಕುಕ್ಕೆಲ್ ಚಾಣತ್‌ನ ಕತ್ತುವಂಜ, ಪೌನ್‌ರ ಕಾಸ್‌ನ ಎಡತ್ ಬೆಚ್ಚಂಡತ್. ಕಪಟಪುರತರ ಜನ ಈನೆಲ್ಲಾ ನೋಟಿಯಂಡಿಂಜತ್. ಕೂಡೆನ್ನೆ ಎದಿಕೆ ಬಂದಿತ್ ಅವನ ಸಂಗತಿ ಎಂತಂದ್ ಕೇಟತ್.

“ಈ ಕತ್ತೆ ನಾಡ ಪಾಲ್‌ರ ದೇವ. ಇದೊಂಡ ಚಾಣತ್‌ನ ಪೊಲಾಕ ಕತ್ತೆಚೇಂಗಿ ಎಕ್ಕಲೂ ನಾಕ್ ಪೌನ್‌ರ ಕಾಸ್ ಕಾಟ್ಪಾವಾಂದ್” ಚೋಮುಣಿ ಒರ್ ಬಾಣ ಬುಟ್ಟಿತ್. ಇದೊನ ಎನ್ನನಾಚೇಂಗಿಯೂ ಮಾಡಿತ್ ಚೋಟ್ಟಿಯವಂಡೂಂದ್ ಕಪಟಪುರತರ ಜನ ತೀರ್ಮಾನ ಮಾಡ್‌ಚಿ. ಚೋಮುಣಿ ಪೊರ್‌ಡ್‌ವಕ, ಜನ ಕತ್ತೆನ ತಾಂದ್ ಕೇಟತ್. ಚೋಮುಣಿ ಸುಲಭತ್ ಒತ್ತಂಡ್‌ಲೆ. ಅಂತೂ ಕಡೇಕ್ ಆಯಿರ ಉರ್‌ಪಿಯ ಪಿಂಞ ಒರ್ ನಲ್ಲ ಬಲ್ಲ ಕುದುರೆಕ್, ಕತ್ತೆ ವ್ಯಾಪಾರಾಚಿ!

ಚೋಮುಣಿ ಅಂದೇ ಊರ್‌ಕ್ ವಾಪಾಸ್ ಬಾತ್. ಸಿನೇತ ಪೆಮ್ಮುಣಿಕ್ ಆ ದುಡ್ಡ್‌ನೋ, ಕುದಾರೆನೋ ಕೊಡ್‌ತತ್. ಕಳಂದಂಡ ದುಡ್ಡು, ಕುದಾರೆಯೂ ಕ್ಷಾಪ್‌ವಕ ಅವಂಗ್ ಪೆರ್ತ್ ಕುಸಿಯಾಚಿ.

ಇಪ್ಪರ, ಕಪಟಪುರತಾರ ಜನ ಕತ್ತನ ಕೊಂಡಾಡ್‌ಚಿ. ಅದಂಗ್ ಪೂಜೆ ಮಾಡ್‌ಚಿ. ಆಚೇಂಗಿ, ಒರ್ ವಾರ ಆಚೇಂಗಿಯೂ ಚಾಣತ್‌ಲ್ ಪೊನ್‌ರ ಕಾಸ್ ಕ್ಷಾಪ್‌ನದೇ ಇಲ್ಲೆ! ಚಾಣ ಕೋತಾನದೂ, ಕತ್ತನದೂ ಒಂದೇ ಬಂದ! ಕಡೇಕ್ ಎಲ್ಲಾರೂ ಚೋಮುಣಿನ ತೇಡಿಯಂಡ್ ಬೋಟೋಳಿನಾಡ್‌ಕ್ ಬಾತ್. ಎಲ್ಲಾರೂ ಕೂಡಿಯಂಡ್, ಚೋಮುಣಿನ ತೇಡಿತ್ ಪುಡಿಚಂಡ್ ಪೋಯಿತ್ ಕತ್ತರ ಕೂಡಿಯ ಬುದ್ಧಾಕಿತ್ ಕೆಟ್ಟಾಚಿ. ಕತ್ತನ ಆಟಿಯ ಪೋಯಿತ್, ಪೊಳೆಕ್ ಚಾಡ್‌ವಕ್ ತೀರ್ಮಾನ ಆಚಿ. ಅನ್ನನೆ ಎಲ್ಲಾರೂ ಪೊಳೆರ ಬರಿಕ್ ಪೋಯಂಡಿಂಜತ್. ಇದನ್ ಎನ್ನನೇಂಗಿ ಮಾಡಿತ್ ತಡ್‌ಕಂಡೂಂದ್ ಪೆಮ್ಮುಣಿ ಒರ್ ಉಪಾಯ ಮಾಡ್‌ಚಿ. ಪೋಪ ಬಟ್ಟೆ ಮಧ್ಯತ್ ಪೆಮ್ಮುಣಿ ಅಡ್ಡ ಬಂದಿತ್, "ನಾಡ ಮನೆಕ್ ಎಲ್ಲಾರೂ ಉಂಬಕ್ ಬಾರೀ"ಂದ್ ಕಾಕ್‌ಚಿ. ಜನಕೆಲ್ಲಾ ಕುಸಿಯಾಚಿ. ಚಾಯಿಲ್ ಉಂಬಂಜ ಮನೆಂಜ, ಎಂತೇಂಗಿನ ಬಾಟಿಯಂಡ್ ಬರಲೂಂದ್, ಮರತ್‌ರಡಿಲ್ ಕತ್ತನ ನಿಪ್ಪಾಚಿಟ್ಟಿತ್ ಪೆಮ್ಮುಣಿರ ಮನೆಕ್ ಪೋಚಿ. "ಚೋಮುಣಿ ಬುದ್ಧಿವಂತ ಆನಾಂಗ್ ಎನ್ನನೇಂಗಿ ತಪ್ಪಾಚಿಟ್ಟಿವಾಂದ್" ಪೆಮ್ಮುಣಿರ ಲೆಕ್ಕಾಚಾರ! ಇಪ್ಪರ ಕತ್ತೆ ಮೇಂಜಂಡ್, ಮೇಂಜಂಡ್, ಒರ್ ಬಾಣೆಕ್ ಪೋಚಿ. ಅಲ್ಲಿ ಒರ್ ಅತ್ತಕಾರ ಒರ್‌ಗುಡ್ಡೆ ಅತ್ತಳ ನೋಟಿಯಂಡ್ ಇಂಜತ್. ಅತ್ತಕಾರ ಕತ್ತರ ಪಕ್ಕ ಓಡಿಯಂಡ್ ಬಾತ್.

ಚೋಮುಣಿ ಮೊರ್‌ಟಂಡ್ "ನೋಟಿಪ್ಪಾ... ನಾಕ್ ಮಂಗಲ ಬೋಂಡಾಂದ್ ಎಣ್ಣಾಚೇಂಗಿಯೂ, ಈ ಜನ ನನ್ನ ಮಂಗಲ ಕಯಿಪಕ್ ಕೂಟಿಯಂಡ್ ಪೋಯಂಡುಂಡ್. ದಯಬೆಚ್ಚಿತ್ ನನ್ನ ಒಮ್ಮೆ ಉತ್ತವಿಯಾ"ಂದ್ ಕೇಟತ್. ಅಕ್ಕಣೆ ಅತ್ತಕಾರ, "ಅಯ್ಯೋ... ನಾಡ ಮಂಗಲ ಕಯಿಪವು ದಾರೂ ಇಲ್ಲೆ. ನಾನ್ ನಿನ್ನ ಉತ್ತುವಿ. ನೀನ್ ನನ್ನ ಕೆಟ್ಟಿಡಿಡ್"ಂದ್ ಎಣ್ಣಾಚಿ. ಚೋಮುಣಿ ಅನ್ನನೇ ಮಾಡ್‌ಚಿ.

ಇಪ್ಪರ ಜನಳ ತೇರಾ ಕೂಟಿಯ ಪೋನ ಪೆಮ್ಮುಣಿ ಒಳಕ್ ನುಗ್ಗಿತ್, ಬಯ್ಯಬರಿಕಾಲೇ ದಾಟಿತ್, ಪೋಯಿತ್ ಕಾಡ್‌ಲ್ ಒಳಿಚಂಡತ್. ಬಯ್ಯಂಜ ಜನಕ್ ಅವಂಡ ಮೋಸ ಗೊತ್ತಾಚಿ. ಅವನ ಬಜ್ಜಂಡ್ ಕಪಟಪುರತಾರ ಜನ ಕತ್ತನ ತೇಡ್‌ಚಿ. ಕ್ಷಾಪ್‌ವದು, ಕತ್ತನ ಆಟಿಯಂಡ್ ಪೋಯಿತ್ ಪೊಳೆಕ್ ಉಂದಿತ್‌ಟ್ಟಿತ್. ಚೋಮುಣಿರ ಮನೆಕ್ ಬಾತ್; ಅವಂಡ ಮನೆರ ಸಾಮಾನ್,

ಆಸ್ತಿ-ಪಾಸ್ತಿ, ಎಲ್ಲಾ ಎಡ್‌ತಂಡ್ ಪೋಪದ್ ಅಯಿಂಡ ಉದ್ದೇಶ! ಅಕ್ಕಣೆ ಚೋಮುಣಿ ಬಾಡಲಿಂಜ ಅತ್ತಳೆಲ್ಲಾ ಆಟಿಯಂಡ್, ಪೋಯಿತ್ ಪಟ್ಟಿಲ್ ಬುಟ್ಟುಂಡ್ ಅಳಾತಿತಿಂಜತ್! ಕಪಟಪುರತ್‌ರ ಜನಕೆಲ್ಲಾ ಆಶ್ಚರ್ಯ! “ನೀನ್ ಎನ್ನನೆ ಇಲ್ಲಿಕ್ ಬಂದಿಯಾ”ಂದ್ ಕೇಟತ್.

“ಆ ಪೊಳೆಲ್ ಒರ್ ಜಲದೇವತೆ ಉಂಡ್; ಕೈಕಾಲ್ ಕೆಟ್ಟಿಯಂಡ್, ದಾರ್ ಆ ಪೊಳೆಲ್ ಬುದ್ಧಿತ್ ಚಾವಾ..., ಅಯಿಂಗಕ್ ಕೇಟಚ್ಚಕ್ ಎತ್ತಾಕಡ್‌ಚಿಯಳ ಕೊಡ್‌ಪ” ಚೋಮುಣಿ ಎಣ್ಣಣೆಕ್, ಕಪಟಪುರತ್‌ರ ಜನ ಕೇರ್ ಎಡ್‌ತಂಡ್ ನಾ ಮಿಂಞಾ ನಾ ಮಿಂಞಾಂದ್ ಪೊಳೆರ ಪಕ್ಕ ಓಡ್‌ಚಿ! ಒಬ್ಬಂಡ ಕೈಕಾಲ್‌ನ ಇಂಞಾಚೊಬ್ಬೊ ಕೆಟ್ಟಿತ್ ತೇರಾ ಪೊಳೆಕ್ ಬೂವಂಜಿ ಪ್ರಾಣ ಬುಟ್ಟಿತ್!

*

*

*

ಮೂಂದ್ ವ್ಯಾಪಾರಿಯ

ಬೇರನಾಡ್‌ರ ತಿಮ್ಮು, ರಾಮು, ಬೀಮು ಮೂಂದಾಳೂ ವ್ಯಾಪಾರಿಯ. ಕಷ್ಟಪಟ್ಟಿತ್ ವ್ಯಾಪಾರ ಮಾಡಿಯಂಡಿಂಜತ್. ಇಯಿಂಗಕ್ ವ್ಯಾಪಾರ ಮಾಡೀ ಮಾಡೀ ಮದಿಯಾಯಿತಿಂಜತ್. ಎಚ್ಚಕ್ ಮಾಡ್‌ಚೇಂಗಿಯೂ ಕೈಕ್ ಬಾಯಿಕ್ ಎತ್ತುವಯಿಂಜ್‌ಲೆ.

ಒರ್ ದಿನ ಇವು ಮೂಂದಾಳೂ ಕೂಡಿಯಂಡ್, ದೇವಳ ಬೋಂಡಿಯಾನ ಕೇಕನಾಂದ್ ತಪಸ್ಸು ಮಾಡ್‌ವಕ್ ಕಾಡ್‌ರ ಮಧ್ಯ ಇಂಜ ಒರ್ ದೇವಸ್ಥಾನತ್ ಪೋಚಿ!

ಅಲ್ಲಿ 9 ದಿನ ಪೂಜೆ ಮಾಡಿತ್, 9 ದಿನ ತಪಸ್ಸು ಮಾಡಿತಾಕಣೆಕ್, ಬ್ರಹ್ಮ ದೇವ ಪ್ರತ್ಯಕ್ಷ ಆಯಿತ್, ನಿಂಗಕ್ ಎಂತ ವರ ಬೋಂಡೂಂದ್ ಕೇಟತ್. ಮೂಂದಾಳ್‌ಕೂ ಕುಸಿ ಆಯಿರ್‌ತ್. ಎಂತ ಕೇಕಂಡೂಂದೇ ಗೊತ್ತಾಯಿಲೆ. ಚೆನ್ನನೇರ ಕಯಿಂಜದು ಆದ್ಯತ್‌ರಂವೊ ಎಣ್ಣೆ ಚಿ - “ದೇವ ನಾನ್ ಪೌನ್ ವ್ಯಾಪಾರಿ. ನಾಡ ವ್ಯಾಪಾರತ್ ನಾಕ್ ಒರ್ ಲಾಭ ಕಂಡಂಡಿಲ್ಲೆ. ಆಂಗ್ ನಾನ್ ಎಂತ ಮುಟ್ಟ್‌ಚೇಂಗಿಯೂ ಅದ್ ಪೌನ್ ಆಪನ್ನಕೆ ವರ ತಾ”. ಸರಿ ಬ್ರಹ್ಮ ದೇವ “ತಥಾಸ್ತು” ಎಣ್ಣೆ ಚಿ.

ದಂಡನೆರಂವೊ ಇನ್ನನೆ ವರ ಕೇಟತ್ - "ದೇವಾ... ನಾಕ್ ಪೊನೊಂದೂ ಬೋಂಡ... ನಾನ್ ಒರ್ ಬಟ್ಟೆ ವ್ಯಾಪಾರಿ. ಅದೊಂಗ್ ನಾನ್ ಎಂತ ಮುಟ್ಟ್ಚಿಂಗೆಯೂ ಆ ವಸ್ತು ಉದ್ದ ಆಪನ್ನಕೆ ವರ ತಾ". ದೇವ ಅವಂಗೂ "ತಥಾಸ್ತು" ಎಣ್ಣೊಚಿ.

ಇಂಞ ಮೂಂದನೆರಂವೊ "ದೇವಾ... ನಾನ್ ಪಾತ್ರ ವ್ಯಾಪಾರಿ. ನಾನ್ ಎಂತ ಮುಟ್ಟ್ಚಿಂಗೆಯೂ ಅದ್ ದಂಡಾಪನ್ನಕೆ ವರ ತಾ..." ದೇವ ಅದೊಂಗೂ "ತಥಾಸ್ತು" ಎಣ್ಣೊಚಿ. ಅಲ್ಲಿಂಜ ದೇವ ಮಾಯ ಆಚಿ.

ಮೂಂದ್ ವ್ಯಾಪಾರಿಯಕ್ ಕುಸಿ ಆಯಿರ್ತ್. ಪೊನ್ ರ ವ್ಯಾಪಾರಿ ಕುಸೀಲ್ ತಿಂಬಕೊಂದ್ ಬ್ಯಾಗ್ಲಿಂಜ ಪಣ್ಣೊ ಎಡ್ತತ್. ಅಕ್ಕಣೆ ಅದ್ ಪೊನ್ ರ ಪಣ್ಣೊಚಿ. ಒರ್ ಬಟ್ಟೆನ ಎಡ್ತತ್. ಅದೂ ಪೊನ್ ಆಯಿರ್ತ್! ಅವಂಗ್ ದಿಗಿಲ್ ಸುರುವಾಚಿ. ಕುಡಿಪಕ್ ನೀರ್ ಎಡ್ತತ್. ಅದೂ ಪೊನಾಚಿ. ಇಂಞ ಎಂತ ತೊಟ್ಟತೇಂಗೆಯೂ ಅದ್ ಪೊನಾಯಿರ್ವ. ಒಂದೂ ತಿಂಬ ಕಯ್ಯಲೆ, ಕುಡಿಪ ಕಯ್ಯಲೆ..." ಆತುರತ್ ಎಂತಾ ಅನಾಹುತ ಮಾಡಿಯಂಡಂದ್ ಗೋಳಾಡ್ಚಿಂವೊ...!

ಇವಂಡ ಗೋಳಾಟತ್ ನ ಕಂಡಿತ್ ದಂಡನೆ ಬಟ್ಟೆ ವ್ಯಾಪಾರಿ ಅಳ್ತಲ್ಲಿಂಜ ಎವಕೊಂದ್ ದಂಡ್ ಕಾಲ್ ನ ಪುಡಿಚಿತ್. ಅಕ್ಕಣೆ ಅವಂಡ ದಂಡೂ ಕಾಲ್ ಉದ್ದಕ್ ಬೊಳಿವ ಕೂಡ್ಚಿ! ನಿಪ್ಪದೇ ಇಲ್ಲೆ. ಉದ್ದುದ್ದ ಕಾಲ್ ಕಾಂಬಂಜ ಅಂವೊ ಜೋರ್ಲ್ ಕಿರ್ಚಿಯಂಡತ್. ಸೋಯ ತಪ್ಪೊಚಿ.

ಮೂಂದನೆರವಂಗ್ ಎಂತ ಮಾಡಂಡೂಂದೇ ಗೊತ್ತಾಕತೇ ಮಂಡೆಕ್ ಕೈ ಬೆಚ್ಚತ್. ಪಾಪ, ಅವಂಡ ಮಂಡೆ ದಂಡಾಚಿ! ಮಂಡೆ ದಂಡಾನ ಕಂಡಿತ್ ಅಂವೊ ಜೋರ್ಲ್ ವರ ತಂದ ದೇವಳ ಬಯ್ಯುವ ಕೂಡ್ಚಿ.

ಅಕ್ಕಣೆ ದೇವ ಪುನಾದಿಯ ಪ್ರತ್ಯಕ್ಷ ಆಯಿತ್ ಮೂಂದ್ ವ್ಯಾಪಾರಿಯಕ್ ಎಣ್ಣೊಚಿ "ನೈಚಿತ್ ಉಂಡಕ ಅದಾಲೆ ತೃಪ್ತಿ ಕೊಟ್ಟುವ. ನೈಕತೆ ಮುಂಡತೆ ಕೊಟ್ಟೊನಾತ್ ಬದ್ಕನಕ ಅದಲ್ ಒರ್ ಸುಖವೊ ಇಲ್ಲೆ"ಂದ್ ಎಣ್ಣೆತ್ ತಾಂಡ ವರತ್ ನ ವಾಪಾಸ್ ಎಡ್ತಂಡತ್.

ಕೂಡೆನ್ನೆ ಮೂಂದಾಳೂ ಯಥಾಸ್ಥಿತಿಕ್ ಬಾತ್. ಅಯಿಂಗಕ್ ಅಯಿಂಡ ತಪ್ಪುರ ಅರಿವಾಚಿ. ಅಂದೊಂಜ ಮನಸ್ಸಿಟ್ಟಿತ್ ನೈಚಿತ್ ಸಂಪಾದನೆ ಮಾಡ್ಚಿ.



ಬುದ್ಧಿರ ಪರೀಕ್ಷೆ

ಬೊಟ್ಟಾತ್‌ನಾಡ್‌ರ ಪೂವಪ್ಪ ಒರ್ ತಮಾಸಿಕಾರ, ಬುದ್ಧಿವಂತ. ತಾಂಡ ತಕ್ಕಾಲೇ ಜನಳ ಮರ್‌ಳ್ ಮಾಡುವಯಿಂಜತ್. ಎಂತ ಸವಾಲ್‌ಕೂ ಸುಲಭತ್‌ರ ಜವಾಬ್ ಅವಂಡ ಪಕ್ಕ ಇಪ್ಪಯಿಂಜತ್. ಸಮಯ ಸಂದರ್ಭ ಕ್ಷಾತ್ರವಕ ಜನಳ ಮೂರ್ಖಿಂಗಳಾಯಿತ್ ಮಾಡ್‌ವಯಿಂಜತ್!

ಒರ್ ದಿನ ಅವಂಡಪ್ಪೊ ಪೂವಪ್ಪಂಡ ಕೂಡೆ ಎಣ್ಣೆ ಚಿ "ನೋಟ್ ಪೂವಪ್ಪ... ನೀನ್ ಎಂತಯಿಂಗಳಾಚೇಂಗಿಯೂ ತಿರ್‌ಕಿ ಮರ್‌ಕಿ ಬೆಪ್ಪಿಯಲ್ಲಾ, ಆಪದಾಚೇಂಗಿ ನನ್ನ ಒಮ್ಮೆ ಮಾಡಿ ನೋಟ್. ಅಚ್ಚ ಸುಲಭತ್ ನೀಕ್ ನನ್ನ ಮಂಕ್ ಮಾಡ್‌ವ ಕಯ್ಯುವಾಂದ್ ನಾನೂ ನೋಟುವೀ"ಂದ್ ಪಂಥ ಕೆಟ್ಪಚಿ.

ಪೂವಪ್ಪ ಎಣ್ಣೆ ಚಿ - "ನೋಟಪ್ಪ... ನೀಕ್ ಈ ಗಲಾಟೆ ಬೋಂಡ".

ಆಚೇಂಗಿಯೂ, ಅವಂಡಪ್ಪೊ ಕೇಟದೇ ಇಲ್ಲೆ.

"ಸೆರಿ, ಒರ್ ದಿನ ನೀಕೂ ಅದ್‌ಂಡ ರಸ ಕಾಟುವಿ. ಚದ್ಲೆ"ಂದ್ ಪೂವಪ್ಪ ಮನಸ್ಸಾಲೇ ಎಣ್ಣೆಯಂಡತ್.

ಅಪ್ಪ ಆ ತಕ್ಕಾನ ಮರ್‌ಂದತೇಂಗಿಯೂ, ಪೂವಪ್ಪ ಮಾತ್ರ ಮರ್‌ಂದಿತಿಲ್ಲೆ...! ಚೆನ್ನ ದಿವಸ ಕಯಿಂಜದು, ಪೂವಪ್ಪ ತಾಂಡ ಮಾಂವಂಡ ಮನೆಕ್ ಪೋಯಿತ್ ಬಪ್ಪೀಂದೆಣ್ಣೆತ್ ಪೋಚಿ. ಅಲ್ಲಿ ಪೋಯಿತ್ ಎತ್ತನದೇ ಮೊರ್‌ಟಂಡ್ ಅಳತತ್. ಅದ್‌ನ ಕಂಡಿತ್ ಮಾಂವ ಎಂತ ವಿಷಯಾಂದ್ ಕೇಟತ್.

"ಅಯ್ಯೋ ಅಪ್ಪ ಚತ್ತಪೋಚಿ! ನಿಂಗ ದಾರೂ ಬಂದಿತಿಲ್ಲೆ. ಬಪ್ಪ ನಾರಾಚೆ... ಮಾದ... ನಿಂಗ ಬಂದ್‌ರೀ..."ಂದ್ ಎಣ್ಣೆ ಚಿ. ಮಾಂವಂಗ್ ದುಃಖ ಆಚಿ. ಸೆರಿ, ಮಾದಕ್ ಬಪ್ಪೀಂದೆಣ್ಣೆ ಚಿ. ಪೂವಪ್ಪ ಬೇಜಾರ್‌ತೇ ಮನೆಕ್ ಬಾತ್.

ಅವನ ಕಂಡಿತ್ ಅಪ್ಪ ಕೇಟತ್, "ಎಂತಾಚಿ ಮೋನೇ..., ನೀನೆನ್ನಾಂಗ್ ಇನ್ನನೆ ಉಳ್ಳಿಯಾ...?! ಮಾಂವಂಡ ಮನೆಲ್ ಎಲ್ಲರೂ ಸೌಖ್ಯತ್‌ಲ್ ಉಂಡಲ್ಲಾ...?"

"ಎಲ್ಲಾರೂ ಸೌಖ್ಯತ್‌ಲ್ ಎನ್ನನೆ ಇಪ್ಪೊ...? ಮಾಂವ ಚತ್ತಪೋಚಿ" ಪೂವಪ್ಪ ಜೋರ್‌ಲೇ ಮೊರ್‌ಟತ್.

ಇವಂಡಪ್ಪಂಗ್ ಬೇಜಾರಾಚಿ. ಮಾದ ಎಕ್ಯಾಂದ್ ಕೇಟತ್. ಬಪ್ಪ ನಾರಾಚೇಂದ್ ಎಣ್ಣೆಚಿ! ನಾರಾಚೆ ಬಾತ್. ಅಲ್ಲಿಂಜ ಮಾಂವನೂ, ಇಲ್ಲಿಂಜ ಅಪ್ಪನೂ ದಂಡಾಳುರ ಮಾದಕ್ ಪೊರೊಟತ್! ದಂಡಾಳೂ ಕಾಡ್ ಬಟ್ಟೆಕಾಲೆ ನಡ್ಂದಂಡ್ ಪೋಯಂಡಿಂಜತ್. ಮದ್ಯತ್ ದಂಡಾಳೂ ಎದ್‌ಮುಟ್ಪೆಚಿ! ದಂಡಾಳುಕೂ ಕಾಲ್ ಗಾಡ್‌ಗಾಡ್‌ಂದ್ ಗಾಡ್‌ಪಕ್ ಸುರುವಾಚಿ! ಬೊತ್ತಿತ್ ಜೋರ್‌ಲ್ “ಕೂಳಿ ಕೂಳಿ”ಂದ್ ಕೂತ್‌ಟ್ಪಂಡ್, ದಂಡಾಳೂ ಕ್‌ಟ್ಪ್ ಕ್‌ಟ್ಪ್‌ನನೆಕೆ ಓಡುವಕ್ ಸುರು ಮಾಡ್‌ಚಿ! ಓಡಿ ಓಡಿ ಪುನಾದಿಯ ದಂಡಾಳೂ ಎದ್‌ಮುಟ್ಪೆಚಿ! ಬೊತ್ತಿತ್ ಅಲ್ಲಿಯೇ ದಂಡಾಳೂ ಬುದ್ಧಿ ಪೋಚಿ!

ಅಕ್ಕಣೆಕ್ ಅದೇ ಬಟ್ಟೆಕಾಲೆ ಒಬ್ಬೊ ಬಂದಂಡಿಂಜತ್. ಇಯಂಗಡ ಕೂತ್ ಕೇಟತ್ ಅಂವೊನೂ ಬೊತ್ತಿಪೋಚಿ. ಅಂದಕಲೂ, ಅಂವೊ ಮೆಲ್ಲೆ ಪೂವಪ್ಪಂಡ ಅಪ್ಪಂಡ ಪಕ್ ಪೋಚಿ. ಸಂಗತಿ ಎಂತಂದ್ ಕೇಟತ್ “ನೋಟಪ್ಪಾ... ಇಲ್ಲಿ ಉಂಡಲ್ಲಾ... ಇದ್ ನಾಡ ಮೋಂವಂಡ ಮಾಂವೊ... ಕಯಿಂಜವಾರ ಚಿತ್‌ಪೋಚಿ! ಅವಂಡ ಮಾದಕ್ ನಾ ಪೋಯಂಡುಳ್ಳೊ. ಇಕ್ಕ ಈ ಕಾಡ್‌ಬಟ್ಟೆಲ್ ಕೂಳಿ ಎದಿಕೆ ಬಂದ್‌ಟಿತ್”ಂದ್ ಎಣ್ಣೆಚಿ! ಅಲ್ಲಿಂಜ ಆ ಮನ್‌ಷ್ಯ ಪೂವಪ್ಪಂಡ ಮಾಂವಂಡ ಪಕ್ ಪೋಚಿ. ಅವನೂ ಅದೇ ಪಾಟ್ ಪಾಡ್‌ಚಿ! “ನಿಂಗ ಪೂವಪ್ಪಂಗ್ ಎಂತೇಂಗಿ ಬೆಂದ್‌ಕಳಾ”ಂದ್ ಅಂವೊ ಕೇಟತ್.

ಇವು ದಂಡಾಳೂ ಸಾಲ್‌ನ ಎಣ್ಣೆಚಿ. ಇದ್‌ನ ಕೇಟ ಆ ಮನ್‌ಷ್ಯಂಗ್ ತೆಳಿಯೋಡ್ ತೆಳಿ! ನಿಂಗಡಲ್ಲಿ ದಾರೂ ಕೂಳಿ ಅಲ್ಲ. ಇದೆಲ್ಲಾ ಪೂವಪ್ಪಂಡ ಮಲಾಮತ್ತ್‌ಂದ್ ಎಣ್ಣೆಚಿ! ಅಲ್ಲಿಂಜ ದಂಡಾಳೂ ಪೂವಪ್ಪಂಡ ಮನೆಕ್ ಪೋಚಿ. ಪೂವಪ್ಪನ ಬಾಯಿಕ್ ಬಂದನೆಕೆ ಬಯ್ಯುವಕ್‌ಂದ್ ದಂಡಾಳೂ ಬಾಯಿ ಎಡ್‌ತತ್.

ಅಕ್ಕಣೆ ಪೂವಪ್ಪನೇ ಎಣ್ಣೆಚಿ - “ನೋಟಪ್ಪಾ, ನಾನ್ ಅಂದೇ ನೀಕ್ ಎಣ್ಣೆತಿಂಜ... ನೀನ್ ಕೇಟಿತಿಲ್ಲೆ. ನಾಡ ಬುದ್ಧಿರ ಪರೀಕ್ಷೆ ಮಾಡ್‌ವಕ್ ನೀಕ್ ಪೆರ್ತ್ ಆಸೆ ಇಂಜತ್! ಅದ್ ಇಂದ್ ಕಾರ್ಯಾಚಿಲ್ಲಾ” ಪೂವಪ್ಪ ತೆಳಿಚಂಡೆಣ್ಣೆಚಿ. ಅಪ್ಪಂಡ ಸದ್ದೇ ಇಲ್ಲೆ! ಪೂವಪ್ಪಂಡ ಅಪ್ಪೊ ಅಂದ್‌ಂಜ ಮೋಂವಂಡ ಸುದ್ದಿಕ್ ಪೋಯಿಲೆ!



ಪೂಂಞಾ ಪಿಂಞ ನೀಲಕ್ಕಿ

ಪುಂಡ್ ಭಾಗಮಂಡಲಪುರ ಎಣ್ಣುವಲ್ಲಿ ಒರ್ ರೈತ ಇಂಜತ್. ಅವಂಗ್ ದಂಡ್ ಮಕ್ಕ ಇಂಜತ್. ಒರ್ ಕ್ಣಿ, ಒರ್ ಮೂಡಿ. ಒರ್ ದಿನ ರೈತ ಕಾಯಿಲ ಬಪ್ಪಂಜ ಚತ್ತ್ ಪೋಚಿ. ಅಂವೊ ಚಾವಕ ಇಂಜ ಆಸ್ತಿ ಒರ್ ಪಯ್ಯು ಪಿಂಞ ಒರ್ ಪೂಂಞಾ. ಮೊಂವೊ ತಂಗನ ಬುಟ್ಟಿತ್ ಪಯ್ಯುನ ಕೂಟಿಯಂಡ್ ಬೋರೆ ಊರ್ಕ್ ಪೋಚಿ. ಪಾಪ, ತಂಗ ಒಬ್ಬಳೇ ಪೂಂಞರ ಕೂಡ ದಿನ ದೂಡಿಯಂಡ್ ಇಂಜತ್. ದಿನಾ ಮೊರ್ಟಂಡ್ ಒಲೆರ ಪಕ್ಕ ಅಳಾತಿಪ್ಪ ನೀಲಕ್ಕಿನ ಕಂಡಿತ್ ಪೂಂಞಾಕ್ ಬೇಜಾರಾಚಿ.

ಪೂಂಞಾ ನೀಲಕ್ಕಿಕ್ ಎಣ್ಣಾಚಿ -

“ಮೊರ್ಡತೆ. ನಾನ್ ನೀಕ್ ಬಟ್ಟೆ ಕಾಟುವಿ. ನಾನ್ ಎಣ್ಣನೆಕೆ ಕೇಳ್”

ನೀಲಕ್ಕಿ ಒತ್ತಂಡತ್. ಪಿತ್ಯಾಂದ್ ಪೂಂಞಾ ಎಣ್ಣಾನನ್ನಕೆ ನೀಲಕ್ಕಿ ಕಾಡ್‌ರೊಳಿಯ ಪೋಯಂಡಿಂಜತ್.

ಬಲ್ಯ ಬಲ್ಯ ಮರ ಉಳ್ಳ ಜಾಗಕ್ ಪೋಯಿತ್ ಎತ್ತುವಕ ಪೂಂಞಾ ಎಣ್ಣಾಚಿ-
“ನೀಡ ಮೇಲ್‌ಲುಳ್ಳ ಬಟ್ಟೆನೆಲ್ಲಾ ಕೀತಿತ್ ಚಾಡ್...”

ನೀಲಕ್ಕಿ ಅನ್ನನೇ ಮಾಡ್‌ಚಿ. ಅವಳ ಬಲ್ಯಮರತಾರ ಮರೆಲ್ ಅಳಾಪಕೆಣ್ಣಾಚಿ. ಅಕ್ಕಣೆ ಅಲ್ಲಿ ಕೋರ್ ಚೆರಿಯ ಕ್ಣಿ ಬಾತ್. ಪೂಂಞಾ ನೀಲಕ್ಕಿಕ್ ಒರ್ ಉಪಾಯ ಎಣ್ಣೆ ಕೊಡ್‌ತತ್. ನೀಲಕ್ಕಿ ಮರತಾರ ಸೆರೆಂಜ ಮಂಡೆ ಉಳಾಕಿತ್ “ಭಾಗಮಂಡಲ ಪುರತಾರ ರಾಜಕುಮಾರಿಯಾನ ನಾನ್ ಯಾತ್ರ ಪೋಯಂಡಿಪ್ಪಕ, ಕಳ್ಳಂಗ ಬಂದಿತ್ ಎಲ್ಲಾರ್‌ನೋ ಕೊಂದಿತ್, ನಾಡ ಬಟ್ಟೆ ಕೀತ್‌ತ್ ಮಾಲ್ ಮಟತ್‌ನ ಎಡ್‌ತಂಡ್ ಪೋಯಿರ್‌ತ್. ಬೆರಿಯ ಪೋಯಿತ್ ನಿಂಗಡ ರಾಜಂಗಣ್ಣಿತ್, ನಲ್ಲ ವ್ಯವಸ್ಥೆ ಮಾಡ್‌ವಕೆಣ್ಣಾ...” ಜೋರ್‌ಲ್ ಎಣ್ಣಾಚಿ.

ಇದ್‌ನ ಕೇಟಿತ್ ಕ್ಣಿ, ಅರಮನೆಕ್ ಓಡ್‌ಚಿ. ಸುದ್ದಿ ಕ್ವಾನ್‌ನದು, ರಾಜಂಗ್ ಪೆರ್ತ್ ಬೇಜಾರಾಚಿ. ನಾಡ ರಾಜ್ಯತ್ ಒರ್ ರಾಜಕುಮಾರಿಕ್ ಇನ್ನತಾ ಸ್ಥಿತಿ ಬಂದಿತಲ್ಲಾಂದ್ ರಾಜ ಅವಕ್ ಬೋಂಡಿಯಾನ ಬಲ್ಯಪೊಡಿಯ, ಮಾಲ್‌ಮಟ ಎಲ್ಲಾ ಅಯೆಚಿ ಕೊಡ್‌ತತ್. ಜೊತೆಕ್ ರಾಜಕುಮಾರನೋ ಅಯೆಚತ್.

ನೀಲಕ್ಕಿ ರಾಜ ಅಯೆಚೆ ಬಟ್ಟೆ - ಬರಿನೆಲ್ಲಾ ಇಟ್ಟಂಡ್ ಮರೆಂಜ ಬಾತ್. ರಾಜಕುಮಾರಂಗ್ ಚಾಯಿಕಾರ್ತಿ ನೀಲಕ್ಕಿನ ನೋಟಿತ್ ಕುಸಿಯಾಯಿರ್ತ್. ಅವಳ ಅರಮನೆಕ್ ಕೂಟಿಯ ಪೋಚಿ. ಅಲ್ಲಿ ಮಾರಾಜಂಡ ಕೂಡೆ ನಾನ್ ಅವಳೇ ಮಂಗಲಾಪೀಂದ್ ಹರ ಬುದ್ಧತ್.

ರಾಜ ಒತ್ತಂಡತೇಂಗಿಯೂ, ಮಾರಾಣೆಕ್ ಚೆನ್ನಂಗ್ ಸಂಶಯ! ಈ ನೀಲಕ್ಕಿ ನೇರಾಯಿತೂ ರಾಜಕುಮಾರಿಯಾಂದ್! ಅವಳ ಪರೀಕ್ಷೆ ಮಾಡಂಡೂಂದ್ ತೀರ್ಮಾನ ಮಾಡ್ಚಿ.

ಉಂಬ ನೇರಕ್ ಮಾರಾಣೆ ಅಡಿಗೇಕಾರಂಡ ಪಕ್ಕ ಪೋಯಿತ್ ಎಣ್ಣೆ ಚಿ -

“ಬೊಳ್ಳಿ ಪಿಂಘ ಪೌನ್ರ ಬಟ್ಟೆಳತ್ ಪಾಯಿಸ ಎಡ್ತ ಬಂದಿತ್ ಬೆಯ್ಕಿ...; ನಂಗಡ ಪದ್ವತಿಲ್ ಆದ್ಯ ಬೊಳ್ಳಿ, ಅಲ್ಲಿಂಜ ಪೌನ್ರ ಬಟ್ಟೆಳತ್ ಪಾಯಿಸ ಕುಡಿಕಂಡು”.

ಅಡಿಗೇಕಾರ “ಅಪ್ಪಣೆ”ಂದ್ ಎಣ್ಣೆ ಚಿ.

ಈ ತಕ್ಕಬಾಕ್ನ ಪೂಂಘಾ ಕೇಟಂಡತ್. ಎಲ್ಲಾರೂ ಬಂದಿತ್ ಉಂಬಕ್ ಅಳಾತತ್. ಪೂಂಘಾ ಮೇಜಿರ ಕೇದಲ್ ನೀಲಕ್ಕಿರ ಕೂಡೆ ಅಳಾತತ್. ಎಲ್ಲಾರೂ ಉಂಬಕ ನೀಲಕ್ಕಿ “ಪೌನ್ರ ಬಟ್ಟೆಳ ಎಚ್ಚಕ್ ಚಾಯೀ”ಂದ್ ಅದ್ನ ಎಡ್ತಂಡತ್. ಕೇದಲ್ ಅಳತಿಂಜ ಪೂಂಘಾ ನೀಲಕ್ಕಿರ ಕಾಲನ ಮಾಂದ್ಚಿ. ಇದ್ಲೆಂತೋ ತಪ್ಪಾಚೀಂದ್ ಪೌನ್ರ ಬಟ್ಟೆಳ ಬೆಚ್ಚಿತ್, ಬೊಳ್ಳಿರ ಬಟ್ಟೆಳ ಎಡ್ತಂಡತ್. ಮಾರಾಣೆಕ್ ಕುಸಿಯಾಯಿರ್ತ್. ಸಂಶಯ ನೀಂಗ್ಚಿ.

ಅಂತೂ ಎಣ್ಣೆ ಚಿ - “ರಾಜಕುಮಾರಿ, ನಿಂಗ ದಂಡಾಳರ ಮಂಗಲ, ನಿಂಗಡ ರಾಜ್ಯತ್ಲೇ ನಡಕಡ್. ನಂಗೆಲ್ಲಾ ಅಲ್ಲಿಕೇ ಬಪ್ಪಾ” ನೀಲಕ್ಕಿ ಇಕ್ಕ ಬೊರ್ಪಕ್ ಸುರು ಮಾಡ್ಚಿ!

“ಬೊತ್ತತೆ, ಎಲ್ಲಾಂಗೂ ಒತ್ತಾಂದ್” ಪೂಂಘಾ ಕಾಲ ಮಾಂದಿತ್ ಎಣ್ಣೆ ಚಿ. ನೀಲಕ್ಕಿ ಒತ್ತಂಡತ್. ಬೈಟ್ ಪೂಂಘಾ, ಅರಮನೆಂಜ ಪೊರಮೆ ಪೋಚಿ! ಪೋಯಿ ಪೋಯಿ ಆಪಕ, ಆ ಊರಪ್ಪರ ಒರ್ ಕಾಡ್ ಕಯಿಂಜದು, ಬೊಳ್ಳಿಲ್ ಕೆಟ್ಟಿಂಜ ಅರಮನೆ ಇಂಜತ್. ಪೂಂಘಾ ಅಲ್ಲಿಕ್ ಪೋಚಿ. ಆ ಅರಮನೆಲ್ ಒರ್ ರಾಕ್ಷಸ ಇಂಜತ್! ಆ ರಾಕ್ಷಸ ಬೈಟ್ ನೇರತ್ ಅರಮನೆಕ್ ಪಡಿ ಇಟ್ಟಂಡ್ ಪೊರಟ್ ಎಲ್ಲಿಕೋ ಪೋಯಂಡಿಂಜತ್. ಪೋಪಕ ಬೀಗತ್ ಕೀನ ಪಟ್ಟಿಲ್ ಇಂಜ ಬಲ್ಯ ಮಾಂಗೆ ಮರತ್ಲ್ ಬೆಚ್ಚಿತ್ ಪೋಪಯಿಂಜತ್. ಪೂಂಘಾ ಪೋಯಿತ್ ಆ

ಮರತ್‌ರಡಿಲ್ ಅಳ್‌ತತ್. ರಾಕ್ಷಸ ದೂರ ಪೋನ ಪಿಂಞ ಪೂಂಞಿ ಕೀನ ಎಡ್‌ತಂಡ್ ಪೋಯಿರ್‌ತ್! ರಾಕ್ಷಸ ಸುಮಾರ್ ನೇರ ಕಯಿಂಜದು ಕೀ ಎಡ್‌ಪಕ್ ಬಾತ್. ಕಾಂಗತಿಪ್ಪಕ ಕೀನ ಉರ್‌ಟಿ ತೇಡ್‌ಚಿ. ಅಂವೊ ಸೂರ್ಯಂಡ ಬೊಳಿ ಬಪ್ಪಾಂಡೊಳಿಯ ಅರಮನೆರೊಳ್‌ಕ್ ಕೂಡಂಡಿಂಜತ್. ಸೂರ್ಯಂಡ ಬೊಳಿ ಬುದ್ದಕ ರಾಕ್ಷಸ ಭಸ್ಮ ಆಯಿರ್‌ವಯಿಂಜತ್. ರಾಕ್ಷಸ ಪೊಲಣೆಕ್ ಕೀನ ತೇಡ್‌ನಕಲೂ ಕ್‌ಟ್ವ್‌ನದೇ ಇಲ್ಲೆ.

ಕಡೇಕ್ ಪೊಲಂದಿತಾಪಕ ಅಂವೊ ಭಸ್ಮ ಆಯಿ ಪೋಚಿ. ಆ ಊರ್‌ರ ಜನಕ್ ರಾಕ್ಷಸ ಚತ್ತದ್ ಕಂಡಿತ್ ಕುಸಿಯಾಯಿರ್‌ತ್. ನೀಲಕ್ಕಿನ ಆ ಊರ್‌ಕ್ ಒರ್ ಸೇವಕನ ಅಯೆಚಿತ್, ಪುದಿಯ ರಾಜಕುಮಾರಿ ಬಪ್ಪಾ... ಅರಮನೆನ ಪಿಂಞ ಊರ್‌ನ ಚಿಂಗಾರ ಮಾಡೀ"ಂದ್ ಎಣ್ಣು ವಕ್ ಪೂಂಞಿ ಎಣ್ಣ್‌ಚಿ.

ಆ ಊರ್‌ರ ಜನಕ್ ಪುದಿಯ ರಾಜಕುಮಾರಿರ ಸುದ್ದಿ ಕೇಟಿತ್ ಪೆರ್ತ್ ಕುಸಿಯಾಯಿರ್‌ತ್. ನೀಲಕ್ಕಿ ಪಿಂಞ ರಾಜಕುಮಾರ ಬಪ್ಪಕ ಊರ್ ಜೋರಾಯಿತಿಂಜತ್. ಅವಡ ಮಂಗಲ ಗೌಜಿಲ್ ಕಯಿಂಜತ್. ಅವು ದಂಡಾಳೂ ಪಿಂಞ ಪೂಂಞಿ ಸುಮಾರ್ ಕಾಲ ಸುಖಿತ್‌ಲ್ ಬದ್‌ಕ್‌ಚಿ.

*

*

*



ಅಪ್ಪಂಡೇರಂಡ ಪವಿತ ಪೆಮ್ಮಯ್ಯ

ಕುಟ್ಟಿ ಬಾಡಗ ಚೂರಿಕಾಡ್ ಗ್ರಾಮ ಅಪ್ಪಂಡೇರಂಡ ಪೆಮ್ಮಯ್ಯ ಪಿಂಞ ಲಲಿತ ಪೆಮ್ಮಯ್ಯ ದಂಪತಿಯದ ದಂಡನೇ ಮೋವ. ಸುಮಾರ್ ಕನ್ನಡ, ಕೊಡವ ಪತ್ರಿಕೆಲ್ ಇಯಂಡ ಎಳ್ತ್ ಪ್ರಕಟಾಯಿತ್. ಚೂಡಚೋಮುಣಿ, ಕಾಲ ಬಂದನ್ನಕೆ ಕೋಲ ಕೆಟ್ವನವು, ಪ್ರಕಟಣೆ, ಏಪ್ರಿಲ್ ಪೂಲ್, ಪಾದಿಲ್ ನಿಂದ್ ಪೋನ ಕಥೆ ... ಇನ್ನತ ಕಥೆ, ಕವನ, ಚುಟುಕ್ ನ ಎಳ್ ದಿತ್.

ಕೊಡವ ಕವಿಗೋಪ್ಪಿ, ಸಾಹಿತ್ಯ ಶಿಬಿರ, ಕೊಡವ ಮೇಳ ... ಇನ್ನತ ಸಾಹಿತ್ಯ ಕಾರ್ಯಕ್ರಮತ್ ಭಾಗವಹಿಸಿತ್ ಸುಮಾರೆಲ್ಲಾ ಇನಾಂನೋ ಪಡ್ಂದಂಡಿತ್. ಬ್ರಹ್ಮಗಿರಿ ಬೊಳ್ಳಿನಮ್ಮೆ ಪೈಪೋಟಿಲೂ ಇನಾಂ ಪಡ್ಂದಂಡಿತ್.

ಮಡಿಕೇರಿ ಆಕಾಶವಾಣಿಲ್ ಇಯಂಡ ಕಾರ್ಯಕ್ರಮ ಪ್ರಸಾರ ಆಯಿತ್. ಕೊಡವ ಸಿರಿ ವಿಭಾಗತ್ ನಾಕಂಡ ಪುತ್ತಂಗಾರ್ತಿಯ, ಕಂಡೆಕ್ಕರ್ ನ ಕಂಡಿರಾ ... ಎಣ್ಣುವ ಐಲಾಟಿತ್ ಭಾಷಣ, ಬಾಳ್ ಬಂದಾಟ ಎಣ್ಣುವ ರೇಡಿಯೋ ನಾಟಕ, ಚೂರಿಕಾಡ್ ಸ್ಕೂಲ್ ಮಕ್ಕಕಾಯಿತ್ ಕೊಡವ ಕಾರ್ಯಕ್ರಮ, ನಿರೂಪಣೆ ಪಿಂಞ ಸಂಯೋಜನೆ, ಯುವವಾಣಿಲ್ ಯುವಲಹರಿ ಎಣ್ಣುವ ಕಾರ್ಯಕ್ರಮ ನಡ್ತಿತ್.

ಇದ್ಂಗೆ ಮುಪ್ಪಡೆ, ಕೊಡವ ತಕ್ಕ್ ಎಳ್ತಕಾರಡ ಕೂಟಿತ್ 32 ನೇ ಮಾಲೆಲ್ ಇಯಂಡ ಆದ್ಯ ಪುಸ್ತಕ "ವಿಷ ಪೊಗ್" ಕಾದಂಬರಿ ಬೊಳ್ಳಿ ಕಂಡಿತ್. ಇದೇ ಕೂಟಿತ್ ಮೂಲಕ ಇಯಂಡ 2 ನೇ ಪುಸ್ತಕ "ಕಥೆ ಪೋಳಿಯ" ಎಣ್ಣುವದ್ 2006 ನೇ ನವಂಬರ್ ಲ್ ಬುಡ್ ಗಡೆ ಆಯಿತ್. ಇದ್ ಇಯಂಡ 3 ನೇ ಪುಸ್ತಕ.

ಇಯಂಡ ವಿಳಾಸ :

ಅಪ್ಪಂಡೇರಂಡ ಪವಿತ ಪೆಮ್ಮಯ್ಯ

D/o. ಎ. ಕೆ. ಪೆಮ್ಮಯ್ಯ, ಚೂರಿಕಾಡ್ ಗ್ರಾಮ

ಕುಟ್ಟಿ ಪೋಸ್ಟ್ - 571 250